

Bàu Lem tiaq
Mathêu
 Achìh Bìac Chuaq Jêxu Broq Wa Hnài
Bàu Patô Adroi

Hiniq wa Bàu Xèm Da Sech:

Hiniq cô hadai hiniq da mangai khoi wìa mangai hõc tiaq da Chuaq Jêxu. Ta cô i bàu achìh: “Bàu Lem Enh Boc Plình.”

Mangai Achìh wa Hanam Achìh:

Mathêu achìh Sech Bàu Lem cô. Mathêu aih: “Bìac Tabàih da Chuaq”. Adroi nèh haq mangai bòch gop màng. Haq hadai i hiniq Lêwi.

Sech Mathêu cô khoi achìh adroi ca phòq Jê-ru-sa-lem 'bìq raliang đac hanam 70 Atìq C.

Bàu Anoi:

Mathêu enh achìh sech cô òiđiq patô ro 'ràng Chuaq Jêxu Haq joq 'nàng Mêsi – aih Mangai Loh Enh Plình òiđiq dèch con mangai. Bàc yàng haq yõc bàu enh Sech Hadròih phàn ma dùnh wa achìh bàu: Diac Plình (Diac Boc Plình).

Bàu ta sech cô jah lah axong 5 phàn: (1) 'Nat 5-7; (2) 'Nat 10; (3) 'Nat 13; (4) 'Nat 18; (5) 'Nat 24-25.

Rìm 'Nat:

1. Hì xa-ông ca Jêxu wa jò òi con 'yoh: 1:1—2:23
2. Baxèm bìac broq da Chuaq Jêxu: 3:1—4:11
3. Bìac broq da Chuaq Jêxu ta gùng Ga-li-lê: 4:12—14:12
4. 'Bài yàng Chuaq Jêxu tawìh enh gùng Ga-li-lê: 14:13—17:20
5. Bìac lùch Chuaq Jêxu broq ta gùng Ga-li-lê: 17:22—18:35
6. Bìac Chuaq Jêxu broq ta gùng Judia wa: 19:1—20:34

7. Bìac nan xa da Chuaq Jêxu: 21:1—27:66

8. Hì Rìh Hlài: 28:1–20

Xinoi Chuaq Jêxu Crich

(Luc 3:23–38)

¹ Cồ xinoi da Chuaq Jêxu Crich, hadrech Đawit, con xau Ap-ra-ham.

² Ap-ra-ham xa-ông ca Isac,

Isac xa-ông ca Jacôp,

Jacôp xa-ông ca Juda wa oh daq haq.

³ Juda wa Tama mai haq, xa-ông ca Perex wa Xêra,

Perex xa-ông ca Hêtrôn,

Hêtrôn xa-ông ca Aram.

⁴ Aram xa-ông ca A-mi-na-đap,

A-mi-na-đap xa-ông ca Na-ach-son,

Na-ach-son xa-ông ca Sanhmôn.

⁵ Sanhmôn wa Rahap mai haq, xa-ông ca Bô-ô,

Bô-ô wa Rut xa-ông ca Ôbêr,

Ôbêr xa-ông ca Jêxê.

⁶ Jêxê xa-ông ca bùa Đawit.

Đawit yốc mai Uria xa-ông ca Sa-lô-môn.

⁷ Sa-lô-môn xa-ông ca Rê-hô-bô-am,

Rê-hô-bô-am xa-ông ca A-bi-ja,

A-bi-ja xa-ông ca Asap.

⁸ Asap xa-ông ca Jê-hô-sa-phat,

Jê-hô-sa-phat xa-ông ca Jôram,

Jôram xa-ông ca Ôxia.

⁹ Ôxia xa-ông ca Jôtham,

Jôtham xa-ông ca Acha,

Acha xa-ông ca Ê-xê-chia.

¹⁰ Ê-xê-chia xa-ông ca Ma-na-se,

Ma-na-se xa-ông ca Amon,
Amon xa-ông ca Jôsia.

¹¹ Jò ti rùp wì tồc Diac Ba-bi-lôn, Jôsia xa-ông ca Jê-cô-nia wa oh daq haq.

¹² Ồi ta Ba-bi-lôn,
Jê-cô-nia xa-ông ca Sa-an-thi-ên,
Sa-an-thi-ên xa-ông ca Xô-rô-ba-bên.

¹³ Xô-rô-ba-bên xa-ông ca A-bi-ut,
A-bi-ut xa-ông ca Ê-li-a-kim,
Ê-li-a-kim xa-ông ca Axô.

¹⁴ Axô xa-ông ca Xadoc,
Xadoc xa-ông ca Achim,
Achim xa-ông ca Ê-li-ut.

¹⁵ Ê-li-ut xa-ông ca Ê-li-a-xa,
Ê-li-a-xa xa-ông ca Mathan,
Mathan xa-ông ca Jacôp.

¹⁶ Jacôp xa-ông ca Jôsep, aih ổng Mari. Mari, haq xa-ông ca Jêxu, wì creo Haq Chuaq Jêxu Crich.

¹⁷ 'Màng aih, enh Ap-ra-ham trùh Đawit, điq đổng 14 'nhòng. Enh Đawit trùh jò wì 'bìq rùp tồc Diac Ba-bi-lôn, hadai 14 'nhòng. Enh jò wì 'bìq rùp tồc Diac Ba-bi-lôn trùh Chuaq Jêxu Crich, hadai 14 'nhòng.

Bìac Xa-ông ca Chuaq Jêxu

(Luc 2:1-7)

¹⁸ Bìac xa-ông ca Chuaq Jêxu Crich khoi i 'màng cô: Jò Mari miq Chuaq Jêxu khoi hùaq broq mai Jôsep, wa 'nhòq lah caq ồi ti dabau, mahaq Mari khoi hadròp nhò cwìang Yiang Hadròih. ¹⁹ Jôsep mangai ma hùaq broq ổng haq, aih mangai lem manoh, ùh enh wì capoch 'mèq, haq hèm trong cađac hlèp Mari.

²⁰ Mahaq jò haq 'nang hèm biac aih, i mòiq 'bình plình Chuaq loh mahno ca haq jò haq apô, doi: “Ô Jôsep con xau Đawit, ìh apaq yùq yôc Mari broq mai, ma jah 'màng aih Con haq ma 'nang hadròp enh Yiang Hadròih. ²¹ Haq jah xa-ông mòiq toq Con Calô, ìh ep hiniq ca Haq, Jêxu, ma jah 'màng aih Haq jah dèch jàn Haq loh khoi enh tôiq lôì.”

²² Rìm biac khoi i 'màng aih, òđiq broq xit bàu Chuaq ma Haq khoi am mangai capoch thai Boc Plình achìh adroi: ²³ “Cò èh, i mòiq ngai gu adrùh xriu ôi jiang, xa-ông mòiq toq Con Calô.” Khoi èh wì hiniq ca Con Calô aih hiniq: “Em-ma-nu-ên, aih Boc Plình ôi ti bèn.”

²⁴ Jôsep rìu, broq tiaq troi bàu 'bình plình khoi tanap, hi yôc Mari broq dèh mai. ²⁵ Mahaq wa ùh caq ôi ti dabau trùh jò Mari xa-ông mòiq toq Con Calô, hiniq Haq Jêxu.

2

'Bàì Thài Rabiaq ma Hốc Hlống

¹ Jò xa-ông ca Chuaq Jêxu ta phôq 'Bê-t-lê-hem, gùng Judìa, 'nhòng Hêrôt broq bùa, i 'bài thài rabiaq ôi enh Diac pah mat mahì loh, lam trùh ta phôq Jê-ru-sa-lem. ² Wì bòch: “Bùa Yothaiq neo xa-ông ôi ta leq? Ma jah 'màng aih nhèn khoi hnoq halống Haq enh Diac pah mat mahì loh. Nhèn lam trùh ta aih òđiq cùh waiq Haq.”

³ Hĩa tàng bàu 'màng aih, bùa Hêrôt wa òđiq ca phôq Jê-ru-sa-lem hlè lèt ta manoh. ⁴ Bùa tagop òđng òđiq 'bài pajàu càn wa 'bài thài ranenh, haq bòch: “Mangai Crich khoi xa-ông ta leq?” ⁵ Wì tèo: “Ta 'Bê-t-lê-hem, gùng Judìa, ma jah 'màng aih i bàu mangai capoch thai Boc Plình khoi achìh:

⁶ “Ô 'Bê-t-lê-hem gùng Judìa,
joq 'nàng ìh ùh thùa cleq 'bài phôq càn ta gùng Judìa,
ma jah 'màng aih, enh nòi ìh jah loh mòiq Ngai broq gàu,
cla Haq wèq ban jàn Is-ra-ên, aih jàn Au.’”

⁷ Bùa Hêrôt creo ca 'bài thài rabiaq trùh hlep ti haq, hi bòch wì jò leq bu hnoq halǒng aih loh. ⁸ Khoi èh haq thê wì lam ta 'Bêl-lê-hem, rai tanap: “Pì lam ti bòch biac Con Nga aih beq, jò chaq khoi hnoq, am ca au loq òiq, au hadai lam trùh cùh waiq Haq.”

⁹ Khoi ca wì tamàng bùa doi, wì haq lam hloi jò aih. Halǒng wì ma hnoq enh pah mat mahi loh, lam adroi ca wì trùh jang nòi Con Nga òi, halǒng yòng. ¹⁰ Jò 'bài thài hnoq halǒng, wì lem bùi òiq jaq. ¹¹ Jò wì mùt ta hnem hnoq Con Nga wa Mari miq Haq, wì cùp gàu hacùn cràng cùh waiq Haq, khoi èh wì 'noh 'bài ngè canaq 'bac am ca Haq, aih wang, nhù hùang wa mùc jùac. ¹² Atiq ca aih wì apô, Boc Plình pa'yèp ca wì ùh thê wì hlài ta bùa Hêrôt, mahaq lam trong 'noiq hlài dèh ta Diac.

Cadàu Mot ta Diac Aicàp

¹³ Khoi ca 'bài thài aih lam, i 'bình plình Chuaq loh doi ca Jôsep ta jò haq apô. 'Bình plình doi: “Riù beq! 'Nong Con Nga wa miq Haq cadàu mot ta Diac Aicàp, khoi èh òi hloi ta aih trùh jò Au thê ìh, ma jah 'màng aih bùa Hêrôt 'nang ti chaq Con Nga waq ca jah jêh đac Haq.” ¹⁴ Jôsep padinh yòng, 'nong Con Nga wa miq Haq lam cwa ta Diac Aicàp jò damang. ¹⁵ Haq òi ta aih trùh jò bùa Hêrôt cachit, òiq broq xit bàu mangai capoch thai Boc Plình khoi doi adroi: “Au khoi creo dèh ca Con loh enh Diac Aicàp.”

¹⁶ Jò Bùa Hêrôt hnoq 'bài thài rabiaq 'nùt haq, haq nòih òiq jaq. Haq thê mangai lình jêh đac òiq òng con nga baiq hanam dàng loh òi ta phòq 'Bêl-lê-hem wa jàp ta gùng aih, tiaq troq hì, khê 'bài thài rabiaq ma khoi am bùa loq. ¹⁷ 'Màng aih broq xit bàu Jê-rê-mi mangai capoch thai Boc Plình khoi doi adroi:

¹⁸ “Khoi tàng bàu wì cachech,
hmoi ta phòq Rama,

aih Rachên hmoi dèh ca 'bài con,
 haq ùh jah àt, ùh chiùq cabô alông haq,
 ma jah 'màng aih 'bài con haq pi i hòm.”

Enh Diac Aicàp Wìh Hlài Yothaiq

¹⁹ Mahaq khoi ca bùa Hêrôt cachit, i 'bình plình Chuaq trùh ti Jôsep ta jò haq apô, òi ta Diac Aicàp doi ca haq:
²⁰ “Yòng beq, 'nong Con Nga wa miq Haq hlài ta Diac Yothaiq, ma jah 'màng aih 'bài mangai ma enh jêh đac Con Nga, khoi cachit.”

²¹ Jôsep padinh yòng, 'nong Con Nga wa miq Haq hlài ta Diac Yothaiq. ²² Mahaq jò tàng wì doi, A-chê-lau broq bùa thai Hêrôt baq haq ta gùng Judia, Jôsep crè, ùh hùa hlài ta aih. Èh khoi ca Boc Plình pa'yèp ca haq jò haq apô, haq mùt ta gùng Ga-li-lê. ²³ Haq lam òi gùng Na-xa-ret. Bìac aih broq xit bàu mangai capoch thai Boc Plình khoi doi adroi: “Wì jah creò Haq Mangai Na-xa-ret.”

3

Jon 'Baptit Anoi Hnài

(Môc 1:1-8; Luc 3:1-18; Jon 1:19-28)

¹ Jò aih, Jon 'Baptit hnài Bàu Lem ta ðùng hawit gùng Judia. ² Haq doi: “Pì ep cađac dèh manoh broq tôiq beq, ma jah 'màng aih Diac Plình trùh khoi haten!” ³ Aih mangai ma Êsai, mangai capoch thai Boc Plình, khoi doi: “I bàu creò ta ðùng hawit,
 ‘Padon trong ca Chuaq beq,

Broq da-adàng 'bài trong Haq.’”

⁴ Jon caxùnh eo xam xac lốcđã, cật ca'nam xam caxi akia, caq líp tùc wa diac xùt. ⁵ Jò aih, ðìq ca jàn ta phòq Jê-ru-sa-lem, jàp gùng Judia wa gùng haten ca diac Jôđan lam trùh ti Jon. ⁶ Jò wì khoi pa'noh dèh tôiq lôi, wì chiùq haq broq 'baptem ta diac Jôđan.

⁷ Mahaq jò Jon hnoq bàc ngai Pha-ri-si wa Sa-đu-sê trùh ti haq xìn haq broq 'baptem, Jon doi ca wì: “Ô xinoi bìh plǒng! Cabô khoi pa'yèp pì loq wia claih ca can nòih Boc Plình hì atìq èh?” ⁸ 'Màng aih, pì wìh wìa loh plì ma lem beq òòiq tajì ca pì khoi cađac dèh manoh broq tôiq. ⁹ Apaq hèm dèh ta manoh: ‘Ap-ra-ham haq baq bèn, ma jah 'màng aih.’ Au doi ca pì, Boc Plình jah broq hmu cô wìa con xau am ca Ap-ra-ham. ¹⁰ Manàiq cô chòng khoi òòiq jang xem long. Long leq ùh loh plì lem, coh bùh đac ta ùnh.

¹¹ “Phàn au, au 'baptem ca pì xam diac òòiq pì cađac dèh manoh broq tôiq. Mahaq i mòi Ngai trùh atìq ca au i cwàng itai yi càn ca au. Au ùh đàng ca yinh jai Haq. Haq broq 'baptem ca pì xam Yiang Hadròih wa xam ùnh. ¹² Tì Haq wê tởn dè hreo manùh, Haq 'mùt 'mau len ta hapom, manùh bùh ta ralùng ùnh ùh jò leq pat.”

Chuaq Jêxu Chìuq 'Baptem

(Mởc 1:9-11; Luc 3:21-22)

¹³ Wop jò aih, Chuaq Jêxu lam enh gùng Ga-li-lê trùh ti Jon ta diac Jôđan, òòiq chìuq Jon broq 'baptem am ca Haq.

¹⁴ Mahaq Jon ùh waq. Haq doi: “Cla au nhet chìuq ìh broq 'baptem ca au, mahaq ìh xìn au broq 'baptem ca ìh 'mòh?”

¹⁵ Chuaq Jêxu doi: “Manàiq cô phai broq 'màng cô, ma jah 'màng aih bèn broq waq ca gêh rìm bàc ta-atoq.”

¹⁶ Jò chìuq 'baptem khoi gêh, Chuaq Jêxu tởc enh diac. Tajòi 'mòi hnoq plình tapèh, Haq hnoq Yiang Hadròih Boc Plình tìah ca chìm trù, jrạp ti chac Haq. ¹⁷ I bầu capoch enh Plình: “Cô Con Calô Au. Au loq waq ca Haq. Haq broq lem manoh Au rìm trong.”

4

*Can Kiac Satan Padô 'Nùt Chuaq Jêxu**(Môc 1:12-13; Luc 4:1-13)*

¹ Khoi êh Yiang Hadrôi h 'ràng Chuaq Jêxu lam ta nôi ðùng hawit ðoìq can kiac Satan padô 'nùt Haq. ² Haq khoi rôn ca acaq 40 hì, 40 mang, khoi ca aih Haq pangot. ³ Can kiac Satan trùh haten padô 'nùt Haq, doi: “Tàng ìh joq 'nàng Con Boc Plình, thê hmu cô wìa 'benh beq.”

⁴ Chuaq Jêxu padreo bàu doi: “Khoi achìh ta Sech Hadrôi h: ‘Con mangai rìh ùh xài toq nhò dahwèq caq, mahaq ep canòm ca rìm bàu loh enh hacùng Boc Plình.’[☆]”

⁵ Khoi êh, can kiac Satan 'ràng Haq mùt ta phòq hadrôi h, ðoìq Haq jang bôì grôi của Hnem Cùh Waiq, ⁶ hi doi ca Haq: “Tàng ìh joq 'nàng Con Boc Plình, ca'nìh dađeh beq, ma jah 'màng aih i bàu khoi achìh ta Sech Hadrôi h: “‘Chuaq jah thê 'bài 'bình plình wèq ìh ta tì, ðoìq jèn h ìh ùh troq hmu.’[☆]”

⁷ Chuaq Jêxu padreo bàu doi: “Hadai khoi i bàu achìh ta Sech Hadrôi h: ‘Ìh apaq thù Chuaq, Boc Plình ìh.’[☆]”

⁸ Can kiac Satan 'ràng atõc Haq ta bôì wang ðìq jaq ha'nhèq, patô ca Haq ðìq ðõng Diac ta crõng taneh wa biac 'ngah 'ngai 'bài Diac aih, ⁹ hi doi ca Haq: “Tàng ìh hacùn cràng cùh waiq au, au am ca ìh ðìq ðõng Diac cô.”

¹⁰ Chuaq Jêxu doi ca haq: “Ô can kiac Satan, wìa beq! Ma jah 'màng aih i bàu khoi achìh ta Sech Hadrôi h: ‘Ìh ep cùh waiq Chuaq, Boc Plình ìh, wa patìh toq ca Haq hêq.’[☆]”

¹¹ Can kiac Satan loh lam. Tajòì 'mòì i 'bình plình trùh haten patìh ca Haq.

☆ 4:4 4:4 RAH 8:3. ☆ 4:6 4:6 BCP 91:11,12. ☆ 4:7 4:7 RAH 6:16.

☆ 4:10 4:10 RAH 6:13.

*Chuaq Jêxu Baxèm Broq Bìac ta Ga-li-lê**(Mốc 1:14-15; Luc 4:14-15)*

¹² Jò Chuaq Jêxu hìa tàng wì khoi rùp Jon 'mùt ta tù, Haq lam ta gùng Ga-li-lê. ¹³ Haq cađac phòq Na-xa-ret lam trùh òi ta phòq Ca-bê-na-um, haten ca diac raxìq, jap acang gùng Xa-bu-lun wa Nep-ta-li. ¹⁴ Màng aih, troq troi bàu Êsai, mangai capoch thai Boc Pình khoi doi adroi:

¹⁵ “Gùng Xa-bu-lun wa gùng Nep-ta-li,
 òi ti trong trùh ta diac raxìq, pah tau diac Jôđan,
 aih mòiq phàn taneh da gùng Ga-li-lê khoi wìa taneh
 mangai jàn 'noiç.

¹⁶ Mangai ta gùng aih ha'ngui ta clam clòiq,
 khoi hnoq can 'ngah càn,
 wa 'bài mangai ha'ngui ta yàp can cachit,
 khoi i can 'ngah xreo wì.”[☆]

¹⁷ Enh jò aih, Chuaq Jêxu baxèm anoi hnài wì: “Pì ep cađac dèh manoh broq tôiq beq, ma jah 'màng aih Diac Pình trùh khoi haten.”

*Mangai Hõc Tiaq Baxèm**(Mốc 1:16-20; Luc 5:1-11)*

¹⁸ Jò Haq lam ti 'bò diac raxìq Ga-li-lê, hnoq wa baiç ngai oh daq, aih Simôn wì creo haq Pêtrô, oh haq Anrê, tang hlàm ta diac raxìq, ma jah 'màng aih wa mangai ranang ca.

¹⁹ Haq creo ca wa: “Lam tiaq Au beq, Au broq chòp dèch mangai 'màng ca chòp ranang ca.” ²⁰ Wa oh daq cađac hlàm lam tiaq Haq.

²¹ Enh nòi aih lam tam toq 'biaq hòm, Haq hnoq wa oh daq 'noiç, aih Jacò con Xê-bê-đê, wa oh haq, aih Jon. Wa 'nang hmình hlàm ti Xê-bê-đê, baq wa òi ta bong, Haq creo ca wa. ²² Tajòì 'mòi wa cađac dèh baq wa bong, lam tiaq Haq.

[☆] 4:16 4:16 Êsai 9:1,2.

²³ Chuaq Jêxu lam jàp ta gùng Ga-li-lê, hnài wì ta hnem tagop, anoi ca wì Bàu Lem Diac Plình, wa broq brêh diq dồng ca wì mangai ùh hróc. ²⁴ Wì anoi hlài biac Haq broq jàp gùng Siri. Wì 'ràng ca Haq diq ca mangai ùh hróc, 'bài mangai i hinìq enh jò ỏi nga, 'bài mangai i kiac ỏi ta chac, mangai troq kenh wa mangai pen. Haq broq am wì brêh dồng diq. ²⁵ Bàu mangai hrìn tiaq Haq enh gùng Ga-li-lê, gùng Đê-ca-pô-lò, phòq Jê-ru-sa-lem, gùng Judia, wa enh gùng pah tau diac Jôđan.

5

Bàu Xôq Ramốt Anoi Hnài ta Wang (Luc 6:20-23)

¹ Chuaq Jêxu hnoq mangai bàu, Haq tọc ta bôì wang. Jò Haq ha'ngui, mangai hóc tiaq thia haten. ² Haq hnài wì doi:

- ³ “Xôq ramốt am ca wì ma ngan ca dadeh ùh đàng cleq,
taiq wì haq jah hùang Diac Plình.
- ⁴ Xôq ramốt am ca mangai crò hmoi,
ma jah 'màng aih jah alòng wì haq.
- ⁵ Xôq ramốt ca mangai i manoh ùh padèch dadeh,
ma jah 'màng aih, èh haq jah nhàn yóc taneh.
- ⁶ Xôq ramốt ca mangai i manoh enh waq caq ỏi ta-atoq,
ma jah 'màng aih wì haq jah tôm tàu.
- ⁷ Xôq ramốt ca mangai loq xa-öch,
ma jah 'màng aih jah xa-öch chao ca wì haq.
- ⁸ Xôq ramốt ca mangai i manoh hadròih,
ma jah 'màng aih wì haq jah hnoq Boc Plình.
- ⁹ Xôq ramốt ca mangai loq broq ca con mangai hatroq ca dabau,
ma jah 'màng aih jah creò wì haq, con caiq Boc Plình.
- ¹⁰ Xôq ramốt ca mangai chiuq wì ti rùp taiq wì haq tiaq trong ta-atoq,

ma jah 'màng aih wì haq jah huàng Diac Plình.

¹¹ “Xôq ramôt ca pì jò wì hanip pì, ti rùp pì, jù lê wa capoch rìm hiniq ngang dù ca pì taiq pì tiaq Au. ¹² Yôc manoh manè wa lem bùi beq, ma jah 'màng aih, pì jah i biác baha càn ôi ta plình èh. Calah nèh wì hadai khoi ti rùp mangai capoch thai Boc Plình, 'màng ca wì rùp pì manàiq.

Boh wa Can 'Nghah

(Môc 9:50; Luc 14:34-35)

¹³ “Pì boh crông taneh, mahaq tàng boh pi xang, yôc ca cleq broq hlài ðòiq haq xang? Boh aih pi wìa waq hòm, ep ùc đac enh gùng ðòiq mangai jôiq enh 'neq ca jènh.

¹⁴ “Pì can 'ngah crông taneh. Mòiq toq phôq ôi ta bôh wang ùh jah hlèp. ¹⁵ Hadai ùh i cabô bùh đen èh gùp đac ta thùng, mahaq ðòiq ti nôi ha'nhèq, xreo 'ngah ðiq đống rìm ngai ôi ta hnem. ¹⁶ Can 'ngah pì ep xreo 'ngah enh ngìa wì 'màng aih, ðòiq wì hnoq biác lem da pì, wì jah manè Baq pì ôi ta plình.

Ranenh Boc Plình

¹⁷ “Pì apaq xoh Au trùh ðòiq raliang đac Ranenh Boc Plình wa bàu anoi da Mangai Capoch Thai Boc Plình. Au trùh, ùh xài ðòiq raliang, mahaq ðòiq broq jah gêh. ¹⁸ Ma jah 'màng aih Au doi ca pì joq 'nàng, jò plình wa crông taneh 'nhòq hnhung, hadai ùh jah xùt đac mòiq teo loq mòiq chù leq ta Sech Ranenh Boc Plình trùh jò rìm biác jah gêh. ¹⁹ 'Màng aih, mangai leq cađac mòiq hiniq ðiq ca jaq 'yoh ta bàu thê cô, wa hnài wì broq tiaq 'màng aih, jah creo haq 'yoh ðiq jaq ta Diac Plình, èh mangai leq wèq 'bài bàu thê aih wa hnài wì 'noi q wèq ðiq, jah creo haq càn ôi ta Diac Plình. ²⁰ Ma jah 'màng aih Au doi ca pì, tàng biác ta-atoq pì, ùh yi càn ca biác ta-atoq da 'bài thài ranenh wa 'bài mangai Pha-ri-si, pì ùh jah mùt Diac Plình.

²¹ “Pì i tàng bàu doi ca wì mangai calah nèh: ‘Ìh ùh jah jêh cachit ca mangai.’[☆] Tàng mangai leq jêh cachit mangai, haq ep chiùq hadrah baxa.’ ²² Mahaq Au doi ca pì: Tàng mangai leq nòih dèh ca oh daq, èh haq ep chiùq hadrah baxa. Mangai leq lech dèh ca oh daq: ‘Gè blùng,’ haq ep chiùq hatinh hiniq nòih hadrah ha'nhèq. Mangai leq lech dèh ca oh daq: ‘Gè ranhùa,’ èh haq ep chiùq 'bau ùnh baxa.

²³ “ 'Màng aih, jò ìh yòng am nègè tadreo jang ngìa ca ca'böng tadreo, ìh hmàng hlài, i oh daq ìh i bìac ùh bùi ca ìh, ²⁴ ìh ep òòiq òò nègè tadreo jang ngìa ca ca'böng tadreo, thê ìh wìh hlài broq hatroq dèh ca oh daq hòiq, khi ìh hi trùh am nègè tadreo.

²⁵ “Jò lam pajùm ti mangai ma git ca ìh, ìh ep renh hatroq ca haq. Tàng ùh broq 'màng aih, haq jao am ìh ca cwan hadrah. Cwan hadrah jao ìh ta tì mangai wèq hnem tù, èh ìh 'bìq clêh ta tù. ²⁶ Joq 'nàng Au doi ca ìh, tàng ìh ca'naih òi thiùq mòiq òòng, xôq ìh ùh jah loh khi enh hnem tù.

²⁷ “Pì i tàng bàu doi: ‘Ìh apaq broq tôiq tango.’[☆] ²⁸ Mahaq Au doi ca pì loq: Mangai leq ngan gù cadrì rai hèm ta manoh enh tango ca haq, mangai aih khi broq tôiq tango ta manoh ca gù cadrì aih. ²⁹ Tàng mat pah 'ma broq ìh broq tôiq, thê ìh dõih tèm đac hangai ca ìh beq, ma jah mang aih cađac mòiq apah mat lem yi hnao ca cađac òiq ca chac hamac mùt 'bau ùnh. ³⁰ Tàng tì pah 'ma broq ìh broq tôiq, thê ìh coh tèm đac hangai ca ìh beq, ma jah 'màng aih, cađac mòiq apah tì, lem yi hnao òiq ca chac hamac mùt ta 'bau ùnh.

³¹ “I bàu doi: ‘Tàng mangai leq enh cađac dèh mai, haq ep achìh jàiq cađac.’[☆] ³² Mahaq Au doi ca pì: Tàng mangai

[☆] 5:21 5:21 LEA 20:13. [☆] 5:27 5:27 LEA 20:14. [☆] 5:31 5:31 RAH 24:1.

leq cađac dèh mai, ùh xài taiq mai haq tango, mangai aih khoi broq dèh mai loh mangai broq tôiq tango. Tàng mangai leq yốc mangai cadrì wì khoi cađac, èh haq hadai broq tôiq tango.

³³ “Pì ỏi tàng bàu doi ca wì calah nèh: ‘Ìh ùh jah pachac 'nùt, mahaq enh ngìa ca Chuaq, ep wèq dèh bàu pachac.’
³⁴ Mahaq Au doi ca pì: Apa q pachac broq cleq. Apa q patô plinh khoi èh pachac, ma jah 'màng aih plinh, aih gèq bùa da Boc Plinh. ³⁵ Apa q patô crống taneh khoi èh pachac, ma jah 'màng aih crống taneh, aih nòi long thòt ðòiq roh jènh da Boc Plinh. Apa q patô phòq Jê-ru-sa-lem khoi èh pachac, taiq aih phòq Bùa càn. ³⁶ Ìh apa q patô dèh gàu, khoi èh pachac, ma jah 'màng aih ìh xòq 'nhòq jah broq dèh mòiq hadrang xàc ta gàu loh ca gam loq loh ca taboc.
³⁷ Mahaq ìh phai doi: ‘Jòq,’ ‘jòq,’ ‘ùh,’ ‘ùh.’ Bìac leq wì ma anoi tam, bìac aih loh enh ngang dù.

³⁸ “Pì i tàng bàu doi: ‘Mat ðèn mat, hanenh ðèn hanenh.’[☆] ³⁹ Mahaq Au doi ca pì: Apa q tajraq ca mangai dù, tàng haq tep hadrò ìh pah 'ma, am hloi haq tep pah 'ngeo. ⁴⁰ Tàng mangai leq enh kìa ìh waq ca jah yốc da ìh eo ðêq, ìh am hloi ca haq eo yôh. ⁴¹ Tàng mangai leq enh rùp ìh lam mòiq apốt trong, ìh lam tiaq haq baiq apốt trong. ⁴² Mangai leq xìn dahwèq ìh, am ca haq beq, mangai leq enh bòch ðò dahwèq ìh, apa q wia đac.

⁴³ “Pì i tàng bàu doi: ‘Thê ìh loq waq ca mangai haten hatia,[☆] git ca mangai tagit ca ìh.’ ⁴⁴ Mahaq Au doi ca pì: Thê loq waq ca mangai tagit ca pì, wa waiq khàn am ca mangai ma ti rùp pì beq, ⁴⁵ ðòiq pì jah broq con caiq Baq pì ma ỏi ta plinh, ma jah 'màng aih Haq jah broq mat mahì tồc ðòiq xreo mangai dù wa mangai lem, broq mè am ca mangai ta-atoq wa ca mangai ngang dù. ⁴⁶ Tàng pì loq waq

[☆] 5:38 5:38 LEA 21:23; Lêwì 24:20; RAH 19:21. [☆] 5:43 5:43 Lêwì 19:18.

toq ca mangai loq waq ca pì, èh pì jah biac baha cleq? 'Bàì mangai gop thèq, ma ùh loq broq 'màng aih 'mòh? ⁴⁷Tàng pì loq waq dèh toq oh daq, i crài leq, mangai ma ùh tiaq Chuaq ma ùh loq broq 'màng aih 'mòh? ⁴⁸'Màng aih èh, pì ep lem rìm trong, tìah ca Baq pì òi ta Pình lem rìm trong.

6

Bìac Broq Lem

¹ “Wèq dèh manoh beq, apaq broq biac ta-atoq enh ngìa ca mangai waq ca wì hnoq. Tàng broq 'màng aih Baq pì òi ta pình ùh 'noh biac baha cleq.

² “'Màng cô, jò broq biac jùp òò, apaq hlôi ken enh ngìa ca phù cròng, tìah ca 'bài mangai bàu lem, manoh dù broq ta hnem tagop wa roc trong òòiq i mangai jah padèch wì. Joq 'nàng Au doi ca pì, 'bài mangai aih khoi jah dèh biac baha cla wì haq. ³ Mahaq jò ìh broq biac jùp òò tì pah 'ma broq, paq am tì pah 'ngeo loq, ⁴ òòiq biac ìh jùp òò jah hlèp. Baq ìh ta Pình hnoq ta nòi hlèp, Haq jah 'noh biac baha ca ìh.

Bìac Waiq Khàn

(Luc 11:2-4)

⁵ “Jò pì waiq khàn, apaq broq tìah ca 'bài mangai bàu lem, manoh dù, ma jah 'màng aih wì haq toq enh waiq khàn nòi hnem tagop wa ti 'mang ngo plài òòiq phù cròng hnoq wì haq. Joq 'nàng Au doi ca pì, 'bài mangai aih khoi jah dèh biac baha cla wì haq. ⁶ Mahaq jò ìh waiq khàn, thê ìh mùt ta adùq ìh ma òi dèh mòiq ngai, clenh 'mang, khoi èh waiq khàn. Baq ìh hnoq rìm biac khoi broq ta nòi hlèp, Haq jah 'noh biac baha ca ìh. ⁷ Cô, jò pì waiq khàn, apaq capoch lam capoch hlài bàc yàng 'màng ca wì mangai ùh i tiaq Chuaq, ma jah 'màng aih wì xoh dèh capoch bàc, aih jah tàng wì haq. ⁸ 'Màng aih, pì apaq tìah troi wì haq, ma

jah 'màng aih, adroi ca pì xìn, Baq pì khoi loq pì nhet bìac cleq.

⁹ “Màng aih, pì waiq khàn 'màng cô:

“Waiq Baq nhèn ỏi ta plình,
hiniq Baq jah padèch Hadròih.

¹⁰ Diac Baq jah trùh.

Manoh enh da Baq jah wìa
ỏi ta crống taneh tìah ca ỏi ta plình.

¹¹ Xìn am ca nhèn dahwèq caq panàc rìm hì.

¹² Xìn baxǒng tôiq lôi da nhèn,
tìah ca nhèn hadai baxǒng tôiq lôi wì ma broq tôiq ca
nhèn.

¹³ Xìn apaq 'mùt nhèn ỏi ta nòi padô 'nùt,
mahaq dèch dǒih nhèn khoi ca can kiac dù.

Taiq Diac, cwìang itai, wa can 'ngah 'ngai joq ỏi ta tì Baq
hloi hloi. Amen.’

¹⁴ “Ma jah 'màng aih tàng pì loq baxǒng tôiq ca mangai
broq lôi ca pì, Baq pì ỏi ta Plình hadai baxǒng tôiq lôi ca
pì. ¹⁵ Mahaq tàng pì ùh baxǒng tôiq ca wì, Baq pì ỏi ta
Plình hadai ùh baxǒng tôiq ca pì.

Bìac Rôn ca Acaq

¹⁶ “Jò pì rôn ca acaq, pì apaq i hadrò mango tìah ca 'bài
mangai bàu lem, manoh dù, ma jah 'màng aih wì haq to
broq dèh hadrò mango òiq con mangai loq ca wì haq rôn
ca acaq. Joq 'nàng Au doi ca pì, wì haq khoi jah dèh bìac
baha cla wì haq. ¹⁷ Mahaq jò ìh rôn ca acaq, ìh 'mùq mat,
xùt dầu ta gàu beq, ¹⁸ òiq wì ùh hìaq loq ca ìh rôn ca acaq,
mahaq toq Baq ìh hnoq ta nòi hlèp. Haq hnoq bìac ìh broq,
Haq jah 'noh bìac baha ca ìh.

*Cùng Hang Canaq 'Bac ta Diac Plình
(Luc 12:33-34)*

¹⁹ “Pì apaq don ðòiq cùng hang òi ta crõng taneh, aih nòi i 'mài damang, axiang broq raliang wa mangai atùng pùng panàt mùt yõc. ²⁰ Mahaq pì ep don ðòiq ðèh cùng hang òi ta plình, aih nòi ùh i ca 'mài damang, axiang broq raliang, hadai ùh i mangai atùng pùng panàt mùt yõc. ²¹ Ma jah 'màng aih cùng hang ìh òi jang leq, manoh ìh òi jang aih.”

Mat 'Nghah

(Luc 11:34-36)

²² “Mat, aih ðen chac hamac. Tàng mat ìh 'nghah, ðiq ca chac hamac ìh jah 'nghah. ²³ Mahaq tàng mat ìh ùh lem, èh ðiq ca chac hamac ìh ðiq jaq clam clòiq. 'Màng aih tàng can 'nghah ta chac ìh bu dàng can clam, èh can clam aih càn tam dàng leq hòml!

Bìac Lo Hèm

(Luc 12:22-31)

²⁴ “Ùh i ca mangai leq jah broq hapõng baiq ngai craq, ma jah 'màng aih haq git ca mangai cô, loq waq ca mangai tau, loq padèch mangai cô, khìn mangai tau. Pì ùh jah rai broq hapõng Boc Plình wa rai broq hapõng 'bac jèn hòml.

²⁵ “'Màng cô Au doi ca pì: Apaq taiq can rìh pì lèt ca dahwèq caq, hadai apaq taiq chac hamac pì lèt ca eo cwàn. Can rìh ma ùh yi nhet ca dahwèq caq 'mòh? Chac hamac ma ùh yi hnao ca dahwèq caxùnh 'mòh? ²⁶ Thê pì ngan 'bài chìm beq: Wì haq ùh rai, ùh gat, hadai ùh tah ðòiq ta hapom, mahaq Baq pì òi ta Diac Plình xõq ban wì haq. Pì ma ùh yi hnao ca 'bài chìm 'mòh? ²⁷ Ngan cô, i ca mangai leq òi ta pì taiq haq loq lo, haq broq 'nhòng haq jah rìh tam toq 'biaq ùh?

²⁸ “Phàn da eo cwàn, pì lèt hrìn broq cleq? Pì ngan riang tacreo hon ta ðùng 'màng leq beq. Haq ùh broq cleq, ùh

caxenh brai, ²⁹ mahaq Au doi ca pì: 'Nhac ca bùa Sa-lô-môn rahù dàng leq, xôq 'nhòq lah ca caxùnh eo lem tìah ca 'bài riang tacreo aih. ³⁰ Ô mangai 'biaq manoh lùì, nhat hon ta ùng, aih adrech hì cô rìh, hì da èh tah ta ralùng ùnh, mahaq Boc Plình xôq am haq caxùnh eo lem 'màng aih, ùh dùh dèh ca pì con caiq Haq. ³¹ 'Màng aih, pì apaq lèt, apaq doi: 'Cô èh, bèn caq cleq?' 'Ôq cleq?' 'Caxùnh cleq?' ³² Ma jah 'màng aih rìm biac aih mangai jàn 'noi q xôq loq chaq yôt. Baq pì ỏi ta Diac Plình khoi loq ca pì nhet rìm biac aih. ³³ Mahaq adroi dõng ãi q, phai chaq Diac Boc Plình wa can ta-atoq da Haq, èh Haq jah am tam ca pì rìm biac ma 'noi q hò m. ³⁴ 'Màng aih, apaq lèt biac hì da èh, ma jah 'màng aih biac hì da èh jah lèt ca hì da èh, biac xalep hì leq 'nang lem dèh ca hì aih.

7

Bìac Hadrah (Luc 6:37-38,41-42)

¹ "Pì apaq hadrah mangai 'noi q, ãoi q pì ùh hì aq chiùq biac hadrah. ² Ma jah 'màng aih pì hadrah wì 'noi q 'màng leq, èh wì hadai hadrah hlài pì 'màng aih. Pì tống am ca wì dàng leq, èh wì hadai tống hlài ca pì dàng aih ãi q.

³ "Gleq ìh ngan hnoq khenh ta mat oh ãa q ìh, mahaq ùh hnoq caxaih long ỏi ta mat cla ìh. ⁴ Gleq ìh hù a doi dèh ca oh ãa q: 'Đoi q au ãoi h ãa ìh khenh ta mat,' mahaq i caxaih long ỏi ta mat cla ìh? ⁵ Ô mangai bà u lem, manoh dù, adroi ãõng ìh ep yõc caxaih long loh khoi enh mat ìh beq, khoi èh ìh men xau hnoq ro ãoi h ãac khenh loh khoi enh mat oh ãa q ìh.

⁶ "Apaq am ca coq ngè hadròih. Apa q hwenh ngõc pì jang ngìa chù a, yùq wì haq joi q enh 'neq ca jèn h, èh wì haq wì h hlài cap hich cla pì.

*Ti Chaq**(Luc 11:9-13)*

⁷ “Xìn beq, èh jah. Chaq beq, èh hnoq. Clôq 'mang beq, jah pèh. ⁸ Ma jah 'màng aih, tàng mangai leq xìn, jah am ca haq. Mangai leq ti chaq, jah chaq hnoq. Mangai leq clôq 'mang, jah pèh am ca haq.

⁹ “Öi ta pì i ca mangai leq, jò con haq xìn 'benh, haq am dèh ca con hmu ùh? ¹⁰ Loq con haq xìn ca, haq am dèh ca con bìh ùh? ¹¹ 'Màng aih, pì mangai 'mèq xôq loq am dèh ca con bìac lem, ùh dùh dèh ca Baq pì öi ta plình ma ùh am bìac lem ca 'bài mangai leq xìn Haq 'mòh? ¹² Pì enh waq ca wì broq ca pì 'màng leq, pì hadai ep broq am ca wì 'màng aih. Aih Ranenh wa bàu anoi da Mangai Capoch Thai Boc Plình.

*'Mang Chit**(Luc 13:24)*

¹³ “Mùt 'mang chit beq, ma jah 'màng aih, 'mang rùng wa trong càn, 'ràng trùh nòi hù hnhung, mangai mùt ta aih bàc. ¹⁴ Mahaq 'mang chit wa trong 'yoh ma 'ràng trùh nòi can rìh, 'biaq mangai chaq jah nòi aih.

*Ngan Pli, hi Canao Loq Long**(Luc 6:43-44)*

¹⁵ “Ep ngan kenh 'bài mangai amòng capoch bàu loq adroi, aih 'bài mangai caxùnh eo trùu lam trùh ti pì, mahaq manoh wì tiàh ca coq brì loq tacap hich. ¹⁶ Pì hnoq plì, èh pì jah canao ca long. I ca mangai leq lah gich plì nho ta long hila, loq gich plì póc ta long hila cadê ùh? ¹⁷ 'Màng aih, tàng long leq lem, loh plì lem, mahaq long leq 'mèq loh plì 'mèq. ¹⁸ Long lem ùh jah loh plì 'mèq, long 'mèq ùh jah loh plì lem. ¹⁹ Tàng long leq ùh loh plì lem, ep coh bùh đac. ²⁰ 'Màng aih èh, pì hnoq plì wì haq, pì jah canao ca wì haq.

*Chuaq Loq Manoh Mangai**(Luc 13:25-27)*

²¹ “Ùh xài mangai leq hi doi ca Au: ‘Waiq Chuaq, waiq Chuaq,’ èh jah mùt dǝng Diac Plình ðòh, mahaq toq mangai ma broq tiaq manoh Baq òi ta Diac Plình raq. ²² Hì aih èh, i bàc mangai doi ca Au: ‘Waiq Chuaq, waiq Chuaq, nhèn ùh khoi lah canòm ca hiniq Chuaq capoch bàu loq adroi; canòm ca hiniq Chuaq hnan ðac can kiác; loq canòm ca hiniq Chuaq broq bàc biác halac ‘mòh?’ ²³ Jò aih èh, Au jah doi ca wì haq ro rang: ‘Ô pì mangai broq biác ngang dù, Au ùh ‘nì ca pì, lùì khoi ca Au beq.’

*Phai Broq Tiaq Bàu Boc Plình**(Luc 6:47-49)*

²⁴ “ ‘Màng aih, mangai leq tàng wa broq tiaq bàu Au doi cô, Haq tìah ca mangai khôn rabiaq broq hnem enh crǝng hmu càn. ²⁵ ‘Nhac ca i mè ðêh, diac làn, bahùt tep, hnem aih ùh tacro, ma jah ‘màng aih, khoi broq cajap enh crǝng hmu. ²⁶ Mangai leq tàng bàu Au doi cô, mahaq haq ùh broq tiaq, haq tìah ca mangai blùng broq hnem ta braih. ²⁷ I mè ðêh, diac làn, bahùt tep, hnem aih tacro raliang dǝng ðìq.”

²⁸ Jò Chuaq Jêxu hnài wì bàu aih bu hêq, mangai jàn tamàng bàu Haq, wì ðìq hamàih, ²⁹ ma jah ‘màng aih Haq hnài i cwìang itai càn, ùh troi ‘bài thài ranenh.

8

*Chuaq Broq Brêh Mangai Bacùn**(Mǝc 1:40-45; Luc 5:12-16)*

¹ Jò Chuaq Jêxu loh enh bôì wang, i mangai jàn bàc tiaq Haq. ² Wop jò aih i mòiq ngai bacùn thia haten waiq Haq, rai doi: “Waiq Chuaq, tàng lem manoh ìh, xìn ìh broq au jah brêh.”

³ Chuaq Jêxu hnhu tì bèq haq, rai doi: “Au lem manoh, brêh beq.” Tajòi 'mòi mangai aih jah brêh. ⁴ Chuaq Jêxu doi ca haq: “Wèq oq, apaq doi ca mangai 'noi q loq, mahaq ìh phai lam patô dadeh ca 'bài pajàu càn, èh am tadreo tiaq Ranenh Môise hnài, òòi q wì hnoq Boc Plình khoi broq brêh ca ìh.”

Broq Brêh ca Hapõng Đòiq Truàng
(Luc 7:1-10)

⁵ Jò Chuaq Jêxu mùt ta phòq Ca-bê-na-um, i mòiq ngai òòi q truàng trùh xìn Haq, ⁶ doi: “Chuaq ôi, hapõng au ùh hróc pen. Haq cùi òi ta hnem au. Haq jìq xa òi q jaq.”

⁷ Chuaq Jêxu doi: “Au lam trùh broq brêh ca haq.”

⁸ Đòiq truàng padreo bàu doi: “Waiq Chuaq, hnem au ùh tajì ca 'mùt Chuaq mùt. Xìn Chuaq toq doi mòiq bàu raq, hapõng au jah brêh. ⁹ Ma jah 'màng aih, au òi enh 'neq ca cwàng mangai 'noi q. Au hadai i lình enh 'neq ca au hòm. Au thê mangai cô: ‘Lam beq,’ haq lam; thê mangai tau: ‘Trùh beq,’ haq trùh; wa au thê dèh hapõng: ‘Broq biac cô beq,’ haq broq.”

¹⁰ Jò Chuaq Jêxu tàng bàu aih, Haq hamài h ta manoh, doi ca 'bài mangai ma lam tiaq Haq: “Jòq 'nàng Au doi ca pì òi ta Is-ra-ên, Au 'nhòq lah hnoq mangai leq i manoh lùì 'màng cô. ¹¹ Au doi ca pì, cô èh jah i bàc ngai loh enh Diac pah mat mahì loh wa enh Diac pah mat mahì mùt, lam trùh, ha'ngui caq pajùm ti Ap-ra-ham, Isac wa Jacòp ta Diac Plình. ¹² Mahaq 'bài mangai Yothaiq ma jah creo con jàn Diac Plình, Haq jah hwenh đac enh gùng nòi clam clòiq; ta aih i toq bàu crò hmoi wa cadrit hanenh.”

¹³ Chuaq Jêxu doi ca òòi q truàng: “Hlài beq, tiaq troi biac ìh lùì, ìh jah 'màng aih.” Tajòi 'mòi jò aih, hapõng da òòi q truàng òi ta hnem jah brêh.

*Chuaq Jêxu Broq Brêh ca Bàc Ngai 'Noiq**(Mõc 1:29-34; Luc 4:38-41)*

¹⁴ Jò Chuaq Jêxu mùt ta hnem Pêtrô, hnoq miq mai Pêtrô ùh hrõc tacat cùi ta jùang. ¹⁵ Chuaq Jêxu hnhu tì bèq mangai ùh hrõc, tajòì 'mòi can tacat hnhung hloi, khoi èh haq yòng patìh ca Chuaq Jêxu.

¹⁶ Trùh chùi, wì 'ràng ca Chuaq Jêxu bàc ngai i kiac òi ta chac. Mòiq nà bàu capoch Chuaq Jêxu khoi jah hnan đac kiac dù, èh hadai broq brêh òiq ca mangai hinìq. ¹⁷ 'Màng aih, òòiq troq troi bàu Êsai, mangai capoch thai Boc Plình, khoi doi:

“Haq khoi yõc can ùh hrõc bèn,
genh can hinìq bèn.”✠

*Ep Broq 'Màng Leq Tiaq Chuaq**(Luc 9:57-62)*

¹⁸ Khoi èh, jò Chuaq Jêxu hnoq bàc mangai jàn òi wawenh ca Haq, Haq thê dèh mangai hõc tiaq chùng bong tõi pah tau. ¹⁹ I mòiq ngai thài ranenh thia trùh doi ca Chuaq Jêxu: “Thài ôi, ìh lam ta leq, au lam tiaq ta aih.”

²⁰ Chuaq Jêxu padreo bàu doi: “Chôn i còp, chìm i pù, mahaq Con Mangai ùh i ca nòi angèn gàu.”

²¹ I mòiq ngai hõc tiaq 'noiq hòm lam trùh doi ca Haq: “Chuaq ôi, xìn ìh am au hlài catùh dèh baq hòiq, khoi èh au lam tiaq ìh.”

²² Mahaq Chuaq Jêxu doi: “Lam tiaq Au beq, òòiq mangai cachìt catùh mangai cachìt da wì.”

*Bahùt 'Ne Diac Raxìq**(Mõc 4:35-41; Luc 8:22-25)*

²³ Atìq ca aih, Chuaq Jêxu tõi ta bong. 'Bài mangai hõc tiaq, tiaq Haq. ²⁴ Ta'ngac i bahùt càn hlôi dèh, diac lai laq glàm bong, mahaq Chuaq Jêxu òi cùi. ²⁵ 'Bài mangai

✠ 8:17 8:17 Êsai 53:4.

hốc tiaq thia haten, padriù Haq. Wì doi: “Waiq Chuaq, xìn dèch nhèn òi! Nhèn cachit manàiq raq!”

²⁶ Haq doi: “Ô 'bài mangai 'biaq manoh lùì, gleq pì ma crè?” Haq yòng, lech ca cayeo wa diac raxìq. Tajòì 'mòi diac raxìq haten, pi lai laq.

²⁷ 'Bài mangai aih hamàih, wì doi: “Mangai cô Cabô? Gleq cayeo wa diac raxìq òi iu bàu Haq?”

Broq Brêh ca Mangai i Kiac

(Mốc 5:1-20; Luc 8:26-39)

²⁸ Jò Chuaq Jêxu khoi tồc 'bò diac pah tau, ta gùng Ga-đa-ra, Haq glàm wa baiq ngai i can kiac òi ta chac. Wa loh enh cadràng hanang hnoq ramòt òi jaq, ùh i ca mangai leq hùa lam cwa trong aih. ²⁹ Wa cachech bàu dèh doi: “Waiq Con Boc Plình, au wa ìh i biac cleq? I joq ìh trùh ta cô òi baxa ma adroi ca jò pajaq 'mòh?”

³⁰ Wop jò aih, i mòi calùh chùà 'nang acaq òi hangai ca wì haq toq 'biaq. ³¹ 'Bài can kiac xìn Chuaq Jêxu, wì haq doi: “Tàng ìh nnan nhèn loh, xìn ìh am nhèn mùt ta calùh chùà tau.”

³² Haq thê 'bài can kiac aih: “Lam beq!” 'Bài can kiac loh khoi enh wa baiq ngai, mùt đống ta 'bài chùà. Tajòì 'mòi calùh chùà aih cadàu enh bôì criang hadrùc ta diac raxìq. Òiq cram đống ta diac. ³³ 'Bài mangai ban chùà cadàu hlài ta plài anoi hlài biac ma khoi loh, wa biac mangai i kiac òi ta chac. ³⁴ Òi ca plài wì loh chaq Chuaq Jêxu. Bu hnoq Haq, wì thê Haq loh khoi ca gùng wì haq.

9

Chuaq Broq Brêh Mangai Pen

(Mốc 2:1-12; Luc 5:17-26)

¹ Chuaq Jêxu tồc ta bong cwa diac raxìq hlài dèh ta phôq. ² I wì 'ràng ca Haq mòi q ngai mangai pen cùi ta

jùang. Chuaq Jêxu hnoq manoh lùì 'bài mangai aih. Haq doi ca mangai pen: “Ô con, lem bùì beq, tôiq lôì con khi jah baxông.”

³ Jò aih, i toq 'biaq 'bài thài ranenh hèm ta manoh: “Mangai cô capoch bàu 'mèq ùng Boc Plình!”

⁴ Mahaq Chuaq Jêxu loq ca manoh 'bài thài aih, Haq doi: “Gleq pì ma jah hèm bìac 'mèq òi ta manoh? ⁵ Trom baiq nà bàu capoch: Mòiq nà doi: ‘Tôiq lôì ìh khi jah baxông,’ mòi q nà doi: ‘Ìh yòng lam beq,’ nà leq ma yi xùang ca capoch? ⁶ Cô èh, ðòiq pì loq Con Mangai jò Haq òi ta crông taneh, xôq i cwiang baxông tôiq lôì.” Khi èh, Haq doi ca mangai pen: “Yòng lam beq, xùì dradrah ahlài ta hnem ìh.” ⁷ Tajòì 'mòi mangai pen yòng hlài ðèh ta hnem. ⁸ Mangai jàn hnoq cwiang halac aih, mangai leq ji yùq crè, wa manè Boc Plình khi am ca con mangai cwiang itai 'màng aih.

Chuaq Creo ca Mathêu

(Mổc 2:13-17; Luc 5:27-32)

⁹ Jò Chuaq Jêxu loh khi enh hnem aih, Haq hnoq mòiq ngai 'nang ha'ngui gop thèq ta hnem thèq, hiniq haq Mathêu. Chuaq Jêxu doi ca haq: “Lam tiaq Au beq!” Haq padinh yòng lam tiaq Chuaq Jêxu.

¹⁰ Atiq ca aih, jò Chuaq Jêxu ha'ngui acaq ta hnem Mathêu, i 'bài mangai gop thèq wa mangai i tôiq, ha'ngui acaq ti Haq wa mangai hỏc tiaq Haq. ¹¹ Bài mangai Pha-rì-sì hnoq 'màng aih. Wì doi ca mangai hỏc tiaq Haq: “Gleq Thài pì ma ha'ngui acaq pajùm ti 'bài mangai gop thèq wa 'bài mangai i tôiq aih?”

¹² Chuaq Jêxu tàng bàu aih, Haq doi: “Ùh xài mangai tadèh ma nhet ca 'bacsi sì, mahaq mangai ùh hrỏc ma nhet ca 'bacsi sì. ¹³ Lam beq, phai hỏc loq bàu cô enh doi cleq:

'Au enh can xa-öch, mahaq ùh enh ngè tadreo.'[☆] Ma jah 'màng aih, Au trùh ta cô ùh xài ðoìq creó ca mangai ta-atoq, mahaq creó ca wì ma i tòi-q."

¹⁴ Jò aih, i 'bài mangai hóc tiaq da Jon lam trùh chaq Chuaq Jêxu, wì bòch: "Nhèn wa 'bài mangai Pha-ri-si, rôn ca acaq, gleq 'bài mangai hóc tiaq ìh ùh rôn ca acaq?"

¹⁵ Chuaq Jêxu padreo bàu doi: "Jò con ỡng òi caq hiniang lem bùi pajùm dèh ti 'bài bua, 'bài bua haq ùh loq mango. Mahaq trùh hì wì 'nong đac con ỡng hangai ca wì haq hì aih èh, wì men rôn ca acaq.

¹⁶ "Ùh i ca cabô ma lah clep ha'nech bai neo 'mùt ta eo dùnh. Tàng broq 'màng aih, ha'nech bai neo dùnh đac eo dùnh, èh trong hyah rai èh rai rùng hòm. ¹⁷ Ji ùh i cabô ma lah ùc alac nho neo ta 'bao akia dùnh, tàng broq 'màng aih 'bao akia aih padah, alac nho loh đống, 'bao hadai om, mahaq tàng cabô ùc alac nho neo ta 'bao neo, jah wèq đống ðìq baiq."

*Con Cadri Jairu Cachit wa Gu Cadri Ùh Hroc
(Mốc 5:21-43; Luc 8:40-56)*

¹⁸ Jò Chuaq Jêxu òi anoi ca wì biac aih, i mòiq ngai, mangai wèq hnem tagop cadiang mùt hacùn cràng jang ngià Haq rai doi: "Con cadri au neo cachit, xìn Chuaq trùh ðoìq tì ti chac haq, haq jah rìh." ¹⁹ Chuaq Jêxu padinh yòng lam ti mangai aih. Mangai hóc tiaq lam tiaq.

²⁰ Jò aih i mòiq ngai gu cadri ùh hroc loh mahem khoi 12 hanam, thia haten enh cloh, bèq ha'mai eo Chuaq Jêxu.

²¹ Ma jah 'màng aih haq hèm: "Tàng au jah bèq ha'mai eo Chuaq Jêxu au jah brêh."

²² Chuaq Jêxu hwi ngan, hnoq mangai cadri, Haq doi: "Ô con, lem bùi beq, manoh lùì da con khoi broq am ca

[☆] 9:13 9:13 Ôsê 6:6.

con jah brêh.” Tajòi 'mòi jò aih, mangai cadrì aih jah brêh ca ùh hröc.

²³ Jò Chuaq Jêxu trùh ta hnem mangai wèq hnem tagop, hnoq wì hlôi taliaq wa 'bài mangai hmoi tagràng tagràt, ²⁴ Haq doi: “Pì loh dõng enh gùng beq! Mangai cadrì 'yoh cô ùh xài haq cachìt, mahaq haq cùi.” Tàng bàu aih wì lê Haq. ²⁵ Jò khoi thê wì loh enh gùng òiq dõng, Haq mùt ta hnem rùp tì mangai 'yoh cadrì. Tajòi 'mòi mangai 'yoh cadrì aih yòng. ²⁶ Wì anoi bìac aih jàp ta gùng aih.

Chuaq Broq Brêh Baiq Ngai ùh Xau

²⁷ Jò Chuaq Jêxu loh lam enh nòi aih, i baiq ngai ùh xau mat, tiaq haq rai creo: “Ô con xau Đawit, xìn xa-öch ca ma òiq.”

²⁸ Jò Haq khoi mùt ta hnem, baiq ngai, mangai ùh xau mat lam trùh. Haq bòch wa: “Chôp lùì Au broq jah bìac chôp enh 'mòh?”

Wa tèo: “Waiq Chuaq, ma lùì.”

²⁹ Haq bèq mat wa, rai doi: “Tiaq troi manoh chôp lùì, khoi jah 'màng aih.” ³⁰ Mat wa baiq ngai tajòi 'mòi jah xau hnoq. Chuaq Jêxu gràm padràng pa'yèp wa: “Wèq oq, apaq am cabô loq bìac cô.” ³¹ Mahaq jò wa baiq ngai loh khoi enh hnem, wa am òiq ca wì jàp ta gùng aih loq ca bìac Chuaq khoi broq.

³² Jò lam khoi ca nòi aih, i wì 'ràng ca Haq mòiq ngai, mangai làu i kiac òi ti chac. ³³ Haq hnan đac can kiac, khoi èh mangai làu jah capoch. Mangai jàn hamàih, wì doi: “'Nhòq lah hnoq bìac halac 'màng cô òi ta Is-ra-ên!”

³⁴ Mahaq mangai Pha-ri-si doi: “Mangai cô canòm ca bùa can kiac hnan đac can kiac.”

³⁵ Chuaq Jêxu lam jàp ta 'bài phôq wa plài, hnài Bàu Lem Diac Boc Pình ta 'bài hnem tagop, wa broq brêh rìm ngai ùh hröc. ³⁶ Jò Haq hnoq mangai jàn bàc, Haq xa-öch ca

wì, ma jah 'màng aih wì xalep, pac lac tìah ca trùu ùh i ca mangai ban. ³⁷ Haq doi ca 'bài mangai hõc tiaq: “ 'Mau bacc, mahaq mangai gat toq 'biaq. ³⁸ 'Màng aih ep xìn Chuaq da jò gat, thê tam mangai gat lam gat 'mau Haq.”

10

Chuaq Ràih Mòiq Jàt Ngai Hõc Tiaq

(Mõc 3:13-19; Luc 6:12-16)

¹ Chuaq Jêxu creò dèh ca 12 ngai hõc tiaq trùh, am ca wì cwàng itai hnan đac can kiac wa broq brêh rìm hinìq.

² Hiniq sùq đò Haq 12 ngai: Adroi baxèm, aih Simôn, wì hadai creò haq Pêtrô, wa Anrê oh haq, Jacò con Xê-bê-đê, wa Jon oh haq. ³ Philip wa 'Ba-thê-lê-mi, Thôma wa Mathêu, mangai gop thêq, Jacò con Aphê wa Thadê.

⁴ Simôn mangai Ca-na-an, wa Juđa Ich-ca-ri-ôt, mangai blòq Chuaq.

Mòiq Jàt Baiq Ngai Lam Anoi Hnài

(Mõc 6:7-13; Luc 9:1-6)

⁵ Chuaq Jêxu thê wì 12 ngai sùq đò loh lam, Haq doi: “Pì paq lam trùh ti mangai jàn 'noi, hadai paq mùt ta phòq mangai Sa-ma-ri. ⁶ Mahaq lam chaq 'bài con trùu Is-ra-ên khoi lac trong. ⁷ Jò pì lam, doi ca wì 'màng cô: ‘Diac Plinh trùh khoi haten.’ ⁸ Pì broq brêh ca mangai ùh hrõc, broq mangai cachit jah rìh hlài, broq mangai bacùn jah brêh, wa hnan đac can kiac. Pì khoi jah nhàn dech, hadai ep am dech.

⁹ “Apaq wê wang, 'bac, loq 'bac jèn ti caxi ca 'nam pì. ¹⁰ Lam ti trong, hadai paq wê 'bao, loq eo baiq blah, jai loq long canhra. Ma jah 'màng aih, pì broq biac đàng ca wì am ca pì dahwèq caq. ¹¹ Jò pì mùt ta phòq loq plài, ep bòch ngan hnem leq ma taji ca đìh yõc pì, èh òi hloi hnem haq trùh jò pì loh lam. ¹² Jò pì mùt hnem leq, ep waiq khàn xìn

am can catèm ca hnem aih. ¹³ Tàng hnem aih tajì ca jah, èh can catèm pì loh òi ti hnem aih. Tàng ùh, èh can catèm pì, jah òi hlài da cla pì. ¹⁴ Tàng ma leq ùh ðìh yóc pì, ùh tamàng bàu pì, jò pì loh khi enh hnem aih, loq phòq aih, pì ep hapùih hreo blo ma top ta jènh pì. ¹⁵ Joq 'nàng au doi ca pì, trùh hì hadrah, gùng Sôđôm wa gùng Gô-mô-ra jah chiùq baxa yi 'biaq ca phòq aih.

Bìac Ti Rùp Atiq Cô Èh

(Mỗc 13:9-13; Luc 21:12-17)

¹⁶ “Au the pì loh lam tìah ca trìu mùt ta 'ne cadrong coq brì. 'Màng aih, pì ep rabiaq tìah ca bìh, habùat tìah ca chìm trù. ¹⁷ Ep wèq dađeh, ma jah 'màng aih, wì jah rùp 'ràng pì enh ngìa ca wì mangai tình hiniq. Wì blai pì ta hnem tagop. ¹⁸ Taiq pì tiaq Au wì ma jah 'ràng pì enh ngìa ca 'bài cwan, 'bài bùa, ðòiq pì anoi bìac Diac Plình ca wì haq wa ca mangai jàn 'noi. ¹⁹ Mahaq jò wì rùp pì, pì apaq hèm ep capoch 'màng leq, anoi 'màng leq, ma jah 'màng aih bàu leq ðang ca anoi jah patô 'mòì ca pì jò aih. ²⁰ Aih ùh xài cla pì capoch ðeh, mahaq Yiang Hadròih da Baq pì jah mùt ta manoh pì capoch 'noh.

²¹ “Daq blòq oh waq ca jêh ðac. Baq blòq con waq ca jah jêh ðac. Con caiq tajraq hlài ðeh ca miq baq waq ca jah jêh ðac ca cachìt. ²² Wì rìm ngai tagit ca pì taiq pì tiaq Au, mahaq mangai leq cajap manoh trùh jò lùch, èh haq jah ðeh. ²³ Jò leq wì ti rùp pì ta phòq cô, èh phai mot cwa phòq tau, ma jah 'màng aih, Au doi ca pì bàu joq 'nàng, pì lam 'nhòq jàp ta 'bài phòq mangai Is-ra-ên adroi Con Mangai trùh.

²⁴ “Mangai hóc tiaq ùh jah yi hnao ca thài, hapõng ùh yi hnao ca cla craq. ²⁵ Mangai hóc tiaq jah troi thài, hapõng jah troi cla craq, aih khi lem. Tàng wì khi creo ca craq

hnem aih can kiac 'Bê-ên-xê-bun, èh wì creò ca con caiq
Haq dàng leq!

Khòh Yùq Crè Cabô?

(Luc 12:2-7)

²⁶ “ 'Màng aih, pì apaq crè ca wì, ma jah 'màng aih ùh i ca bìac cleq cadoc ma ùh jah pa'noh loh, ji ùh i ca bìac leq jrùq ta manoh atìq èh ma ùh jah loq. ²⁷ Taiq 'màng aih, bàu Au doi ca pì ta nòi clam clóiq, ep anoi ro ta nòi 'ngah. Bàu pì tàng jang don, anoi 'noh ti của hnem beq. ²⁸ Apaq crè ca mangai jah jêh đac toq chac hamac ma ùh jah jêh đac mahua yiang. Mahaq pì phai crè ca Haq ma jah broq hnhung mahua yiang wa chac hamac ta 'bau ùnh. ²⁹ Baiq toq chìm xê tech jah mòiq hliac 'bac joq ùh? Mahaq tàng Baq pì ùh thê, èh ùh i mòiq toq con leq jah taclìh ta taneh. ³⁰ Điq ca hadrang xác ta gàu pì, Haq ji khoi jah rên đống. ³¹ 'Màng aih, pì apaq crè, ma jah 'màng aih, pì yi canaq yi hnao ca chìm xê.”

Anoi 'Noh Hiniq Chuaq Jêxu

(Luc 12:8-9,15-53; 14:26-27)

³² “Taiq 'màng aih, mangai leq pa'noh hiniq Au jang ngĩa phù cròng, èh Au ji pa'noh hiniq haq jang ngĩa Baq Au ỏi ta plình. ³³ Mahaq mangai leq hangah ùh 'nì ca Au jang ngĩa phù cròng, Au hadai hangah ùh 'nì ca haq jang ngĩa Baq Au ỏi ta plình.

³⁴ “Apaq xoh Au trùh òiòiq am can catèm ca crống taneh. Au trùh ùh xài 'ràng can catèm mahaq 'ràng pla chang gùm. ³⁵ Au trùh òiòiq

“lah con calô tajraq dèh ca baq haq,
lah con cadrì tajraq dèh ca miq haq,
lah con mai tajraq dèh ca miq ớng.

³⁶ Mangai ma tagit ca wì haq, aih mangai ta hnem cla wì haq. [☆]

³⁷ “Mangai leq loq waq dèh ca miq baq yi hnao ca haq loq waq ca Au, ùh tajì ca Au. Hadai 'màng aih, tàng mangai leq loq waq dèh ca con calô, con cadrì yi hnao ca Au, hadai ùh tajì ca Au. ³⁸ Mangai leq ùh xùi dèh long pagat lam tiaq Au, ji ùh tajì ca Au. ³⁹ Mangai leq ham ca can rih 'nhòng cô, èh jah hnhung, mangai cađac dèh can rih 'nhòng cô taiq haq tiaq Au, haq jah chaq hnoq hlài.

⁴⁰ “Mangai leq đìh yốc pì, aih đìh yốc Au, mangai đìh yốc Au, aih đìh yốc Haq ma khoi thê Au trùh ta cô. ⁴¹ Mangai leq đìh yốc mòi q ngai, mangai capoch thai Boc Plình, taiq haq broq mangai capoch thai Boc Plình, haq jah nhàn yốc biac baha tiah ca mangai capoch thai Boc Plình. Mangai leq đìh yốc mòi q ngai, mangai ta-atoq taiq haq mangai ta-atoq, èh haq hadai jah nhàn yốc biac baha troi mangai ta-atoq. ⁴² Mangai leq am ca mòi q ngai òi ta 'bài mangai 'yoh cô, ôq mòi q doi chrõng diac hangeo, taiq mangai 'yoh aih mangai hõc tiaq Au, joq 'nàng, Au doi ca pì, mangai aih ùh hnhung ca biac baha da haq.”

11

Jon 'Baptit òi ta Hnem Tù

¹ Jò Chuaq Jêxu khoi hnài wì 12 ngai hõc tiaq Haq đìq ca biac aih, Haq lam khoi ca nòi aih, hnài ta 'bài phòq da gùng wì haq.

² Jò Jon òi ta hnem tù tàng wì anoi hlài biac broq da Chuaq Jêxu Crich, Haq thê dèh mangai hõc tiaq lam bòch Chuaq Jêxu: ³ “Thài i joq Mangai nhèn ngèh gòm ùh, loq nhèn ep gòm Mangai 'noi q hòm?”

[☆] 10:36 10:36 Mica 7:6.

⁴ Chuaq Jêxu padreo bàu doi: “Pì hlài anoi hlài ca Jon loq, bìac pì khoi tàng, khoi hnoq. ⁵ Mangai ùh xau jah hnoq, mangai cwê jah lam, mangai bacùn jah brêh, mangai clich don jah tàng, mangai cachit jah rih hlài, mangai pa jah tamàng Bàu Lem Diac Boc Pình. ⁶ Xôq ramôt ca mangai leq ùh catõih cro ta manoh taiq Au.”

⁷ Jò mangai hõc tiaq Jon khoi hlài, Chuaq Jêxu men anoi hlài bìac Jon am ca mangai jàn tàng: “Pì khoi lam ngan ta òng hawit jah hnoq cleq? I joq lam ngan cayeo hlôi long blùm tadroq ùh? ⁸ Pì lam ngan cleq hòmh? I joq pì lam ngan mangai caxùnh eo rahù ùh? Tau, 'bài mangai caxùnh eo rahù õi ta hnem bùa. ⁹ Pì lam ngan cleq hòmh? I joq pì lam ngan mangai capoch thai Boc Pình ùh? Joq, Au doi ca pì: Haq yi hnao ca mangai capoch thai Boc Pình hòmh. ¹⁰ Taiq mangai aih raq i bàu achih:

“‘Cò, Au thê dèh hapõng lam adroi ca ìh
 òng padon trong am ca ìh.’☆

¹¹ “Jòq 'nàng, Au doi ca pì, òng ca mangai ma xa-õng loh enh chac mangai cadrì, ùh i ca mangai leq jah padèch yi hnao ca Jon 'Baptit, mahaq mangai ma 'yoh òng jaq ta Diac Pình, õi jah padèch yi hnao ca haq hòmh. ¹² Enh jò Jon 'Baptit baxèm anoi hnài trùh manàiq, i bàc mangai yõc manoh dèh nhang mùt ta Diac Pình, mahaq wì haq 'bìq mangai broq gàu enh tạt padràng taiq wì xôq enh wèq wì haq. ¹³ Ma jah 'màng aih òng ca bàu 'bài mangai capoch thai Boc Pình wa Sech Ranenh khoi anoi bìac aih enh adroi trùh 'nhòng da Jon. ¹⁴ Tàng pì enh 'nì enh loq, Jon, aih Êli, haq ma ep trùh. ¹⁵ Mangai leq i don tàng, tamàng beq.

¹⁶ “Au achua xinoi cò tìah ca cabô? Xinoi cò tìah ca wì 'yoh ha'ngui ta chòq, creò dèh ca bua. ¹⁷ Wì haq doi:

“‘Nhèn khoi hlôi taliaq,

☆ 11:10 11:10 Mal 3:1.

gleq pì ùh nhaiq muaq?
 Nhèn khoi ta-oih,
 gleq pì ùh hmoi?"

¹⁸ Ma jah 'màng aih Jon trùh, ùh caq, ùh ôq, èh wì doi: 'Jon i kiac òi ta chac.' ¹⁹ Con Mangai trùh, caq, ôq, èh wì doi: 'Ngan tau, Mangai ham ca caq, ôq alac, broq bua ti 'bài mangai gop thèq wa mangai i tôiq lòi.' Mahaq can khôn rabiaq jah pa'noh loq nhò biac broq."

Con Jàn Ûh Lùi Taiq Cadoq Manoh

(Luc 10:13-15)

²⁰ Chuaq Jêxu trech wì ta 'bài phôq, nòi Haq khoi broq bacc biac halac, taiq wì ùh chiùq cađac dèh manoh broq tôiq. ²¹ "Nan xa ca gè phôq Cô-ra-xin! Nan xa ca gè phôq 'Bêt-sai-đa! Ma jah 'màng aih tàng biac halac ma khoi lah broq òi ti pì, khoi lah broq ta phôq Tirò wa Sidôn, wì aih joq 'nàng khoi dùnh nèh caxùnh eo briang, rai blo tanùh ta chac, wa cađac dèh manoh broq tôiq. ²² 'Màng cô Au doi ca pì: Trùh hì hadrah, phôq Tirò wa phôq Sidôn chiùq baxa yi 'biaq ca pì. ²³ Ô mangai Ca-bê-na-um, pì xoh dađeh ha'nhèq trùh plình, cô èh jah ca'nìh pì trùh ta nòi cachit baxa, ma jah 'màng aih, tàng biac halac ma khoi lah broq òi ta'ne pì, khoi lah broq ta phôq Sôđôm, phôq aih jah òi i trùh manàiq. ²⁴ 'Màng cô Au doi ca pì, trùh hì hadrah, gùng Sôđôm chiùq baxa yi 'biaq ca pì."

Phai Trùh ta Chuaq Jêxu Jah i Catèm

(Luc 10:21-22)

²⁵ Jò aih, Chuaq Jêxu doi: "Ôi Baq, Chuaq da plình crõng taneh, Au manè pôi Baq, ma jah 'màng aih Baq khoi cadoc biac cô ca mangai khôn rabiaq, mahaq đòiq pa'noh am ca con 'yoh loq. ²⁶ Baq ôi, joq 'nàng 'màng aih, ìh khoi hnoq biac aih lem manoh ìh.

²⁷ “Rìm bìac Baq Au khoi am ca Au. Enh gùng ca Baq, ùh i ca cabô loq ca Con. Enh gùng ca Con wa mangai leq Con ma enh pa'noh ca wì haq, hadai ùh i ca cabô loq ca Baq.

²⁸ “Ôi, òi ca pì ma lep tagah wa pòq trap, lam trùh ti Au beq, Au am ca pì jah padài. ²⁹ Au i manoh habùat wa ùh catèh. Pì bac long ech Au beq, hõc tiaq Au, èh mahua yiang pì jah padài. ³⁰ Ma jah 'màng aih long ech Au xùang wa aghen Au hèo.”

12

Prot 'mau

(Mõc 2:23-28; Luc 6:1-5)

¹ Jò aih, wop hì Sabat, Chuaq Jêxu lam ta òng i 'mau. 'Bàì mangai hõc tiaq pangot, èh wì prot 'mau caq. ² 'Bàì mangai Pha-ri-si hnoq mangai hõc tiaq broq 'màng aih. Wì doi ca Chuaq Jêxu: “Ngan tau, mangai hõc tiaq ìh broq bìac ùh khòh broq ta hì Sabat.”

³ Haq padreo bàu doi: “Pì 'nhòq òc bìac Đawit wa 'bài mangai lam tiaq haq khoi broq jò wì haq pangot 'mòh? ⁴ Aih, haq mùt ta hnem cùh waiq da Boc Plình, caq 'benh ma padon òi q ta ca 'bõng tadreo, aih 'benh haq wa mangai lam tiaq haq ùh khòh caq, toq 'bài pajàu khòh caq. ⁵ Pì ùh lah òc Sech Ranenh 'mòh? Hì Sabat, 'bài pajàu ùh tiaq Ranenh hì aih, mahaq wì haq xòq ùh i tòi q lòi cleq? ⁶ Mahaq Au doi ca pì, jang cô i Mangai yi càn ca Hnem Cùh Waiq. ⁷ Tàng pì loq ca hiniq bàu enh hnài cô: ‘Au enh waq manoh loq xa-òch ca mangai, ’[☆] yi hnao ca ngè tadreo, èh pì ùh ta'mòq tòi q mangai ma ùh i ca tòi q. ⁸ Ma jah 'màng aih Con Mangai hadai broq Chuaq hì Sabat.”

Chuaq Broq Brêh ca Mangai 'Yoh Tì

(Mõc 3:1-6; Luc 6:6-11)

[☆] 12:7 12:7 Ôsê 6:6.

⁹ Chuaq Jêxu loh khoi ca nôi aih, Haq mùt ta hnem tagop. ¹⁰ Ôi ta hnem tagop aih i mòi q ngai 'yoh tì mòi q apah. I mangai bòch Haq: “Ta hì Sabat, khòh broq brêh mangai ùh?” Taiq wì enh chaq trong kìa n Haq.

¹¹ Haq doi ca wì: “Ôi ta pì i mangai leq i mòi q toq trùu. Hì Sabat, trùu haq clih ta ralùng jrùq, haq ma ùh dèch atốc dèh trùu 'mòh? ¹² Mòi q ngai canaq yi hnao ca trùu, joq ùh? 'Màng aih, ta hì Sabat jah broq biac lem.”

¹³ Khoi èh, Haq doi ca mangai 'yoh tì: “Hnhu tì beq!” Mangai aih hnhu tì, èh tì haq pah cô jah brêh tìa h ca tì pah tau. ¹⁴ 'Bà i mangai Pha-ri-si loh enh gùng, tình ca dabau, chaq trong jêh đac Haq.

¹⁵ Mahaq Chuaq Jêxu loq biac aih, èh Haq lam đac khoi nôi aih. I bacc ngai lam tiaq, wa Haq broq brêh đong ca wì.

¹⁶ Haq thê wì paq doi ca mangai 'noi q loq ca Haq. ¹⁷ Đòi q troq troi bàu Êsai mangai capoch thai Boc Plình khoi doi:

¹⁸ “Cô, Hapống Au khoi rài h,

Mangai Au đì q jaq loq waq, lem ca manoh Au rì m trong.

Au am Yiang Hadròih òi ti Haq,

Haq jah hnài biac ta-atoq am ca mangai jàn 'noi q.

¹⁹ Haq ùh tarahen, ùh cachech bàu dèh,

hadai ùh i cabô tàng bàu Haq ti trong cai q.

²⁰ Haq ùh goh long blùm khoi ten tagoh,

ùh pù pat đen jrình jò khoi ten lùch,

trùh jò Haq broq biac ta-atoq jah 'blê q.

²¹ Mangai jàn 'noi q jah gòm canòm ca hini q Haq.” ☆

Chuaq Jêxu wa Kiac 'Bê-ên-xê-bun

(Mốc 3:20-30; Luc 11:14-23)

²² Khoi èh wì 'ràng ca Chuaq Jêxu mòi q ngai, mangai i kiac òi ta chac. Haq ùh xau mat wa ùh jah capoch. Chuaq

☆ 12:21 12:21 Êsai 42:1-4.

Jêxu broq brêh ca haq, èh haq jah capoch wa jah hnoq.
²³ Wì hamàih, bòch dabau: “I joq Mangai cô, Haq Con Xau Đawit ùh?”

²⁴ Mahaq 'bài mangai Pha-ri-si tàng biac aih, wì doi: “Mangai cô canòm ca 'Bê-ên-xê-bun bùa can kiac, Haq hnan đac can kiac.”

²⁵ Chuaq Jêxu loq ca manoh wì hèm, Haq doi: “Tàng mòiq Diac talah ca dabau, Diac aih jah raliang. Mòiq phôq loq mòiq hnem talah ca dabau ji ùh jah yòng cajap. ²⁶ Tàng kiac Satan hnan kiac Satan, haq talah dabau, broq 'màng leq Diac haq ma nui òi i 'mòh? ²⁷ Tàng Au canòm ca 'Bê-ên-xê-bun hnan đac kiac dù, èh con caiq pì canòm ca cabô hnan đac can kiac? 'Màng aih èh, mangai hõc tiaq pì hadrah cla pì raq. ²⁸ Mahaq tàng au canòm ca Yiang Hadròih Boc Plình hnan đac can kiac, 'màng aih èh joq 'nàng Diac Boc Plình khoi trùh òi ta pì.

²⁹ “I mangai leq mùt atùng ta hnem mangai i padren dêh, adroi đõng ma ùh càt cla haq 'mòh? Ep càt cla haq hòiq, men jah yõc da haq cùng hang ta hnem.

³⁰ “Mangai leq ùh òi ta Au, haq tajraq ca Au, mangai leq ùh broq biac gop ti Au, èh haq prai priang cađac. ³¹ 'Màng aih, au doi ca pì, rìm tôiq lôi wa bàu capoch 'mèq ðùng Boc Plình èh jah baxõng, mahaq bàu capoch 'mèq ðùng Yiang Hadròih ùh jah baxõng tôiq aih. ³² Tàng mangai leq capoch ha'nhèq tajraq ca Con Mangai, tôiq lôi haq òi jah baxõng, mahaq tàng mangai leq capoch ha'nhèq tajraq ca Yiang Hadròih, 'nhac ca 'nhòng cô loq 'nhòng ma atiq, xõq ùh jah baxõng tôiq ca haq.

³³ “Long lem loh plì lem, long 'mèq loh plì 'mèq, ma jah 'màng aih, ngan plì, èh loq ca long. ³⁴ Ô pì bìh plõng, mangai ngang dù, broq 'màng leq ma jah capoch bàu lem? Ma jah 'màng aih cacleq bình halùih ta manoh men capoch loh jang hacùng. ³⁵ Mangai lem taiq khoi i

manoh lem, jah hloh bàu lem, mahaq mangai dù, taiq khoi i manoh ngang dù, èh capoch bàu dù. ³⁶ Mahaq, Au doi ca pì: Trùh hì hadrah rìm ngai phai anoi 'noh dèh rìm bàu cla ma capoch ùh lem.

³⁷ “Tiaq bàu capoch jah doi haq mangai ta-atoq, hadai taiq bàu capoch jah ta'mòq cla haq.”

I Mangai Xìn Hnoq Teo Halac

(Môc 8:11–12; Luc 11:29–32)

³⁸ Wop jò aih i 'bài thài ranenh wa mangai Pha-ri-si bòch Chuaq Jêxu: “Thài ôi, nhèn enh hnoq ìh broq teo halac.”

³⁹ Haq padreo bàu doi: “Xinoi ngan dù ùh wèq dèh bàu, xìn teo halac, mahaq ùh jah am teo halac leq enh gùng ca teo halac Jôna, mangai capoch thai Boc Plinh. ⁴⁰ 'Màng ca Jôna ôi ta cliac ca càn piq hì piq mang, Con Mangai hadai ôi ta taneh piq hì piq mang. ⁴¹ Trùh hì hadrah, mangai ta phôq Ni-ni-we jah yòng ta'mòq tôiq ca xinoi cô, ma jah 'màng aih jò jàn aih khoi tàng bàu Jôna anoi hnài, wì cađac dèh manoh broq tôiq, mahaq ôi ta cô, i mòiқ Ngai càn yi hnao ca Jôna. ⁴² Trùh hì hadrah, mangai cadrì broq bùa Diac pah 'ma mat mahì loh yòng ta'mòq xinoi cô, ma jah 'màng aih haq trùh enh nòi ma lùch ca crống taneh, tamàng bàu khôn rabiaq da Sa-lô-môn, mahaq jang cô, i mòiқ Ngai càn yi hnao ca bùa Sa-lô-môn.

⁴³ “Jò can kiac loh khoi enh chac mangai, haq lam trùh ta nòi croh crenh chaq nòi padài, mahaq chaq ùh jah.

⁴⁴ Haq hèm ta manoh doi: ‘Manàiq cô au wih hlài hòm ta hnem au ma neo loh aih.’ Haq wih hlài hnoq hnem dech, hwit hreo, padon ðòiқ khoi tôm. ⁴⁵ Haq lam adrác tam tapèh toq kiac ma 'noiқ dù yi hnao ca haq hòm. Dìq mùt ôi ta hnem aih, khoi èh, chac hamac mangai aih atiq cô èh, hamoq yi hnao ca adroi. Xinoi cô hadai 'màng aih.”

Miq wa Oh Chuaq Jêxu
(Môc 3:31-35; Luc 8:19-21)

⁴⁶ Jò Chuaq Jêxu 'nang ôi capoch tùang ca mangai jàn, i miq wa oh Haq ôi yòng enh gùng, enh anoi ca Haq. ⁴⁷ I wì doi ca Haq: “Thài ôi! Miq wa 'bài oh ìh ôi enh gùng enh anoi ca ìh.”

⁴⁸ Haq padreo bàu doi: “Cabô miq Au? Cabô oh daq Au?”

⁴⁹ Haq hnhu tì patô 'bài mangai hóc tiaq rai doi: “Cô miq Au wa oh daq Au. ⁵⁰ Ma jah 'màng aih, tàng mangai leq ma broq tiaq manoh enh da Baq Au ôi ta plình, mangai aih oh daq Au wa miq Au.”

13

Chuaq Jêxu Anoi Hnài Xam Bàu Alìah
(Môc 4:1-20; Luc 8:4-15)

¹ Hadai trom hì aih Chuaq Jêxu loh khoi enh hnem, ha'ngui ti 'bò diac raxìq. ² 'Bài jàn tagop ôi dudan ca Haq bàc hrìn, trùh 'mòi Haq ep tồc ha'ngui ta bong. Mangai jàn yòng ti 'bò diac. ³ Haq hnài alìah ca wì bàc trong. Haq doi 'màng cô: “I mòiq ngai loh lam rai adrech. ⁴ Jò haq rai, mòiq 'nah clìh ti trong, chìm trùh caq òiq. ⁵ Mòiq 'nah clìh ta hmu raga, tajòì 'mòi haq hon, taiq i toq 'biaq taneh catùh ùh jrùq. ⁶ Mahaq jò mat mahì tồc, haq hõnh taiq ùh i ca riah, haq cachìt. ⁷ Mòiq 'nah clìh ôi ta nòi hila. Adrech plòh pajùm ti hila, broq ca adrech aih ùh jah càn. ⁸ Mòiq 'nah hòm clìh ta nòi taneh jàng, loh plì, mòiq pliang loh mòiq hrinh, mòiq pliang loh 60, mòiq pliang loh 30. ⁹ Mangai leq i don, tamàng beq.”

¹⁰ 'Bài mangai hóc tiaq thia haten jang Haq, wì bòch: “Gleq ìh ma yóc bàu alìah òìq hnài wì?”

¹¹ Haq doi: “Khoi am ca pì loq bàu halac halùai da Diac Plình, mahaq ùh am ca wì haq loq. ¹² Ma jah 'màng aih, mangai leq khoi i, jah am tam ca haq, wì haq jah i rah,

mahaq mangai leq ùh i, jah yǒc hlài biac haq khoi i. ¹³ Au capoch aliah ca wì haq:

“Taiq wì ngan mahaq ùh hnoq,
halang don mahaq ùh tàng.

¹⁴ 'Màng aih, jah troq troi bàu Êsai mangai capoch thai Boc Plình khoi doi biac wì haq:

‘Pì halang don tamàng, mahaq ùh 'nì tàng cleq,
yǒc mat ngan mahaq ùh hnoq cleq.

¹⁵ Taiq manoh jàn cô khoi cadoq cadang,

broq ca don wì haq loh ca trap,
mat wì haq khoi ca'nhip,

tàng mat blèch wì jah hnoq,
don wì jah tàng, manoh wì jah 'nì,
wì wìh hlài cađac dèh tòi q lòi,

au jah broq brêh ca wì.’[☆]

¹⁶ Mahaq xôq ramốt ca pì taiq mat jah hnoq wa don jah tàng. ¹⁷ Joq 'nàng, Au doi ca pì: I bacc mangai capoch thai Boc Plình, bacc mangai rìh ta-atoq ngèh ca enh hnoq biac pì hnoq, mahaq ùh jah hnoq; ngèh ca enh tàng biac pì tàng mahaq ùh jah tàng.

¹⁸ “ 'Màng cô, Au thê pì tamàng bàu aliah ca mangai rai adrech enh doi cleq: ¹⁹ Mangai leq ma tamàng Bàu Lem Diac Boc Plình, mahaq haq ùh 'nì tàng, èh kiac dù trùh atùng yǒc pliang adrech khoi rai ta manoh haq, aih mangai tìah ca pliang adrech clih ti trong. ²⁰ Adrech ma taclìh nòi hmu raga, aih aliah ca mangai khoi ca haq tàng Bàu Lem, tajòì 'mòi haq lem bùi nhàn yǒc, ²¹ mahaq adrech aih ùh hon riah ta manoh, haq rìh toq 'biaq hì raq, èh jò glàm biac nan xa, biac wì ti rùp, tajòì 'mòi haq cađac Chuaq. ²² Adrech taclìh nòi hila, aih aliah ca mangai tamàng Bàu Lem, mahaq haq hèm hrìn biac crống taneh

[☆] 13:15 13:15 Êsai 6:9,10.

cô. Haq ham ca padrǒng can, broq Bàu Lem loh ca ùh yòng càn, ùh loh plì. ²³ Mahaq, adrech ma clih nòi taneh jiang, aih aliah ca mangai tamàng Bàu Lem, èh 'nì loq ca bàu aih. Mangai aih jah loh plì, mòiq pliang loh mòiq hrinh, pliang 'noi^q 60, pliang 'noi^q hòm 30.”

²⁴ Chuaq Jêxu 'mon bàu aliah ma 'noi^q ca wì haq: “Diac Plinh tiah ca mangai rai adrech lem ta ùng cla, ²⁵ mahaq jò haq cùi, i mangai ma git ca haq lam trùh, rai nhat ta 'mau haq, khi èh loh lam. ²⁶ Mahaq trùh jò 'mau xròc, nhat hadai loh jò aih.

²⁷ “ 'Bàì hapǒng da craq ùng trùh doi ca Haq: ‘Ùh xài ìh rai adrech lem ta ùng ìh 'mòh? 'Màng aih nhat cô loh enh leq?’

²⁸ “Cla craq doi: ‘Aih mangai ma git ca au, haq khi broq bìac aih.’

“ 'Bàì hapǒng bòch: ‘ 'Màng aih ìh enh nhèn lam bùiq đac nhat aih ùh?’

²⁹ “Cla craq doi: ‘Ùh khòh, yùq jò pì bùiq nhat, loq troq bùiq đac 'mau òiq. ³⁰ Dòq haq, òòiq wa càn pajùm trùh jò gat, èh au jah tanap ca 'bài mangai gat: Lah òng òiq nhat, achauq crài èh bùh đac, mahaq 'ràng 'mau mì 'mùt òòiq ta hapom.’”

³¹ Haq 'mon bàu aliah ma 'noi^q hòm. Haq doi: “Diac Plinh tiah ca mòiq pliang clong habài, i mangai yǒc rai dèh ta ùng. ³² Pliang adrech aih yi 'yoh òng ca 'bài pliang adrech 'noi^q, mahaq jò haq khi hon, haq yi càn ca 'bài cachiq 'noi^q. Haq wìa long càn, mech wìa ca chìm broq pù ta hamenh haq.”

³³ Haq hadai ta'mon hòm bàu aliah ma 'noi^q doi: “Diac Plinh tiah ca blo broq cadroh, i mòiq ngai gu cadrì alôn blo ta piq cadap dác, trùh jò dác aih bôq òng.”

³⁴ Chuaq Jêxu yõc bàu àliah aih hnài mangai jàn. Rìm bìac hnài, Haq diq yõc bàu àliah hnài wì, ³⁵ òiđiq troq troi bàu mangai capoch thai Boc Plình khoi doi:

“Au yõc bàu àliah hnài wì,

anoi hlài ca wì bìac jrùq hlèp enh jò broq cõng taneh.”☆

³⁶ Khoi ca aih, Chuaq Jêxu thê wì hlài. Haq mùt ta hnem. Mangai hõc tiaq thia õi haten bòch Haq: “Thài õi, xin ìh doi ro ca nhèn bàu àliah nhat õi ta òùng.”

³⁷ Haq padreo bàu doi: “Mangai rai adrech lem, aih Con Mangai. ³⁸ Rùang, aih cõng taneh. Adrech lem, aih con caiq Diac Boc Plình. Nhat adròn, aih con caiq kiac dù.

³⁹ Haq ma rai adrech 'mèq, aih can kiac Satan. Jò gat, aih hì pulùch. Mangai gat, aih 'bình plình.

⁴⁰ “ 'Màng aih, nhat ma jah bùiq tah ta ùnh 'màng leq, hì pulùch hadai 'màng aih. ⁴¹ Con Mangai jah thê dèh 'bình plình Haq gop diq rìm ngai ma baxrùq broq catõih cro wa mangai ngang dù loh khoi ca Diac Haq. ⁴² Èh hwenh 'bài mangai aih mùt ta 'bau ùnh, aih nòi crò hmoi wa cadrit hanenh. ⁴³ Jò aih, 'bài mangai ta-atoq 'ngah ca-ah ca-iang tìah ca mat mahì ta Diac Baq cla wì. Cabô i don tàng, tamàng beq.

⁴⁴ “Diac Plình àliah tìah ca hang canaq 'bac catùh ta taneh. I mòiq ngai chaq hnoq hang aih, èh haq cadoc hlài. Haq lem bùi cadàu hlài tech òng dèh cùng hang rõt taneh òùng aih.

⁴⁵ “Diac Plình hadai tìah ca mòiq ngai, mangai padreo ngõc chaq ngõc lem. ⁴⁶ Jò khoi chaq hnoq pliang ngõc canaq 'bac, haq tech òng dèh cùng hang rõt pliang ngõc aih.

⁴⁷ “Diac Plình hadai tìah ca mangai tang hlàm ta diac raxìq, rùp rìm hiniq ca. ⁴⁸ Jò ca khoi hlech bình ta hlàm,

☆ 13:35 13:35 BCP 78:2.

èh wì haq dùng hlàm atóc ta 'bò, hi khi wì ha'ngui ràih ca lem tah ta rô, ca 'mèq tèm đac. ⁴⁹ Trùh hì pulùch hadai 'màng aih, 'bài 'bình plình jah trùh lah mangai ngang dù wa mangai rìh ta-atoq loh crài ca dabau, ⁵⁰ hwenh 'bài mangai dù mùt 'bau ùnh; ối ta aih toq crò hmoi wa cadrit hanenh.

⁵¹ “Pì loq tàng biac aih ùh?”

'Bài mangai hóc tiaq padreo bàu doi: “Loq tàng.”

⁵² Haq doi: “Tàiq biac aih, rìm ngai thài ranenh khi hóc biac Diac Plình, èh haq tìah ca mòiq ngai, mangai craq hnem tau, 'noh dèh cùng hang dùnh wa cùng hang neo loh enh hnem.”

Chuaq Jêxu Hlài ta Na-xa-ret

(Mốc 6:1-6; Luc 4:16-30)

⁵³ Khi ca Chuaq Jêxu hnài bàu aliah aih, Haq lam khi ca nòi aih. ⁵⁴ Haq hlài trùh dèh ta gùng, hnài wì ta hnem tagop. Mangai leq tàng ji hamàih, wì bòch dabau: “Mangai cô 'nì Haq jah can khôn rabiaq wa cwìang itai cô enh leq? ⁵⁵ Cô ajoq Con Calô da mangai broq thòq long 'mòh? Miq Haq Mari, wì oh Haq Jacò, Jôsep, Simôn, Juda ajoq? ⁵⁶ Oh Haq ma cadrì đìq ối ti bèn cô joq ùh? Nhò enh leq Mangai cô jah broq rìm biac aih 'màng cô?” ⁵⁷ Wì ùh lem bùi ca Haq.

Mahaq Chuaq Jêxu doi ca wì: “Mangai capoch thai Boc Plình jah wì rìm nòi padèch haq, mahaq toq mangai ta gùng haq wa mangai hnem haq lê haq.”

⁵⁸ ối ta aih, Haq ùh broq bàc biac halac, ma jah 'màng aih taiq wì ùh lùì Haq.

14

Bùa Hêrôt Jêh Đac Jon 'Baptit

(Mốc 6:14-29; Luc 9:7-9)

¹ Jò aih, bùa Hêrôt tàng wì anoi hlài biac Chuaq Jêxu.
² Haq doi dèh ca hapõng: “Aih Jon 'Baptit cachìt rìh hlài, taiq 'màng aih raq haq broq bacc trong halac.”

³ Taiq bùa Hêrôt khoi thê wì rùp càt Jon tah ta hnem tù, taiq biac Hê-rô-đĩa, mai Philip oh bùa. ⁴ Ma jah 'màng aih Jon khoi doi ca bùa: “Tiaq ranenh, ìh ùh khòh yõc mangai aih broq mai.” ⁵ Hêrôt chaq trong jêh đac Jon, mahaq bùa crè ca jàn, ma jah 'màng aih đìq ca mangai jàn doi Jon mangai capoch thai Boc Pình.

⁶ Trùh hì caq hiniang manè hì xa-ông ca bùa Hêrôt, con cadrì Hê-rô-đĩa nhaiq muaq ta'ne 'bài mangai caq hiniang, lem manoh bùa đìq jaq. ⁷ 'Màng aih bùa yõc bàu pachac hùaq ca con cadrì aih rìm biac con cadrì aih enh xìn haq. ⁸ Khoi èh miq con cadrì aih thê haq xìn doi: “Põt gàu Jon 'Baptit tah ta màm 'ràng am ca au.” ⁹ Tàng bàu cô, bùa loh ca mango, mahaq taiq haq khoi lò pachac enh ngĩa ca mangai caq hiniang ỏi ta aih, ¹⁰ bùa thê wì pốt gàu Jon ỏi ta hnem tù, ¹¹ tah gàu aih ta màm hi 'ràng am ca con cadrì aih. Con cadrì aih 'ràng am dèh ca miq. ¹² 'Bài mangai hõc tiaq Jon lam trùh, yõc hanang Jon lam catùh. Khoi èh wì lam anoi ca Chuaq Jêxu.

Chuaq Jêxu am Padam Ngõng Ngai Caq

(Mõc 6:3-44; Luc 9:10-17; Jon 6:1-14)

¹³ Chuaq Jêxu bu tàng bàu aih, Haq cađac nòi aih loh ta bong, lam ta nòi ðùng hawit. Jò mangai jàn loq biac aih, wì loh enh 'bài phòq lam jènh tiaq Haq. ¹⁴ Haq cadiang loh enh bong, hnoq mangai jàn bacc hrìn, Haq xa-õch ta manoh, broq ca 'bài mangai ùh hrõc jah brêh.

¹⁵ Trùh chiu, mangai hõc tiaq thia haten jang Haq, wì doi: “Õi ta cô hawit, khoi xèq, xìn Thài am wì mùt ta 'bài plài rõt dahwèq caq.”

¹⁶ Chuaq Jêxu doi: “Ùh nhet ca wì haq ep hlài. Pì raq phai am ca wì haq caq.”

¹⁷ Mangai hõc tiaq tèo: “Nhèn i padam toq 'benh wa baiq pliang ca raq.”

¹⁸ Haq doi: “'Ràng ca wa 'benh ca Au cô.” ¹⁹ Haq thê wì ha'ngui ta nhat, khoi èh, yõc padam toq 'benh wa baiq pliang ca, ngoi ngan ta plình manè pôi Boc Plình. Khoi èh goh 'benh am ca 'bài mangai hõc tiaq, mangai hõc tiaq am ca mangai jàn. ²⁰ Mangai leq caq ji panàc, tõiç hlài rah haq jah 12 rajo. ²¹ 'Bài mangai caq jah 5.000 ngai, ùh tình gu cadrì wa con 'yoh.

Chuaq Lam ti Riang Diac

(Mõc 6:45-56; Jon 6:15-21)

²² Khoi ca aih, Haq bahõiq mangai hõc tiaq tõiç ta bong cwa pah tau adroi ca Haq, hi khoi Haq thê mangai jàn hlài.

²³ Jò wì khoi hlài, Haq tõiç ta bõi wang waiq khàn mòiq ngai, trùh xèq. Haq xôq õi ta aih mòiq Ngai. ²⁴ Jò aih bong khoi loh trùh 'ne diac raxìq, 'bìq diac raxìq lai laq tep taiq i cayo hlôi dang lùì.

²⁵ Mahaq trùh jò ten 'ngah damang aih, Chuaq Jêxu lam ti riang diac trùh ti 'bài mangai hõc tiaq. ²⁶ Jò wì mangai hõc tiaq hnoq Haq lam ti riang diac, wì yùq crè cachech bàu dèh. Wì xoh aih kiac cachõc.

²⁷ Mahaq Chuaq Jêxu doi: “Catèm beq, apaq crè, cla Au cô.”

²⁸ Pêtrô doi: “Waiq Chuaq, tàng joq ìh, xìn thê au lam ti riang diac trùh ta ìh.”

²⁹ Chuaq tèo: “Lam ta cô beq.”

Pêtrô loh enh bong, cadiang lam ti riang diac trùh ti Chuaq Jêxu. ³⁰ Mahaq jò haq hnoq cayo hlôi, Pêtrô crè, hlòp clìh ta diac, haq cachech bàu dèh: “Chuaq ôi, xìn dèch au!”

³¹ Tajòì 'mòi Chuaq Jêxu hnhu tì rùp yỏc haq, rai doi: “Ô mangai 'biaq manoh lùì, gleq ìh ma jah hèm ra'ngòt 'màng 'mat?”

³² Jò Haq wa Pêtrô khoi tỏc ta bong, cayo pi hlôi. ³³ 'Bàì mangai ỏi ta bong thia trùh hacùn cràng cùh waiq Haq. Wì doi: “Chuaq ôi, ìh joq 'nàng Con Boc Plình.”

³⁴ Jò khoi cwa pah tau, Haq wa mangai hỏc tiaq tỏc ta 'bò ỏi ta gùng Gê-nê-sa-rê. ³⁵ Mangai ta nòi aih canao ca Haq, thê mangai lam anoi jàp gùng aih, wa 'ràng trùh ca Haq 'bài mangai ùh hrỏc. ³⁶ Wì xìn Haq am wì bẻq ha'mai eo Haq. Èh òìq ca 'bài mangai ma bẻq jah brêh.

15

Bìac 'Nheo Tì Adroi ca Acaq

(Mỏc 7:1-23)

¹ Khoi èh, i 'bài mangai Pha-ri-si wa thài ranenh enh phỏq Jê-ru-sa-lem, lam trùh ti Chuaq Jêxu, wì bỏch Haq: ² “Gleq mangai hỏc tiaq ìh ùh broq bìac tiaq craq enh calah nẻh, taiq wì haq ùh 'nheo tì adroi ca acaq?”

³ Haq padreo bàu doi: “Gleq pì ma cađac bàu thê Boc Plình, ma broq tiaq bìac da mangai calah nẻh? ⁴ Ma jah 'màng aih Boc Plình khoi doi: ‘Pì ep iu dẻh miq baq,’ ☆ èh bìac cô hòm, ‘mangai leq hanip dẻh miq baq, phai jẻh haq cachìt.’ ☆ ⁵ Mahaq pì blỏq hlài doi: ‘Bìac leq au jah jùp ò ò dẻh miq baq, au khoi am ca Boc Plình. Mangai aih pì ep wẻq ban dẻh ca miq baq hòm.’ ⁶ 'Màng aih, taiq pì khoi broq bìac tiaq craq enh calah nẻh, aih pì khoi cađac bàu Boc Plình. ⁷ Ô mangai bàu lem, manoh dù, khoi troq da Êsai mangai capoch thai Boc Plình khoi doi adroi bìac pì, haq doi:

☆ 15:4 15:4 LEA 20:12; RAH 5:16. ☆ 15:4 15:4 LEA 21:17; Lêwì 20:9.

8 “Jàn cô yǒc hacùng cùh waiq Au,
mahaq manoh wì haq hangai ca Au.

9 Bìac wì haq cùh waiq Au aih 'ngwan,
ma jah 'màng aih wì haq hnài thê tiaq 'bǒi ranenh
con mangai broq loh.’☆”

10 Haq creó ca mangai jàn trùh ti Haq, èh doi ca wì: “Pì tamàng beq, èh phai 'nì loq. 11 Ûh xài dahwèq caq leq mùt ta hacùng broq mangai ùh hadròih, mahaq bìac leq loh enh hacùng, bìac aih ma broq ca mangai ùh hadròih.”

12 Mangai hǒc tiaq thia haten, bòch: “Ìh i loq, 'bài mangai Pha-ri-si ùh lem ta manoh jò wì tàng bàu cô?”

13 Haq padreo bàu doi: “Long leq Baq Au ǒi ta Pình ùh pìt, ep bùiq đac. 14 Dôq da wì haq 'màng aih raq. Wì haq aih mangai ùh xau 'nong trong ca mangai hadai ùh xau, òiq taclìh ta ralùng.”

15 Pêtrô doi: “Xìn Thài anoi ro ca nhèn bàu aliah aih.”

16 Chuaq Jêxu bòch: “Pì hadai 'nhòq 'nì tàng 'mòh? 17 Pì ma 'nhòq 'nì bìac cleq mùt ta hacùng clih ta cliac, hi khoi ep 'noh đac 'mòh? 18 Mahaq bìac leq tǒc enh manoh hloh ti hacùng, aih ma bìac dù, bìac aih ma broq mangai ùh hadròih. 19 Ma jah 'màng aih enh manoh hèm loh bìac dù, bìac jêh đac mangai, tango anang, rê rùai, atùng, bàu amòng wa bàu jù atùng. 20 Aih bìac ma broq mangai ùh hadròih, mahaq bìac acaq ùh 'nheo tì, ùh broq ca mangai loh ùh hadròih.”

Mangai Gu Cadri Ca-na-an

(Mǒc 7:24–30; 8:1–10)

21 Chuaq Jêxu cađac nòi aih, mùt ta gùng Tirò wa Sidôn.

22 I mòiq ngai gu cadri Ca-na-an lam trùh creó bàu dêh: “Waiq Chuaq, Con Xau bàu Đawit, xìn xa-ǒch ca au òiq. Con cadri au i kiac ǒi ta chac. Haq 'bìq baxa òiq jaq.”

☆ 15:9 15:9 Êsai 29:13.

²³ Mahaq Chuaq Jêxu ùh tèo nà leq. 'Bàì mangai hõc tiaq trùh ti Haq, doi: “Xìn ìh thê gu cadrì cô hlài beq, ma jah 'màng aih, haq tiaq creò yôt ca bèn.”

²⁴ Mahaq Chuaq doi: “Boc Plình thê Au trùh toq ta 'bài con trùu lac ta Diac Is-ra-ên.”

²⁵ Mahaq gu cadrì aih thia hacùn cràng enh ngĩa ca Chuaq Jêxu rai doi: “Waiq Chuaq, xìn jùp đồ au òi.”

²⁶ Haq padreo hlài doi: “Ùh khòh yõc 'benh con caiq tèm ca 'bài coq con caq.”

²⁷ Gu cadrì doi ca Haq: “Waiq Chuaq, joq 'nàng 'màng aih, mahaq 'bài coq con hadai jah caq 'benh ha'monh clih enh ca'bõng craq haq.”

²⁸ Chuaq Jêxu doi: “Ô gu cadrì tau, ìh i manoh lùì canòm càn, jah broq am tiaq troi manoh ìh ma enh.” Adrình ca jò aih, con haq jah brêh.

Yàng Baiq, Chuaq Jêxu Broq 'Benh Loh Bàc

²⁹ Chuaq Jêxu lam enh aih trùh ta diac raxìq Ga-li-lê, khoi èh tõi ta wang ha'ngui. ³⁰ I mangai jàn bàc lam trùh ti Haq, 'ràng 'bài mangai cwê, ùh xau, làu, mangai pen wa bàc ngai hiniq tôq ma 'noi, òi, jang jèn Chuaq Jêxu. Èh Haq broq brêh ca wì òi dõng. ³¹ 'Màng aih, wì hamàih òi jaq jò wì hnoq mangai làu khoi jah capoch, mangai ngwenh jèn tì jah brêh, mangai pen jah lam, wa mangai ùh xau jah xau hnoq. Wì manè padèch Boc Plình da mangai Is-ra-ên.

³² Chuaq Jêxu creò dèh ca 'bài mangai hõc tiaq trùh, Haq doi: “Au xa-õch ca mangai jàn cô, wì haq khoi òi ti Au piq hì, manàiq pi i ca dahwèq caq. Au ùh enh òi wì hlài cliac dech, yùq wì pangot, wì hlat ti trong.”

³³ 'Bài mangai hõc tiaq tèo Haq: “Õi ta nòi hawit 'màng cô chaq 'benh ta leq ma panàc ca mangai bàc 'màng cô?”

³⁴ Chuaq Jêxu bòch: “Pì i toq leq toq 'benh?”

Wì doi: “Tapèh toq 'benh wa toq 'biaq pliang ca 'yoh.”

³⁵ Haq thê mangai jàn ha'ngui ta taneh. ³⁶ Hi khoi, Haq yõc tapèh toq 'benh wa ca, manè pôi Boc Plinh, èh goh am ca mangai hõc tiaq, mangai hõc tiaq axong am ca jàn. ³⁷ Rìm ngai caq panàc. 'Benh õi i rah, tõch jah tapèh rojo. ³⁸ 'Bàì mangai ma caq aih 4.000 ngai, ùh tình gu cadrì wa con 'yoh. ³⁹ Khoi ca aih, Haq thê wì hlài. Khoi èh, Haq tõi ta bong lam ta gùng Ma-ga-đan.

16

Wì Xìn Haq Broq Teo Halac

(Mõc 8:11-13; Luc 12:54-56)

¹ 'Bàì mangai Pha-ri-si wa mangai Sa-đu-sê trùh ti Chuaq Jêxu, xìn Haq broq teo halac enh plình, ma jah 'màng aih wì i manoh enh thù Haq.

² Mahaq Haq tèo: “Trùh jò daxèq, pì doi: ‘Cô èh plình tôq lem, ma jah 'màng aih pì hnoq plình gòh,’ ³ èh jò daxroq, pì doi: ‘Hì cô i mè prò, ma jah 'màng aih hnoq plình gòh blúc.’ Pì loq hadro plình mè, plình tôq, gleq pì ma ùh 'nì hadro 'bài teo halac ta 'nhòng crõng taneh? ⁴ Xinoi ngang dù, ùh wèq dèh bàu cô chaq teo halac, mahaq ùh am ca wì mòi q teo halac leq enh gùng ca teo halac da Jôna, mangai capoch thai Boc Plình.” Hi khoi Haq loh lam enh wì.

⁵ Jò khoi cwa 'bò pah tau, 'bài mangai hõc tiaq hèt wê 'benh. ⁶ Chuaq Jêxu doi ca 'bài mangai hõc tiaq: “Phai hmàng ta manoh wa ngan kenh ca blo mangai Pha-ri-si wa Sa-đu-sê.”

⁷ Mangai hõc tiaq bòch dabau doi: “Cô taiq bèn ùh wê 'benh.”

⁸ Chuaq Jêxu loq ca wì hèm biac aih, Haq doi ca wì: “Ô mangai 'biaq manoh lùì, gleq pì ma hèm taiq pì ùh i ca 'benh? ⁹ Pì ma 'nhòq 'nì, 'nhòq hnoq, pì ùh hmàng, padam

toq 'benh am 5.000 ngai caq, èh pì töch hlài rah jah toq leq rajo? ¹⁰ Èh pì ahmàng tapèh toq 'benh am ca 4.000 ngai caq, pì töch rah jah toq leq rajo? ¹¹ Gleq pì ma ùh 'nì tàng ùh xài Au enh anoi ca pì biac 'benh caq? Mahaq Au enh anoi ca pì ep ngan kenh blo mangai Pha-ri-si wa Sa-đu-sê.” ¹² Khoi ca Haq doi bàu aih, wì men loq tàng, ùh xài Haq thê wì ngan kenh blo ma tah ta 'benh, mahaq ngan kenh bàu hnài da mangai Pha-ri-si wa Sa-đu-sê.

Pêtrô Pa'noh Loh Chuaq Jêxu Joq Crich

(Mốc 8:27-30; Luc 9:18-21)

¹³ Jò Chuaq Jêxu trùh ta gùng Sê-sa-rê Philip, Haq bòch dèh mangai hõc tiaq: “Tiaq bàu wì doi, Con Mangai aih Cabô?”

¹⁴ Mangai hõc tiaq Haq tèo: “'Nah ngai doi: Jon 'Baptit. 'Nah ngai doi: Êli. Wì 'noi q hòm doi: ìh Jê-rê-mi, loq mòi q ngai, mangai capoch thai Boc Plình ma 'noi q.”

¹⁵ Haq bòch wì: “Cla pì doi, Au Cabô?”

¹⁶ Simôn Pêtrô tèo: “Ìh Mangai Crich, Con Calô Boc Plình ma rìh hloi.”

¹⁷ Chuaq Jêxu doi ca haq: “Am xôq ramõt ca ìh, Simôn con Jôna, ma jah 'màng aih biac cô ùh xài mangai patô ca ìh, mahaq Baq Au òi ta plình khoi mahno ca ìh. ¹⁸ Au hadai doi ca ìh: ìh Pêtrô. Au jah broq Tagop Hadròih Au enh crõng hmu cô, èh 'bài 'mang da Cwìang Ngang Dù ùh jah 'blêq Tagop Hadròih aih. ¹⁹ Au am ca ìh chài khwaq Diac Plình, biac leq ìh cật òi ta crõng taneh, hadai jah cật òi ta Diac Plình, biac leq ìh ma dõih òi crõng taneh, hadai jah dõih òi ta Diac Plình.” ²⁰ Khoi èh, Haq ùh am dèh mangai hõc tiaq anoi ca mangai 'noi q loq ca Haq Crich, Con Calô Boc Plình.

²¹ Pàng aih, Chuaq Jêxu baxèm am ca 'bài mangai hõc tiaq loq, Haq ep lam trùh ta Jê-ru-sa-lem, ep chiuq 'bài

craq broq gàu Yothaiq, 'bài pajàu càn wa 'bài thài ranenh baxa Haq, ep chiuaq wì jêh đac, trùh hì piq, Haq jah rìh hlài.

²² Pêtrô 'ràng crài Haq lam ta kenh, doi ca Haq: “Chuaq ôi, Boc Plình leq manaq đòiq ìh 'màng aih, biàc aih ùh trùh ca ìh đòh!”

²³ Mahaq Chuaq Jêxu hwi ngan Pêtrô doi: “Ô kiac Satan, lùì òi enh rù ca Au beq! Ìh broq dua 'mèq am ca Au, ma jah 'màng aih ìh ùh hèm trùh biàc Boc Plình, mahaq hèm trùh toq biàc con mangai.”

²⁴ Khoi èh Chuaq Jêxu doi dèh ca mangai hóc tiaq: “Tàng mangai leq enh tiaq Au, thê haq cađac dađeh, xùì long pagat lam tiaq Au. ²⁵ Ma jah 'màng aih, mangai leq enh dèch dèh can rìh jah hnhung, mahaq mangai leq cađac dèh can rìh tiaq Au, èh jah yóc hlài. ²⁶ Mangai leq, 'nhac ca haq jah nhàn yóc đìq ca crống taneh, mahaq mahua yiang haq hnhung, i lòiq cleq? 'Màng aih èh haq yóc cleq ma wìa halìh yóc hlài dèh mahua yiang? ²⁷ Ma jah 'màng aih atìq cô èh, Con Mangai jah òi ti can 'ngah 'ngai Baq Haq lam trùh ta crống taneh ti 'bài 'bình plình. Jò aih èh, Haq 'noh biàc baha ca tang ngai, wa baxa tang ngai, aih tiaq biàc cla wì haq broq.

²⁸ “Jòq 'nàng, Au doi ca pì, pì ma yòng jang cô, i tang ngai ùh cachìt adroi jò wì hnoq Con Mangai trùh òi ta Diac Haq.”

17

Chuaq Jêxu Halìh 'Mù Dađeh

(Môc 9:2-13; Luc 9:28-36)

¹ Atìq ca tadràu hì, Chuaq Jêxu 'ràng Pêtrô wa Jacò, Jon oh Jacò tiaq Haq tọc ta wang ha'nhèq. ² Enh ngìa ca wì, Chuaq halìh 'mù, hadrò Haq canhìa tìah ca mat mahì, eo Haq taboc ca-ah. ³ Wop jò aih wì hnoq Môise wa Êli capoch tùang ca Chuaq Jêxu.

⁴ Pêtrô doi ca Chuaq Jêxu: “Chuaq ôi, bèn ôi ta cô lem ðiq jaq, tàng lem manoh ìh, au broq piq toq ranòh ta cô, mòiq ca ìh, mòiq ca Môise, mòiq ca Êli.”

⁵ Jò haq ði raq capoch, i yùc taboc ca-ah glom wì ta aih. I bàu enh yùc doi: “Cô Con Calô Au, Au loq waq ca Haq. Haq lem manoh Au rìm trong, ep iu bàu Haq.”

⁶ Jò tàng bàu aih wì pacro ðađeh ta taneh, rai cùp gàu taiq yùq crè ðiq jaq. ⁷ Chuaq Jêxu trùh haten, bèq mangai hõc tiaq doi: “Paq yùq, yòng beq!” ⁸ Jò wì ngoi ngan, pi i ca cabô enh gùng ca Chuaq Jêxu.

⁹ Jò wì haq loh enh wang, Chuaq Jêxu tanap ca wì: “Pì ùh khòh anoi hlài ca mòiq ngai leq bìac pì khoi hnoq, gòm trùh jò Con Mangai cachit jah rìh hlài.”

¹⁰ 'Bàì mangai hõc tiaq bòch Haq: “'Màng aih hagleq thài ranenh doi: Êli phai trùh adroi?”

¹¹ Chuaq Jêxu tèo: “Jòq Êli phai trùh, ðòiq ha'naoq hlài rìm bìac. ¹² Mahaq Au doi ca pì: Êli khoi trùh, mahaq wì ùh canao loq. Wì broq cađac ca haq rìm trong tiaq manoh wì enh. Con Mangai hadai phai chiùq jìq xa bàc ta tì wì aih èh.” ¹³ Jò aih 'bàì mangai hõc tiaq men loq Haq anoi trùh Jon 'Baptit.

Chuaq Hnan Drùh Can Kiac

(Mõc 9:14-29; Luc 9:37-43)

¹⁴ Jò wì trùh hlài ta mangai bàc, i mòiq ngai con calô thia haten, hacùn cràng enh ngĩa ca Chuaq Jêxu, doi: ¹⁵ “Chuaq ôi, xa-õch ca con calô au ma troq kenh, haq xalep ðiq jaq. Haq cro yõt ta ùnh wa ta diac. ¹⁶ Au khoi 'ràng haq ca 'bàì mangai hõc tiaq ìh, mahaq wì ùh jah broq brêh ca haq.”

¹⁷ Chuaq Jêxu tèo: “Ô xinoi manhài trài wa ùh i ca manoh lùì. Au ep ði ti pì trùh jò leq? Au ep chiùq àt ca pì trùh jò leq? 'Ràng con calô 'mat ca Au beq.” ¹⁸ Chuaq

Jêxu lech ca kiac aih. Tajòì 'mòi jò aih, can kiac loh enh chac haq. Con calô brêh tajòì 'mòi jò aih raq.

¹⁹ Jò pì i ca wì 'noiç, 'bài mangai hõc tiaq trùh ti Chuaq Jêxu bòch hlèp Haq: “Gleq nhèn ma ùh jah hnan drùh 'noh kiac?”

²⁰ Chuaq Jêxu tèò wì: “Taiq pì i manoh lùì 'yoh 'yit hrìn. Ma jah 'màng aih, Au doi ca pì joq 'nàng, tàng pì i manoh lùì jah ðeh toq clong habài, pì jah doi ca wang cô: Cwa tõi pah tau beq. Tajòì 'mòi wang cô cwa tõi pah tau. Ùh i biac cleq pì ùh broq jah.

²¹ “Enh hnan ðac can kiac 'màng cô, ep waiq khàn wa rôn ca acaq.”

Bìac Haq Cachit Èh Rìh Hlài

(Mõc 9:30-32; Luc 9:43-45)

²² Jò òi ta Ga-li-lê, Chuaq Jêxu doi ca wì: “Cô èh, Con Mangai 'bìq mùt ta tì wì. ²³ Èh wì jêh ðac Haq. Trùh hì piq, Haq rìh hlài.” 'Bài mangai hõc tiaq tàng bàu aih, wì loh ca mango ðìq jaq.

Bìac Am Thèq da Hnem Cùh Waiq

²⁴ Jò Chuaq Jêxu wa mangai hõc tiaq trùh ta Ca-bê-na-um, 'bài mangai gop thèq ta Hnem Cùh Waiq lam bòch Pêtrô: “Thài ìh ùh am thèq da Hnem Cùh Waiq 'mòh?”

²⁵ Pêtrô tèò: “Òq Haq am.”

Jò Pêtrô mùt ta hnem, Chuaq Jêxu bòch Haq adroi: “Simôn, ìh hèm 'màng leq? 'Bài bùa crõng taneh gop thèq enh cabô, enh 'bài con cla wì, loq gop thèq enh wì Diac 'noiç?”

²⁶ Pêtrô tèò: “Enh mangai Diac 'noiç.”

Chuaq Jêxu doi ca haq: “'Màng aih 'bài con caiq da wì haq ùh ep am. ²⁷ Mahaq ðòiq ùh hìaq broq ca wì catõih, ìh loh ta diac raxìq ca'nìh axai, yõc ca cap axai ma adroi,

wah hacùng haq, i mòiq hliac 'bac. Yõc 'bac aih lam am thèq ca ba beq.”

18

Öi Diac Plình Cabô Yi Càn?

(Mõc 9:33-37; Luc 9:46-48)

¹ Wop jò aih, 'bài mangai hõc tiaq Chuaq Jêxu trùh bòch Haq: “Cabô yi càn öi ta Diac Plình?”

² Haq creo ca mòiq ngai con 'yoh, ðòiq haq yòng ta'ne wì. ³ Èh Haq doi: “Au doi ca pì joq 'nàng, tàng pì ùh cađac ðeh manoh broq tôiq wa wìh wìa tìah ca con 'yoh cô, pì ùh jah mùt Diac Plình. ⁴ 'Màng aih mangai leq chiùq broq ha'neq tìah ca con 'yoh cô, haq jah broq càn öi ta Diac Plình. ⁵ Mangai leq taiq hiniq Au nhàn con 'yoh cô, aih haq nhàn Au.

⁶ “Mahaq tàng mangai leq baxrùq ca mòiq ngai ta 'bài con 'yoh khai tiaq Au broq tôiq, ðang ca cật apao hmu jang ranõng haq, hwenh ca'nìh ðac haq ta diac raxìq yi lem. ⁷ Nan xa ca crõng taneh cô taiq bìac broq loh ca mangai 'noiç catõih cro! Joq i ðeh bìac broq ca mangai 'noiç catõih cro, mahaq nan xa am ca mangai leq ma baxrùq ca mangai 'noiç catõih cro. ⁸ Tàng tì loq jènh ìh baxrùq ìh broq tôiq, coh hwenh ðac ma hangai ca cla ìh beq, ma jah 'màng aih yõc ca ìh thìuq mòiq apah jènh, loq mòiq apah tì, mahaq jah mùt nòi can rìh hloi hloi, yi hnao ca tøm jènh tì, mahaq clih ta 'bau ùnh hloi hloi. ⁹ Tàng mat ìh baxrùq ìh broq tôiq, 'bacsì hwenh ðac ma hangai ca ìh beq, ma jah 'màng aih, mòiq apah mat, mahaq jah mùt nòi rìh halình, yi hnao öi tøm baiç apah mat, mahaq mùt ta 'bau ùnh.

¹⁰ “Wèq ðađeh oq, apaç khìn mòiq ngai 'yoh leq ta 'bài con 'yoh cô, ma jah 'màng aih, Au doi ca pì, 'bài 'bình plình ða wì haq öi ta plình hloi hloi hnoq hadrò Baq Au. ¹¹ Ma

jah 'màng aih Con Mangai khoi trùh òiq dèch mangai ma hù hnhung.

¹² “Pì hèm 'màng leq, tàng mangai leq i mòiq hrinh toq trùu, èh mòiq toq lam lac, haq ma ùh òiq òò 99 toq òi ta wang, èh haq lam chaq mòiq toq trùu ma lam lac 'mòh?

¹³ Joq 'nàng Au doi ca pì, jò mangai aih chaq hnoq trùu ma lac aih, haq lem bùi yi hnao ca hnoq 99 toq ùh hìaq lam lac. ¹⁴ Baq pì òi ta plình hadai 'màng aih. Haq ùh enh òiq mòiq ngai leq ta 'bài con 'yoh cô hù hnhung.”

Bìac Trah Hatroq ca Mangai 'Noiq

¹⁵ “Tàng i mòiq ngai oh daq ìh broq lôi ca ìh, ìh patô da haq toq jò chòp baiq ngai raq. Tàng haq tamàng da ìh, ìh jah oh daq hlài. ¹⁶ Mahaq tàng haq ùh tamàng, ìh adràc tam mòiq loq baiq ngai lam ti ìh. ‘Nhò bàu baiq piq ngai anoi hlài, rìm bàu da ìh wa mangai aih jah hagao cajap.’[☆]

¹⁷ Tàng haq xôq ùh tamàng 'bài mangai aih, phai doi ca Tagop Hadròih. Tàng haq hadai ùh iu bàu mangai òi ta Tagop Hadròih, jò aih ngan haq tìah ca mangai ùh tiaq Boc Plình wa mangai gop thèq.

¹⁸ “Jòq 'nàng Au doi ca pì, bìac leq pì càt òi crống taneh, èh hadai càt òi ta Diac Plình. Bìac leq pì dõih òi ta crống taneh, èh hadai jah dõih òi ta Diac Plình.

¹⁹ “Jòq 'nàng, Au doi hòm ca pì, tàng baiq ngai ta pì mòiq manoh ca dabau òi ta crống taneh, ùh kè waiq xìn bìac cleq, Baq Au òi ta Diac Plình jah am ca wa. ²⁰ Ma jah 'màng aih nòi leq i baiq piq ngai canòm ca hiniq Au tagop dabau, Au òi ta'ne wì haq.”

²¹ Pêtrô thia haten bòch Chuaq Jêxu: “Chuaq ôi, jò oh daq au broq tôiq ca au, au ep baxõng tôiq ca haq toq leq yàng? I jòq trùh tapèh yàng ùh?”

[☆] 18:16 18:16 RAH 19:15.

²² Chuaq Jêxu tèo: “Au doi ca ìh, ùh xài trùh tapèh yàng, mahaq 70 yàng tapèh.

²³ “Màng cô, Diac Plình tìah ca mòiq ngai bùa, enh tình sô dèh ca hapõng. ²⁴ Jò bùa baxèm tình, i mòiq ngai 'ràng ca haq mòiq ngai pòq bùa 10.000 talàng 'bac. ²⁵ Taiq haq ùh nui claih ca dòih, craq thê wì tech haq, tech cadri con haq, tech diq ca cùng hang haq, òiđiq baxõng dòih.

²⁶ “Mahaq hapõng aih hacùng cràng enh ngia ca bùa rai doi: ‘Xìn ìh òiđiq au baxõng ðeh adia, èh au baxõng diq ðõng.’ ²⁷ Bùa xa-õch ca haq, baxõng haq hlài, pi tình ca haq dòih.

²⁸ “Mahaq jò hapõng aih loh lam, haq hnoq mòiq ngai hapõng 'noiđiq pòq haq mòiq hrinh ðê-na-ri. Haq rùp hapõng aih it ranõng, rai doi: ‘Baxõng da au dòih beq.’

²⁹ “Hapõng aih hacùn cràng xìn haq: ‘Xìn òiđiq au baxõng ðeh adia, èh au baxõng ðõng da ìh.’

³⁰ “Mahaq haq ùh chiùq. Haq xôq rùp hapõng aih tah ta hnem tù trùh jò baxõng ðõng da haq. ³¹ 'Bàì hapõng 'noiđiq hnoq bìac aih, wì mango diq jaq. Wì anoi hlài ca bùa loq rìm bìac aih.

³² “Bùa creo ca haq trùh doi ca haq: ‘Ô hapõng dù, au khoi cađac dòih ca ìh taiq ìh khoi xìn au. ³³ Gleq ìh ùh xa-õch dèh ca bua ìh, troi au khoi xa-õch ca ìh 'mòh?’ ³⁴ Bùa loh nòih ca haq, thê 'bài gòm tù rùp tah haq ta hnem tù baxa haq trùh jò leq haq ca'naih claih ca dòih aih.

³⁵ “Tàng pì ùh diq ca manoh baxõng tôiq dèh ca oh daq, Baq Au òi ta Diac Plình hadai hadrah pì 'màng aih diq.”

19

*Bìac Ờng Mai Cađac ca Dabau
(Mỗc 10:1-12)*

¹ Jò Chuaq Jêxu hnài khoi gêh òiq ca bàu aih, Haq cađac gùng Ga-li-lê, lam trùh ta gùng Judia, pah tau diac Jôđan.

² Mangai jàn bàc tiaq Haq. Haq broq brêh ca wì ta aih.

³ Mangai Pha-ri-si thia haten. Wì bòch òiq thù Haq, doi: “Thài ôi, 'nhac ca biac càn loq biac 'yoh xôq jah cađac mai joq ùh?”

⁴ Haq tèo wì: “Pì 'nhòq lah đóc Sech Hadròih 'mòh? Bàu Chuaq achìh enh jò baxèm, Boc Plình 'khoi broq gu calô wa gu cadrì, ⁵ hi doi: ‘Tiaq 'màng aih raq gu calô jah talah dèh enh miq baq, yùp pajùm dèh ti mai, èh wa baiq wìa mòiq chac.’ ⁶ Pàng aih, wa pi xài baiq hòh, mahaq wìa mòiq chac. 'Màng cô, biac leq Boc Plình khoi yùp pajùm, con mangai ùh jah lah.”

⁷ Wì bòch: “'Màng aih gleq Môise khoi hnài doi: ‘Gu calô am ca mai jàiq cađac, khoi èh òiq dèh mai lam.’”

⁸ Chuaq Jêxu tèo: “Tiaq manoh pì cadoq, ma jah Môise am pì cađac mai, mahaq enh jò baxèm ùh 'màng aih. ⁹ Au doi ca pì: Mangai leq cađac dèh mai ùh xài taiq mai haq tango, khoi èh haq yóc òn mai 'noiq, gu calô aih khoi broq tôiq tango. Èh mangai leq ma yóc gu cadrì ỡng haq khoi cađac, haq hadai broq tôiq tango.”

¹⁰ 'Bàì mangai hóc tiaq doi ca Haq: “Tàng biac ỡng mai 'màng aih, ùh yóc mai yi lem.”

¹¹ Chuaq Jêxu tèo wì: “Ùh xài rìm ngai jah nhàn yóc bàu cô, mahaq toq mangai Boc Plình khoi am broq 'màng aih hêq! ¹² I 'nah ngai ùh yóc mai taiq khoi xa-ông ca wì haq 'màng aih. 'Nah ngai ùh yóc mai taiq cla to enh 'màng aih. 'Nah ngai ùh yóc mai taiq toq enh broq biac Diac Plình. Mangai leq nui nhàn biac cô khòh nhàn.”

*Chuaq Jêxu Am Xôq ca Wì Con 'Yoh
(Mốc 10:13-16; Luc 18:15-17)*

¹³ Khoi èh wì 'ràng ca Chuaq Jêxu 'bài con 'yoh waq ca Haq ðòiq tì ti chac wì wa waiq khàn ca wì haq. 'Bàì mangai hõc tiaq lech ca wì.

¹⁴ Mahaq Chuaq Jêxu doi: “Ðòiq 'bài wì con 'yoh trùh ti Au beq, apaq tât wì haq, ma jah 'màng aih Diac Plình jah am ca mangai leq i manoh tìah ca 'bài con 'yoh 'màng cô.”

¹⁵ Khoi ca Haq ðòiq tì ti chac wì con 'yoh, èh Haq loh lam.

Mangai Gu Radam Padrõng Can

(Mõc 10:17-31; Luc 18:18-30)

¹⁶ Jò aih i mòi q ngai thia bòch Chuaq Jêxu: “Thài ôi, au ep broq lem 'màng leq ðòiq jah i can rìh hloi hloi?”

¹⁷ Chuaq Jêxu bòch haq: “Gleq ìh ma bòch Au bìac lem? Toq Boc Plình raq ma lem! Tàng ìh enh mùt rìh halình, ìh ep wèq ðìq bàu thê.”

¹⁸ Gu radam aih bòch: “Bàu thê leq?”

Chuaq Jêxu tèo haq: “‘Apaq jêh ðac mangai, apaq tango, apaq atùng, apaq capoch hlài amòng. ¹⁹ ep iu bàu miq baq, ✧ ‘loq waq ca 'bài mangai ma haten hatìa ca ìh, ✧ 'màng ca ìh loq waq ca ðađeh.”

²⁰ Gu radam aih doi: “Bàu thê aih au khoi iu tiaq ðìq, 'màng aih au ôi thiùq cleq hòm?”

²¹ Chuaq Jêxu doi: “Tàng ìh enh lem rìm trong, phai lam tech ðõng cùng hang, am ca 'bài mangai pa beq, 'màng aih ìh jah i cùng hang canaq 'bac ôi Diac Plình. Khoi èh lam tiaq Au.”

²² Jò gu radam tàng bàu aih, haq loh lam rai mango, taiq haq i bàc cùng hang.

²³ Khoi ca aih, Chuaq Jêxu doi ca 'bài mangai hõc tiaq: “Au doi ca pì joq 'nàng, mangai padrõng, xa ca jah mùt Diac Plình. ²⁴ Au doi tam ca pì hòm, lõcđa chiu cloh jùm xùang yì hnao ca mangai padrõng mùt Diac Boc Plình.”

✧ 19:19 19:19 LEA 20:12-16; RAH 5:16-20. ✧ 19:19 19:19 Lêwì 19:18.

²⁵ Jò 'bài mangai hốc tiaq tàng biác cô, wì hamàih diq jaq, bòch: “ 'Màng aih, cabô jah dèch?”

²⁶ Chuaq Jêxu ngan wì, èh Haq doi: “Biác cô, mangai broq ùh jah, mahaq Boc Plình broq jah diq dǒng.”

²⁷ Pêtrô tèo Haq: “Nhèn khoi cađac dǒng rìm biác òoiq tiaq ìh, 'màng aih nhèn jah cleq?”

²⁸ Chuaq Jêxu doi ca wì haq: “Au doi bàu joq 'nàng ca pì ma khoi tiaq Au, jò 'nhòng ma neo, aih jò Con Mangai ha'ngui dèh ta gèq bùa 'ngah 'ngai, pì hadai jah ha'ngui 12 toq gèq bùa, hadrah 12 'bôq Is-ra-ên. ²⁹ Mangai leq taiq hiniq Au, ma khoi cađac dèh miq baq, oh daq, con caiq, nòì hnem, taneh, mangai aih jah nhàn hlài bình hrinh phàn haq ma khoi cađac, wa jah i can rìh hloi hloi. ³⁰ Mahaq i bàc ngai manàiq cô òi adroi, jah wìa loh ca atiq. Yóc ca mangai manàiq ma òi atiq, èh wì jah atóc adroi.”

20

Bàu Aliah ca Wùan Plì Nho

¹ “Ma jah 'màng aih Diac Plình tìah ca mòiq ngai craq tau, i wùan nho. Xrǒih xroq haq lam chaq 'bài mangai broq ca haq ta wùan nho. ² Jò haq khoi tèo ca baha wì mòiq ngai mòiq đê-na-ri, haq thê wì mùt broq ta wùan nho haq.

³ “Hachìn jò daxroq, haq loh chaq hnoq 'bài mangai 'noi q òi roc chòq ùh i ca biác broq. ⁴ Haq doi ca wì: ‘Pì hadai mùt broq ta wùan nho au beq, èh au baha pì troq jaq. Tajòì 'mòi wì mùt broq.’

⁵ “Èh enh 12 jò trùh piq jò, haq loh lam hòm, hadai broq 'màng aih. ⁶ Khoi ca aih, trùh padam jò daxèq, haq loh lam hòm xôq hnoq 'bài mangai òi dech. Haq bòch wì: ‘Gleq pì ma yòng yôt ta cô xèq ca hì ùh broq jiang cleq 'mòh?’

⁷ “Wì tèo haq: ‘Taiq ùh i ca mangai bòch nhèn broq.’
“Haq doi ca wì: ‘Pì hadai mùt broq ta wùan au beq.’

⁸ “Trùh xèq, cla craq wùan nho doi ca mangai ma gòm ngan wì broq: ‘Creo ca wì ma broq trùh, am da wì haq cùng. Baxèm am ca mangai ma neo broq, trùh mangai ma adroi.’

⁹ “'Bàì mangai ma broq enh padam jò trùh, nhàn mòiq ngai mòiq đê-na-ri 'bac. ¹⁰ Khoi èh, trùh 'bài mangai haq ma creo mùt broq adroi ca aih. Wì xoh jah yi bàc, mahaq dìq ca wì haq hadai nhàn mòiq ngai mòiq đê-na-ri. ¹¹ Jò wì haq khoi nhàn, wì mamùc ca craq wùan nho. ¹² Wì doi: ‘'Bàì mangai mùt atìq cô, wì broq bu mòiq jò ðùng hô. Ìh xôq baha wì da-adàng ca nhèn, aih 'bài mangai broq ma yi lep tênh tôq xèq ca hì.’

¹³ “Mahaq craq aih tèo mòiq ngai ta 'bài wì haq: ‘Ô bua, au ùh broq ca ìh ùh ta-atoq, ma ùh xài ìh khoi mòiq manoh ca au baha ìh mòiq đê-na-ri 'mòh? ¹⁴ Yóc da ìh 'bac cô, èh lam beq. Au enh am ca mangai ma atìq cô toq au khoi am ca ìh dìq. ¹⁵ Cùng hang da au, au enh ca 'naih ca mangai leq hi mac ca da au. Ìh i manoh tarènh taiq manoh au khôn khaq 'mòh?’

¹⁶ “'Màng aih, 'bài mangai atìq jah adroi, mangai adroi jah atìq.”

Chuaq Jêxu Doi Adroi Bàc Nan Xa ca Haq

(Mỗc 10:32-34; Luc 18:31-34)

¹⁷ Jò Chuaq Jêxu 'nang lam ti trong tọc Jê-ru-sa-lem, Haq 'nong crài dèh 12 ngai hóc tiaq lam ti Haq, rai lam Haq doi ca wì: ¹⁸ “Cô èh bèn tọc Jê-ru-sa-lem, Con Mangai ep ðòiq wì rùp am ca 'bài pajàu càn wa 'bài thài ranenh. Wì jah tình ca jêh đac Haq. ¹⁹ Wì 'ràng Haq am ca mangai jàn 'noiq ðòiq wì hanip Haq, lê Haq, blai Haq, hi khoi tiang ðình Haq ta long pagat. Trùh hì piq Haq jah rìh hlài.”

Bàù Xìn da Miq Baiq Toq Con Calô

(Mỗc 10:35-45)

²⁰ Khoi êh, mai Xê-bê-đê 'ràng dèh 'bài con calô thia haten ca Chuaq Jêxu, hacùn cràng.

²¹ Chuaq bòch haq: “Ìh enh bòch cleq?”

Haq doi: “Xìn ìh am ca wa con calô au, mòi q ngai ha'ngui pah 'ma, mòi q ngai ha'ngui pah 'ngeo ca ìh ta Diac ìh.”

²² Chuaq Jêxu doi: “Ìh ùh 'nì ca dađeh xìn biac cleq. Chôp anui ôq doi chrõng Au ôq ùh?”

Wa tèo: “Ma nui.”

²³ Chuaq Jêxu doi ca wa: “Jôq 'nàng chôp jah ôq doi chrõng Au, mahaq ha'ngui pah 'ma loq pah 'ngeo Au, aih jah am toq ca mangai leq Baq khoi padon am.”

²⁴ Jò 12 'bài mangai hõc tiaq tau tàng wa bòch biac aih, wì loh nòih ca wa oh daq. ²⁵ Chuaq Jêxu creó ca wì mangai hõc tiaq trùh, Haq doi: “Pì loq 'bài bùa jàn 'noi q panan jàn thê wì tiaq dađeh. 'Bài cwan canòm dèh ca cwàng padit padiang ca jàn. ²⁶ Mahaq, pì ùh 'màng aih. Mangai leq enh broq càn, ep broq hapõng pì. ²⁷ Mangai leq enh broq gàu, ep broq hapõng ma yi 'yoh hòm. ²⁸ 'Màng aih, Con Mangai khoi trùh, ùh xài òòi q wì patìh ca Haq, mahaq Haq patìh ca wì, êh Haq am dèh can rìh òòi q rõt dèch bàc ngai.”

Baiq Ngai Ùh Xau ta Phôq Jê-ri-cô

(Mõc 10:46-52; Luc 18:35-43)

²⁹ Jò Chuaq Jêxu wa mangai hõc tiaq Haq loh enh phòq Jê-ri-cô, i mangai jàn bàc tiaq Haq. ³⁰ I baiq ngai, mangai ùh xau òi ti trong. Jò wa tàng wì doi i Chuaq Jêxu lam trong aih, wa creó bàu dèh: “Waiq Chuaq, Con Xau Đawit, xìn xa-õch ca ma òi q!”

³¹ 'Bài mangai ta aih lech ca wa, thê wa hatenh, mahaq wa creó yi dèh hòm: “Waiq Chuaq, Con Xau Đawit, xìn xa-õch ca ma òi q!”

³² Chuaq Jêxu yòng, creo ca wa, doi: “Chôp enh Au broq ca chôp biac cleq?”

³³ Wa tèo: “Waiq Chuaq, xin am mat ma jah xau hnoq!”

³⁴ Chuaq Jêxu xa-öch ca wa. Haq bèq mat wa. Tajòi 'mòi wa xau hnoq wa lam tiaq hloi Haq.

21

*Wì Ììh Yỗc Chuaq Jêxu Mùt Jê-ru-sa-lem
(Mỗc 11:1-11; Luc 19:28-40; Jon 12:12-19)*

¹ Jò Chuaq Jêxu wa mangai hốc tiaq lam ten trùh phòq Jê-ru-sa-lem, òi ta plài 'Bêt-pha-jê, haten ca wang Ôliu, Haq thê baiq ngai hốc tiaq lam, ² doi ca wa: “Chôp lam trùh ta plài enh ngìa chôp beq, èh chôp jah hnoq mòiq toq lùa can wa con haq cật òi q ti aih, chôp ca'naih òi 'ràng ca Au beq. ³ Tàng i cabô bóch chôp broq cleq, doi ca haq: Chuaq nhet ca wa haq. Tajòi 'mòi haq jah am ca chôp.”

⁴ Jah i biac cô òi q broq xit bàu mangai capoch thai Boc Plình khoi doi:

⁵ “Doi ca mangai Siôn loq, Ngan cô:
‘Bùa ìh trùh ta ìh,
Haq ùh padèch dađeh, còi lùa con,
aih con da lùa can.’[☆]”

⁶ Wa mangai hốc tiaq aih lam broq tiaq bàu Haq khoi tanap. ⁷ Wa 'ràng lùa can wa con haq, hlèch dèh eo enh crông lùa, òi q Chuaq Jêxu tỗc ha'ngui ti eo. ⁸ 'Bài mangai bàc òi q jaq lèh dèh eo hlèch ti trong, èh i 'nah ngai coh hla hlèch ti trong. ⁹ Mangai jàn ma lam adroi wa wì ma lam atìq cachech bàu dèh doi:
“Hô-sa-na Con Bùa Đawit.”

[☆] 21:5 21:5 Xach 9:9.

“Đang ca manè am ca Haq canòm ca hiniq Chuaq lam trùh.”✠

“Hô-sa-na òi ta nòi òi q jaq ha'nhèq.”

¹⁰ Jò Chuaq Jêxu mùt ta Jê-ru-sa-lem, òi q ca phòq aih rèo tagràng tagrát, bòch dabau: “Mangai cô cabô?”

¹¹ Bacc ngai padreo bàu doi: “Aih Chuaq Jêxu, Mangai Capoch Thai Boc Plình enh phòq Na-xa-ret, gùng Ga-li-lê.”

Chuaq Hnan Mangai Padro

(Môc 11:15-19; Luc 19:45-48; Jon 2:13-22)

¹² Chuaq Jêxu mùt ta Hnem Cùh Waiq, hnan dõng 'bài mangai padro ta aih, hacùp đac ca 'bõng mangai halih 'bac, èh gèq mangai tech chìm trù. ¹³ Haq doi ca wì: “I bàu khoi achih: ‘Hnem Au jah creò hnem waiq khàn,’✠ mahaq pì khoi broq hnem cô loh ‘còp da mangai atùng!’✠”

¹⁴ Jò aih, 'bài mangai ùh xau mat wa mangai pen lam trùh ti Haq ta Hnem Cùh Waiq. Haq broq brèh ca wì.

¹⁵ Mahaq jò 'bài pajàu càn wa thài ranenh hnoq bìac halac Haq broq, èh wì tàng bàu con 'yoh cachech ta Hnem Cùh Waiq: “Hô-sa-na Con Xau Bùa Đawit,” wì loh nòih òi q jaq.

¹⁶ Wì doi ca Haq: “Ìh i tàng bàu 'bài con 'yoh cô doi cleq ùh?”

Chuaq Jêxu tèo: “Au tàng, mahaq pì 'nhòq đõc Sech Hadròih 'mòh?

“‘Chuaq jah hacùng 'bài con 'yoh wa con nga, i bàu manè padèch Haq.’✠”

¹⁷ Khoi èh, Haq cađac wì, loh enh gùng ca phòq, mùt ta plài 'Bê-tha-ni òi padài damang ta aih.

✠ 21:9 21:9 BCP 118:25,26. ✠ 21:13 21:13 Êsai 56:7. ✠ 21:13 21:13 Jêr 7:11. ✠ 21:16 21:16 BCP 8:2.

¹⁸ Xröih xroq, jò hlài ta Jê-ru-sa-lem, Haq pangot. ¹⁹ Jò hnoq mòiq toq long pöc òi ti trong, Haq thia haten, mahaq hnoq toq hla. Haq doi ca long pöc aih: “Gè pi jò leq loh plì hòm.” Tajòì 'mòi long pöc aih croh.

²⁰ Mangai hóc tiaq hnoq bìac aih, wì hamàih, rai doi: “Gleq long pöc croh ma renh 'màng cô.”

²¹ Chuaq Jêxu tèo: “Jòq 'nàng Au doi ca pì: Tàng i manoh lùì, ùh ra'ngòt, ùh xài pì broq jah toq bìac ma khoi broq ca long pöc 'mat, mahaq tàng pì thê wang cô: ‘Dèch dàđeh, ca'nìh ta diac raxìq beq,’ bìac aih pì broq jah. ²² Jò pì waiq khàn, pì yóc manoh lùì Au, xìn bìac cleq ùh kè, òiq jah am ca pì.”

Cwìang Itai Da Chuaq Jêxu

(Möc 11:27-33; Luc 20:1-8)

²³ Chuaq Jêxu khoi mùt ta Hnem Cùh Waiq. Jò Haq 'nàng hnài Bàu Lem, i 'bài pajàu càn wa 'bài craq broq gàu Yothaiq thia haten bòch Haq: “Thài ôi! Ìh yóc cwìang enh leq broq bìac cô? Cabô am ca ìh cwìang itai aih?”

²⁴ Chuaq Jêxu tèo: “Au hadai bòch pì mòiq bìac, tàng pì tèo jah, Au hadai doi ca pì loq Au yóc cwìang enh leq broq bìac cô. ²⁵ Bìac 'baptem da Jon ma broq loh enh leq, enh plình loq enh con mangai?”

Wì hatình ca dabau: “Tàng bèn doi: ‘Loh enh plình,’ èh Haq doi ca bèn: ‘Gleq ùh lùì bìac aih?’ ²⁶ Mahaq tàng bèn doi: ‘Loh enh con mangai,’ bèn crè ca jàn, ma jah 'màng aih wì òiq đống doi Jon, haq mangai capoch thài Boc Plình.”

²⁷ Khoi èh, wì haq tèo: “Nhèn ùh 'nì.”

Chuaq Jêxu doi ca wì: “Au hadai ùh doi ca pì loq, Au yóc cwìang enh leq broq bìac cô.”

Bàu Àliah Baiq Ngai Con Calô

²⁸ “Pì hèm 'màng leq? Mòiq ngai aih i baiq ngai con calô. Haq doi dèh ca con ma adroi: ‘Con ôi, hì cô con loh broq ta wùan nho oq.’

²⁹ “Con aih tèo: ‘Au ùh enh lam broq!’ Mahaq atìq ca aih, haq hèm ùh khwài, hi khoi haq lam broq.

³⁰ “Hi khoi, haq lam trùh dèh ti con ma tìa, hadai haq doi 'màng aih. Con aih tèo haq: ‘Au lam oq!’ Mahaq haq ùh lam broq.

³¹ “Wa baiq ngai aih, con leq ma broq tiaq dèh manoh baq?”

Wì tèo: “Con ma adroi.”

Chuaq Jêxu doi ca wì: “Joaq 'nàng au doi ca pì, 'bài mangai gop thèq wa 'bài mangai gu cadrì tango yõc 'bac, jah mùt Diac Boc Plình adroi ca pì. ³² Ma jah 'màng aih Jon khoi tiaq trong ta-atoq trùh ti pì, mahaq pì ùh lùì haq. 'Bài mangai gop thèq wa 'bài mangai gu cadrì tango yõc 'bac khoi canao loq dèh ca tôiq lòi, èh cađac, hi lùì Haq. Pì khoi hnoq biac aih, xôq ùh chiùq cađac dèh tôiq lòi đòiq lùì Haq.”

Bàu Aliah Biac Mangai Pìt Nho

(Mõc 12:1-12; Luc 20:9-19)

³³ “Pì tamàng bàu aliah 'noiq hòm. I mangai aih pìt mòiq wùan nho, pagông hmu dudan broq pagia. 'Ne wùan haq chĩa hàm đòiq padit plì nho. Hi khoi, haq broq mòi q toq hnem gòm ha'nhèq. Èh haq am ca 'bài mangai ma abroq, pachac ca haq broq caq axong. Cla haq lam gùng 'noiq. ³⁴ Trùh jò gich plì, haq thê dèh hapõng lam bòch mangai ma broq wùan đòiq yõc plì.

³⁵ “'Bài mangai broq wùan nho rùp 'bài hapõng aih, 'nah ngai wì blai, 'nah ngai wì jêh đac, 'nah wì tèm hmu jêh đac. ³⁶ Craq wùan aih thê hòm dèh 'bài hapõng 'noiq yi bàc ca 'bài hapõng yàng adroi, èh wì broq ca 'bài hapõng

aih tìah ca 'bài hapǒng yàng adroi. ³⁷ Yàng ma atiq dǒng, craq aih thê dèh con calô lam trùh ti wì, haq doi: 'Wì jah iu con calô au.'

³⁸ "Mahaq jò 'bài mangai pìt nho hnoq con calô aih, wì doi ca dabau: 'Mangai cô raq mangai hatia. Manàiq beq bèn jêh đac haq, èh bèn yǒc xǒxech haq.' ³⁹ Wì rùp con calô aih hwenh 'noh enh gùng ca wùan nho, jêh đac.

⁴⁰ " 'Màng aih, jò cla craq wùan nho trùh, haq tình ca 'bài mangai ma broq wùan nho aih 'màng leq?"

⁴¹ Wì tèo Chuaq Jêxu: "Cla craq aih trùh jêh cachit 'bài mangai ngang dù aih, hi am ca mangai 'noi q mùan wùan haq, aih 'bài mangai ma jah am plì ca craq jò i plì."

⁴² Chuaq Jêxu doi ca wì: "Pì 'nhòq lah đóc bàu ta Sech Hadròih 'mòh?

" 'Pliang Hmu mangai thòq ma khoi dǒih đac,
hmu aih jah wìa Hmu gàu mùm hnem,
aih biac Chuaq broq,

aih biac halac jang ngìa bèn, pì ùh 'nì 'mòh?"[☆]

⁴³ "Taiq 'màng aih, Au doi ca pì, Diac Boc Plình jah yǒc khoi ca pì, am ca jàn ma 'noi q, aih jàn loh plì lem da Diac aih. ⁴⁴ Mangai leq clìh troq Hmu aih jah padit hech, mangai leq 'bìq Hmu aih tùc, jah hech hoch tìah ca blo."

⁴⁵ 'Bài pajàu càn wa mangai Pha-ri-si tàng bàu àliah aih, wì loq Chuaq Jêxu doi bàu aih patô wì haq. ⁴⁶ Wì chaq trong rùp Chuaq, mahaq crè ca jàn, ma jah 'màng aih jàn doi, Haq mangai capoch thai Boc Plình.

22

Bàu Àliah Biac Ban Ớng Mai

(Luc 14:15-24)

¹ Chuaq Jêxu hnài hòm wì xam bàu àliah, Haq doi:
² "Diac Plình tìah ca mòiq ngai bùa ma broq hiniang ta 'nèp

[☆] 21:42 21:42 BCP 118:22,23.

am con calô haq. ³ Bùa thê dèh hapǒng lam doi ca 'bài mangai haq khoi akhen, thê wì trùh caq hiniang, mahaq wì ùh waq trùh.

⁴ “Bùa thê hapǒng ma 'noi q hòm lam, haq tanap: ‘Doi ca 'bài mangai Au ma khoi akhen ca wì caq hiniang, 'màng cô: Hiniang khoi padon gêh. Khoi broq jam 'bo wa jam 'bo con bech. Hiniang khoi padon gêh. Xìn pì lam caq oq.’

⁵ “Mahaq wì ùh tamàng. Mòiq ngai lam mòiq trong, mangai cô lam ta ðùng, mangai tau lam atech. ⁶ I 'bài mangai 'noi q rùp hapǒng bùa, blai wì, khoi èh jêh đac. ⁷ Bùa loh nòih ðìq jaq, thê linh haq lam jêh đac wì mangai dù aih wa bùh cađac phôq wì.

⁸ “Khoi ca aih bùa doi dèh ca 'bài hapǒng: ‘Hiniang khoi padon, mahaq 'bài mangai ma khoi akhen ùh đang ca caq hiniang cô. ⁹ 'Màng cô, thê pì loh lam òi ti trong càn ta phôq, ùh kè ca glàm mangai leq, akhen wì lam trùh ta cô caq hiniang ta'nèp.’ ¹⁰ Hapǒng haq lam jàp trong phôq, ti gop ðìq ca 'bài mangai wì ma glàm, ùh kè ca mangai 'màng leq, mangai lem loq mangai dù. Wì ha'ngui bình ca hnem caq hiniang ta'nèp.

¹¹ “Bùa mùt ngan mangai caq hiniang, hnoq mòiq ngai ùh caxùnh eo hiniang ta'nèp. ¹² Haq doi ca mangai aih: ‘Ê ôi, gleq ìh mùt ta cô ùh caxùnh eo hiniang ta'nèp?’ Mangai aih ùh tèo.

¹³ “Bùa thê dèh 'bài hapǒng: ‘Rùp cật jènh tì haq beq, cađac haq enh gùng nòi clam clòiq, aih nòi hmoi crò wa cadrit hanenh.’

¹⁴ “Ma jah 'màng aih i bàc mangai khoi jah creo, mahaq toq 'biaq ngai ma jah ràih.”

Bìac Am Thèq ca Sêsa
(Mốc 12:13-17; Luc 20:20-26)

¹⁵ Khoi èh 'bài mangai Pha-ri-si pađim ca dabau, chaq trong ðoìq bahlac Chuaq Jêxu ta bàu capoch da Haq. ¹⁶ Wì thê dèh mangai hõc tiaq, wa toq 'biaq ngai, mangai tiaq bùa Hêrôt, lam bõch Chuaq: “Thài ôi, nhèn loq ìh Mangai da biac joq 'nàng, hnài wì trong Boc Plình joq 'nàng, ùh gen can mangai leq. ¹⁷ 'Màng aih, xin ìh am nhèn loq: Khòh am thèq ca bùa Sêsa loq ùh?”

¹⁸ Chuaq loq ca manoh 'mèq da wì Haq, doi: “Ôi 'bài mangai bàu lem, manoh dù, gleq pì ma thù Au? ¹⁹ Am ca Au ngan mòiq hliac 'bac.” Wì am ca Haq mòiq hliac 'bac. ²⁰ Haq doi ca wì: “'Mù cô 'mù cabô? Hiniq cô hiniq cabô?”

²¹ Wì doi: “Hiniq wa 'mù Sêsa.”

Chuaq Jêxu doi ca wì: “Thê pì am ca Sêsa biac leq da Sêsa, am ca Boc Plình biac leq da Boc Plình.”

²² Jò tàng bàu aih, wì hamàih ta manoh loh lam.

Bìac Rìh Hlài

(Mõc 12:18-27; Luc 20:27-40)

²³ Trom hì aih, i mangai Sa-đu-sê, aih mangai ma doi, ùh i ca can rìh hlài, lam haten ca Chuaq Jêxu bõch: ²⁴ “Thài ôi, Môise i doi: Tàng i mangai cachìt, mahaq ùh i ca con, 'màng cô oh mangai aih, phai yõc mai daq haq ðoìq jah i con, hi wèq xinoi wì haq. ²⁵ 'Màng cô, i tapèh ngai oh daq. Mangai daq yõc mai, khoi èh haq cachìt, mahaq ùh i ca con. Haq ðoìq hlài dèh mai dèh ca oh. ²⁶ Oh haq hadai cachìt, ðìq ca wì oh daq, tapèh ngai cachìt ðõng. ²⁷ Khoi èh, mangai cadrì aih hadai cachìt. ²⁸ 'Màng aih, jò rìh hlài, mangai cadrì cô broq mai cabô õi ta wì tapèh ngai oh daq, ma jah 'màng aih ðìq ca wì khoi broq õng haq?”

²⁹ Chuaq Jêxu tèo haq: “Pì khoi lac trong, taiq pì ùh loq ca Sech Hadròih, hadai ùh 'nì ca cwìang itai Boc Plình 'màng leq? ³⁰ Ma jah 'màng aih jò wì rìh hlài, pi i ban õng mai, mahaq 'bài mangai ma jah rìh hlài, tìah ca 'bình plình

õi ta plình. ³¹ Pì ùh lah đóc bàu Boc Plình khoi anoi bìac rìh hlài enh mangai cachit 'mòh? ³² 'Au Boc Plình da Ap-ra-ham, Boc Plình da Isac, Boc Plình da Jacôp.'[☆] Boc Plình, ùh xài Boc Plình da mangai cachit, mahaq da mangai rìh."

³³ Wì mangai bàc tàng bàu aih, wì hamàih ta manoh bìac hnài da Haq.

Ranenh ma Yi Nhet

(Môc 12:28-34; Luc 10:25-28)

³⁴ Mangai Pha-ri-si tàng doi Chuaq Jêxu broq ca 'bài Sa-đu-sê pi i ca trong jah tèo Haq. Wì tagop dabau. ³⁵ I mòiq ngai thài ranenh òi ta wì bòch bàu cô đòiq thù Chuaq:

³⁶ "Thài ôi, òi ta Ranenh, bàu thê leq ma yi nhet?"

³⁷ Chuaq Jêxu tèo Haq: "Ìh phai điq ca manoh, điq ca mahua yang, điq ca manoh hèm, loq waq ca Boc Plình, aih Boc Plình ìh."[☆] ³⁸ Aih bàu thê baxèm adroi wa yi nhet đong điq. ³⁹ Hadai 'màng aih, bàu thê baiq 'màng cô: "Thê ìh loq waq ca mangai haten hatia tìah ca ìh loq waq ca dađeh."[☆] ⁴⁰ Dìq ca Sech Ranenh, wa Bàu Mangai Capoch Thai Boc Plình, hadai loh enh baiq bàu thê aih."

Chuaq Jêxu Con Xau Bùa Đawit

(Môc 12:35-37; Luc 20:41-44)

⁴¹ Jò wì mangai Pha-ri-si tagop ti dabau, Chuaq Jêxu bòch wì: ⁴² "Chuaq Crich, pì hèm 'màng leq? Haq Con cabô?" Wì tèo: "Haq Con Xau bùa Đawit."

⁴³ Chuaq Jêxu doi ca wì haq: "Tàng 'màng aih, gleq bùa Đawit nhò Yang Hadròih creo Crich, Chuaq. Haq doi:

⁴⁴ "Chuaq doi ca Chuaq au:

"Ìh ha'ngui ti pah 'ma Au beq,
trùh jò Au đòiq wì ma git ca ìh

[☆] 22:32 22:32 LEA 3:6. [☆] 22:37 22:37 RAH 6:5. [☆] 22:39 22:39 Lêwi 19:1.

enh 'neq ca jènh ìh.”[☆]

⁴⁵ 'Màng aih, tàng Đawit creo Haq Chuaq, 'màng leq Haq jah Con Xau bùa Đawit?” ⁴⁶ Ûh mangai leq jah tèo Haq. Pàng hì aih, pi i mangai leq hùà bòch Haq hòm.

23

Chuaq Jêxu Trech Mangai Pha-ri-si

(Môc 12:38-40; Luc 11:39-44,46-52; 20:45-47)

¹ Khoi èh, Chuaq Jêxu doi ca mangai jàn wa mangai hõc tiaq Haq: ² “ 'Bàì thài ranenh wa mangai Pha-ri-si yõc cwìang Môise ðòiq hnài jàn. ³ 'Màng aih, thê pì iu wa broq tiaq ðiq ca bàu wì ma hnài, mahaq ùh thê pì tiaq dua bìac wì haq broq, ma jah 'màng aih, wì doi, mahaq ùh broq tiaq. ⁴ 'Bàì aih thê mangai broq lep, pòq trap, mahaq cla wì ùh enh ðùng trùh mòiq hadrang tì.

⁵ “Wì haq broq bìac leq xôq waq ca mangai 'noi q hnoq. I 'balet tah bàu enh Sech Hadròih da wì haq waq ca yi càn, caxi ha'mai cõng eo lè da wì haq xôq cadrai yi yõh. ⁶ Jò caq hiniang, wì haq loq enh ha'ngui gèq ti gàu ca 'bõng wa ha'ngui ti nòi yi ha'nhèq òi ta hnem tagop, ⁷ enh wì chao daðeh 'ne chòq, wa enh wì creo ca daðeh thài.

⁸ “Mahaq, pì apaq thê mangai leq creo ca pì thài, ma jah 'màng aih pì i mòiq toq Thài, wa ðiq ðõng ca pì broq oh daq. ⁹ Òi ta crõng taneh, apaq creo ca mangai leq baq, ma jah 'màng aih pì i mòiq toq Baq, òi ta plinh. ¹⁰ Hadai apaq thê mangai leq creo ca pì craq, ma jah 'màng aih pì i mòiq toq Craq, aih Chuaq Jêxu Crich. ¹¹ Cabò broq càn òi ti pì, mangai aih ep broq hapõng pì. ¹² Mangai leq padèch daðeh, èh haq 'bìq ha'neq, mangai leq broq 'yoh èh jah dèch haq ha'nhèq.

[☆] 22:44 22:44 BCP 110:1.

¹³ “Nan xa am ca pì 'bài thài ranenh wa mangai Pha-ri-si. Pì mangai bàu lem, manoh dù, taiq pì clenh 'màng Diac Plinh enh ngĩa ca wì, èh pì ùh mùt, hadai ùh am ca mangai 'noi q mùt. ¹⁴ Nan xa am ca pì 'bài thài ranenh wa mangai Pha-ri-si, bàu lem, manoh dù, pì waiq khàn dùnh ðòiq bahlèp biac padô 'nùt 'bài gu cadrì hadrô, ðòiq hi yõc atùng hnem wì, 'màng aih pì ep chiuq can baxa yi hlàm.

¹⁵ “Nan xa am ca pì 'bài thài ranenh wa mangai Pha-ri-si, bàu lem, manoh dù. Pì lam jàp trong Diac trong go, ðòiq broq ca mòiq ngai mùt ðaoq pì. Jò wì khoi tiaq pì, pì hnài wì haq broq wìa con da ùnh baxa yi hnao ca pì baiq yàng.

¹⁶ “Nan xa am ca pì, mangai ùh xau mat ma ajèn trong. Pì hnài: ‘Tàng mangai leq patô Hnem Cùh Waiq haq pachac, èh jah cađac bàu pachac, mahaq patô wang ta Hnem Cùh Waiq pachac, èh ùh jah cađac bàu pachac aih.’

¹⁷ Ô mangai blùng wa ùh xau mat! Wang loq Hnem Cùh Waiq ma broq ca wang hadròih? Ma leq yi nhet? ¹⁸ Pì doi: ‘Tàng ma leq patô ca'bõng tadreo èh pachac, bàu pachac aih jah cađac, mahaq patô dahwèq caq ta ca'bõng tadreo, èh ùh jah cađac bàu pachac aih.’ ¹⁹ Ô mangai ùh xau mat tau! Dahwèq caq loq ca'bõng tadreo broq ca dahwèq loh hadròih, ma leq ma yi nhet? ²⁰ 'Màng aih mangai leq patô ca'bõng tadreo èh pachac, aih patô ca'bõng tadreo wa dahwèq ta ca'bõng tadreo. ²¹ Mangai leq patô Hnem Cùh Waiq haq pachac, aih patô Hnem Cùh Waiq wa Haq ma òi ta Hnem Cùh Waiq. ²² Mangai leq patô plinh èh pachac, aih patô gèq bùa Boc Plinh wa Haq ma ha'ngui ta gèq bùa aih.

²³ “Nan xa ca pì thài ranenh wa mangai Pha-ri-si, bàu lem, manoh dù! Ma jah 'màng aih pì am ca Boc Plinh mòiq phàn mòiq jàt cachi q 'bõchà, ngè xua thùm, wa cachi q càng, mahaq pì cađac biac ma càn òi ti Ranenh, aih biac

ta-atoq, biac loq xa-öch ca wì, wa biac wèq dèh manoh. Aih biac pì phai broq, mahaq xôq broq biac ma 'yoh tau. ²⁴ Ô mangai ùh xau mat ma ajèn trong! Pì lóc đac roi 'yoh, mahaq lôn lócđa!

²⁵ “Nan xa am ca pì 'bài thài ranenh wa mangai Pha-ri-si, bàu lem, manoh dù! Pì haliang doi wa dôt enh gùng, mahaq enh trom, bình halùih biac atùng wa manoh ham.

²⁶ Ô mangai Pha-ri-si ùh xau mat! Adroi phai haliang enh trom doi chrõng wa dôt, khi òh enh gùng hadai jah hreo.

²⁷ “Nan xa am ca pì thài ranenh wa mangai Pha-ri-si, bàu lem, manoh dù! Pì tìah ca ralùng hanang broq taboc enh gùng đòiq haq lem, mahaq enh trom toq caxènh mangai cachìt wa can xua om. ²⁸ Pì hadai 'màng aih, enh gùng broq tìah ca mangai ta-atoq, mahaq enh trom pì bình bàu lem manoh dù wa ùh òh tiaq ranenh.

²⁹ “Nan xa am ca pì 'bài thài ranenh wa mangai Pha-ri-si, bàu lem, manoh dù! Pì broq am ralùng hanang mangai capoch thai Boc Plình, wa padì hmu teo ralùng hanang mangai ta-atoq. ³⁰ Pì doi: ‘Tàng nhèn rìh adrình ta 'nhòng 'bài boc yaq bèn, nhèn ùh thê wì jêh đac mangai capoch thai Boc Plình.’ ³¹ 'Màng aih, pì doi đacđeh 'bài con xau mangai ma jêh đac mangai capoch thai Boc Plình. ³² 'Màng aih pì broq gêh biac dù boc yaq pì beq!

³³ “Ô xinoi bìh plõng tau! Broq 'màng leq pì ma jah claih ca 'bau ùnh? ³⁴ Taiq 'màng aih Au thê 'bài mangai capoch thai Boc Plình, mangai khôn rabiaq, wa thài ranenh lam trùh ti pì. Pì jêh đacđac wì, tiang đình wì ta long pagat, blai wì ta hnem tagop, wa pì chaq rùp wì enh phòq cô trùh phòq tau. ³⁵ 'Màng aih, òiq ca mahem ùh i ca tôiq khi ta-ùc ta crõng taneh, ta-ùc hlài ta pì, enh mahem Abên, mangai ta-atoq, trùh mahem Xa-cha-ri, con 'Ba-ra-chi, aih mangai pì jêh đac ta'ne Hnem Cùh Waiq wa ca'bõng

tadreo. ³⁶ Joq 'nàng Au doi ca pì, òi q ca bìac aih jah trùh ti xinoi cò.

³⁷ “Ô Jê-ru-sa-lem! Jê-ru-sa-lem! Gè jêh cađac wì mangai capoch thai Boc Plình, tèm hmu 'bài mangai wê bàu lam trùh ta gè! Khoi bəc yàng Au enh tagop 'bài con caiq gè, 'màng ca ia creo ðeh ca con trùh, rôp enh 'neq ca panan haq, mahaq pì ùh waq. ³⁸ Cô èh hnem pì ùh i cabô òi. ³⁹ Ma jah 'màng aih, Au doi ca pì, pàng cô pì ùh hnoq Au hòm trùh jò pì jah doi: ‘Am xôq ramốt ca Haq ma canòm hiniq Chuaq lam trùh.’[☆]”

24

Chuaq Jêxu Anoi Bìac Haq Wìh Hlài

(Mồc 13:1-2; Luc 21:5-6)

¹ Chuaq Jêxu loh enh Hnem Cùh Waiq padon lam. 'Bài mangai hỏc tiaq patô ca Haq òi q ca bìac broq lem da Hnem Cùh Waiq. ² Mahaq Chuaq Jêxu doi ca wì: “Pì i hnoq òi q ca bìac 'mat ùh? Joq 'nàng Au doi ca pì, ùh jah i mòi q toq hmu leq òi raxon enh 'nhèq ca hmu 'noi q, ma ùh taclìh ðống.”

³ Jò Chuaq Jêxu 'nang ha'ngui ta wang Ôliu, mangai hỏc tiaq trùh crài ti Haq, bòch Haq: “Xìn Chuaq doi ca nhèn, jò leq bìac aih jah trùh? I ca teo patô leq ðòi q patô ca nhèn bìac ìh trùh hì ma atìq lùch?”

⁴ Chuaq Jêxu tèo wì: “Thê pì wèq ðađeh, apaq ðòi q mangai leq padô 'nùt pì. ⁵ Ma jah 'màng aih i bəc ngai lam trùh patiah ca hiniq Au, doi: ‘Au Crich.’ 'Màng aih padô 'nùt bəc ngai. ⁶ Pì jah tàng anoi trùh bìac tajêh poh gùng haten, wa bàu anoi trong tajêh poh gùng hangai. Khòh wèq ðađeh, apaq yùq crè, ma jah 'màng aih bìac aih phai trùh, mahaq 'nhòq trùh hi atìq lùch. ⁷ Jàn cô ta'blêq ca

[☆] 23:39 23:39 BCP 118:26.

jàn tau, Diac tau ta'blêq ca Diac tì. Bàc gùng i biac pangot hrah wa taneh dalàc. ⁸ Mahaq biac aih toq baxèm jò nan xa càc.

⁹ “Khoi èh, wì jah rùp càt pì, jêh đac pì, rìm Diac git ca pì taiq pì canòm ca hiniq Au. ¹⁰ Jò aih bàc ngai ùh enh tiaq hòm, blòq dèh oh daq wa git ca dabau. ¹¹ 'Bàì mangai amòng capoch bàu loq adroi, jah padô 'nùt bàc ngai. ¹² Biac dù jah bàc tam, 'màng aih biac loq waq ca dabau pi i hòm. ¹³ Mahaq mangai leq cajap manoh trùh lùch, jah dèch haq. ¹⁴ Bàu Lem cô da Diac Boc Plình hi jah anoi hlài ca rìm jàn jàp ta crông taneh. Jò aih biac atìq lùch da crông taneh jah trùh.

¹⁵ “Jò pì jah hnoq biac 'mèq 'mac hech hoch òi ta nòi Hadròih, ✠ 'màng ca Đa-ni-ên mangai capoch thai Boc Plình khoi doi adroi, cabô leq đóc phai hèm. ¹⁶ Cabô 'nang òi ta gùng Judia, cadàu tọc ta wang beq. ¹⁷ Mangai leq òi ta của hnem phai cadàu, apaq loh yóc cùng hang ta hnem. ¹⁸ Mangai leq òi ta ðùng hadai, apaq hlài ta hnem yóc eo. ¹⁹ Ta 'bài hì aih nan xa am ca gu cadrì òi jiang wa ban con nga. ²⁰ Pì phai waiq khàn ðòiq ùh nhet cadàu lam jò ralìm loq Hì Sabat. ²¹ Jò aih jah i biac nan xa càc, enh jò baxèm broq plình crông taneh trùh manàiq, 'nhòq lah i 'màng aih. Atìq ca aih xôq pi i hòm.

²² “Tàng 'bài hì aih ùh yi 'biaq, ùh i mòiq ngai leq jah òi rìh, mahaq taiq mangai khoi jah ràih, 'bài hì aih khoi jah yi 'biaq. ²³ Jò aih, tàng i cabô doi ca pì: ‘Cô Crich òi ta cô,’ loq òi ta tau, ‘apaq lùì.’ ²⁴ Ma jah 'màng aih bàc Crich amòng wa mangai amòng capoch bàu Boc Plình broq trong halac càc. Tàng gleq jah, wì haq hadai lam padô 'nùt 'bài mangai khoi jah ràih. ²⁵ Cô, Au doi adroi am ca pì:

²⁶ “Tàng wì doi ca pì: ‘Haq òi ta nòi ðùng hawit, apaq lam trùh.’ Cô, ‘Haq òi trom hnem.’ Apaq lùì. ²⁷ Ma jah

✠ 24:15 24:15 Đan 9:27; 11:31; 12:11.

'màng aih, 'màng ca camlet xreo enh pah mat mahì loh trùh mat mahì mùt, bìac Con Mangai trùh hadai 'màng aih. ²⁸ Nòi leq i ngè cachìt, nòi aih bàc chìm cliang kèn tagop.

²⁹ “Atìq ca hì nan xa aih,
 “‘tajòì 'mòi mat mahì loh ca clam,
 mat khê pi 'ngah,
 'bài halǒng clih enh plình
 wa cwiàng itai òi ta plình dalàc.’☆

³⁰ “Jò aih i teo Con Mangai mahno loh òi ta plình, òi ca con mangai òi crǒng taneh loh ca mango, crò hmoi, jò hnoq Con Mangai loh òi ta yùc xam can cwiàng itai 'ngah 'ngai càn. ³¹ Haq thê 'bình plình hlôi dèh atèh ken, 'ràng tagop mangai Haq khoi ràih loh enh pôn pah òi ca crǒng taneh.”

Bàu Aliah Bìac Long Pǒc

(Mǒc 13:28-31; Luc 21:29-33)

³² Ngan bàu aliah ca long pǒc beq. Jò hamenh long loh hamǒng chet hla, aih pì loq ten trùh jò padrang. ³³ “'Màng aih jò pì hnoq bìac cô, pì loq Con Mangai ten trùh. Haq 'nang yòng enh gùng ca 'mang. ³⁴ Joq 'nàng Au doi ca pì: Xinoi cô ùh cwa adroi jò bìac tau 'nhòq trùh. ³⁵ Plình crǒng taneh cô èh jah hnhung, mahaq bàu Au capoch ùh jò leq hnhung.”

Hì wa Jò Chuaq Trùh

(Mǒc 13:32-37; Luc 17:26-30,34-36)

³⁶ “Mahaq hì wa jò aih, ùh i ca mangai leq jah loq. 'Bình Plình òi ta plình ùh loq, Con hadai ùh loq, toq Baq loq hêq. ³⁷ Tìah da hì Noah 'màng leq, hì da Con Mangai hadai 'màng aih. ³⁸ Ma jah 'màng aih adroi ca diac càn wì caq, wì ôq, wì ta'nèp ǒng mai, trùh hì Noah mùt ta bong, ³⁹ wa

☆ 24:29 24:29 Êsai 13:10; 34:4.

wì ùh 'nì cacleq trùh jò diac càn trùh, hapùih đac òiq ca mangai. Jò Con Mangai trùh, hadai 'màng aih. ⁴⁰ Jò aih i baiq ngai gu calô ỏi ta ðùng, jah yỏc mòiq ngai, èh ðòiq mòiq ngai ỏi hlài. ⁴¹ I gu cadri baiq ngai 'nang xai 'mau, jah yỏc mòiq ngai, èh ðòiq mòiq ngai ỏi hlài.

⁴² “ 'Màng aih phai rìu hmàng, pì ùh loq hì leq Chuaq da pì trùh. ⁴³ Pì loq, tàng craq hnem jah loq adroi jò leq mangai atùng padon mùt ta hnem haq, haq rìu ngan, ùh am pùng panàt mùt dèh ta hnem. ⁴⁴ 'Màng aih, pì hadai phai padon, ma jah 'màng aih Con Mangai trùh ta jò pì ùh ngò.

⁴⁵ “Mangai leq broq hapỏng ma i manoh loq wẻq dèh bàu wa rabiaq, craq haq thê haq wẻq wì hapỏng ta hnem. Rìm hì haq padon am ca wì dahwẻq caq troq jò. ⁴⁶ Xôq ramỏt ca hapỏng aih, jò craq haq trùh, hnoq haq broq 'màng aih. ⁴⁷ Joq 'nàng au doi ca pì, craq haq am ca hapỏng aih cwìang wẻq òiq ca bìac craq haq. ⁴⁸ Mahaq tàng hapỏng dù hèm ta manoh: ‘Craq au dùnh men trùh,’ ⁴⁹ 'màng aih, haq blai wì ma broq hapỏng pajùm ca haq, hì ôq wa caq ti mangai dù. ⁵⁰ Craq haq jah lam trùh ta hì haq ùh ngò wa jò haq ùh loq. ⁵¹ Craq haq baxa haq hlàc hlac cađac haq enh gùng ỏi ti 'bài mangai bàu lem, manoh dù. Aih nòi i hmoi crò wa cadrit hanenh.”

25

Bàu Aliah Mòiq Jàt Ngai Cadri Adrùh

¹ “Diac Plinh tìah ca 10 ngai adrùh wê ðen lam ðìh con ỏng. ² Ỏi ta wì aih i padam ngai blùng, padam ngai khôn rabiaq. ³ Mangai blùng wê ðen mahaq ùh wê tam dầu. ⁴ Mangai khôn rabiaq wê ðen wa wê tam dầu hòm. ⁵ Jò con ỏng xỏi trùh, òiq ca wì enh cùi, hì khoi wì haq cùi hnia.

⁶ “Trùh 'ne 'màng, i bàu creò dèh, doi: ‘Tau, con ỏng khoi trùh, loh ðìh haq beq!’

⁷ “Dìq ca wì haq yòng, bùh hlài dèh đen. ⁸ Mangai blùng doi ca mangai khôn rabiaq, xìn am ca nhèn dầu pì dìq, đen nhèn khoi ten pat.

⁹ “Mahaq wì ma khôn rabiaq doi: ‘Yùq dầu ùh tòm dìq ca bèn, thê pì chaq wì ma tech dầu, èh pì rớt beq.’

¹⁰ “Jò wì lam rớt dầu, con ổng trùh. Ma leq ma gòm aih jah mùt ti haq nòi caq hiniang, khoi èh clenh 'mang.

¹¹ “Khoi ca aih, 'bài mangai gu adrùh ma 'noi q lam trùh doi: ‘Chuaq ôi, Chuaq ôi, xìn pèh 'mang ca nhèn!’

¹² “Mahaq Haq doi: ‘Joq 'nàng Au doi ca pì, Au ùh 'nì ca pì.’

¹³ “ ‘Màng aih pì phai ngan, taiq pì ùh 'nì hì leq wa jò leq Con Mangai trùh.’”

Bàu Aliah ca Talàng 'Bac

(Luc 19:11-27)

¹⁴ “Diac Plình tìah ca mangai tau padon lam hangai. Haq creò dìq ca hapõng am ca wì wèq cùng hang haq.

¹⁵ Haq am ca mangai cô, padam talàng 'bac, mangai tau, baiq, mangai tì, mòi q. Haq am tiaq can hlàt da tang ngai, khoi èh haq loh lam. ¹⁶ Tajòi 'mòi mangai ma khoi yóc padam talàng lam padro, jah padam talàng ma 'noi q hò m.

¹⁷ Mangai ma yóc baiq talàng hadai lam padro jah tam baiq ma 'noi q. ¹⁸ Mangai ma yóc mòi q talàng, broq trom ta taneh catùh hlèp 'bac cra q haq.

¹⁹ “Khoi ca aih dùnh, cra q wì haq hlài, creò dèh ca wì hapõng aih trùh thê wì tình sô. ²⁰ Mangai ma khoi yóc padam talàng, 'ràng tam padam talàng 'noi q hò m. Haq doi: ‘Waiq Chuaq, ìh khoi am ca au padam talàng. Ngan cô, au khoi jah tam padam talàng 'noi q hò m.’

²¹ “Cra q haq doi: ‘Ôi hapõng i manoh lem wa manoh wèq bàu, ìh khoi i manoh wèq bàu ta bìac 'yoh, au jah am ca ìh cwàng broq bìac càn, ìh trùh ta cô bùi pajùm ti au.’

²² “Mangai ma khoi yǒc baiq talàng 'bac, hadai lam trùh doi: ‘Waiq craq, ìh khoi am ca au baiq talàng. Ngan cô, au khoi jah tam baiq talàng 'bac ma 'noi q hò m.’”

²³ “Craq haq doi: ‘Ôi hapǒng i manoh lem, ìh khoi i manoh lem enh bìac 'yoh, au jah am ca ìh cwàng broq bìac càn, ìh trùh ta cô bùi pajùm ti au beq.’”

²⁴ “Mangai ma khoi yǒc mòi q talàng 'bac hadai lam trùh doi: ‘Waiq craq, au loq ca ìh mangai gang manoh, gat nòi ìh ùh rai adrech, ìh tǒch nòi ìh ùh rai 'noh. ²⁵ Taiq 'màng aih au crè. Au broq trom catùh hlèp ǒi ta taneh talàng 'bac ìh. Cô 'bac ìh, au am hlài da ìh.’”

²⁶ “Craq haq padreo bàu hlài doi ca haq: ‘Ôi hapǒng dù wa aroh, ìh loq au gat nòi au ùh rai, au tǒch nòi au ùh rai 'noh. ²⁷ 'Màng cô ìh khòh am 'bac au ca mangai padro, trùh jò au hlài, au jah yǒc hlài 'bac aih wa lòiq haq.’”

²⁸ “ ‘ ‘Màng aih pì phai yǒc 'bac enh mangai cô, am ca mangai ma khoi i 10 talàng. ²⁹ Taiq mangai leq khoi i, jah am tam ca haq, mangai aih jah bàc, mahaq mangai leq ma ùh i, jah yǒc hloi phàn haq ma i. ³⁰ Hapǒng ma ùh loh cleq cô, 'noh đac haq enh gùng nòi clam clôi q, ǒi ta aih i toq bìac hmoi rawah wa cadrit hanenh.’”

Bìac Hadrah ma Atìq

³¹ “Jò Con Mangai jah trùh ǒi ti 'ngah 'ngai lem Haq pajùm ti 'bài 'bình plính, èh Haq jah ha'ngui ti gèq bùa 'ngah 'ngai da Haq. ³² Diq ca jàn rìm Diac jah tagop enh ngìa ca Haq, hi khoi Haq lah baiq phàn tìah ca mangai ban trùu lah trùu wa bubi. ³³ Haq òi q trùu ti pah 'ma Haq, bubi òi q pah 'ngeo.’”

³⁴ “Jò aih bùa jah doi ca wì ǒi ti pah 'ma Haq: ‘Ôi 'bài mangai Baq Au ma am xòq ramǒt, trùh ta cô beq, nhàn yǒc Diac Plính khoi padon òi q ca pì jò baxèm broq plính crǒng taneh, ³⁵ taiq jò Au pangot, pì am Au pua caq. Jò Au

croh ranǒng, pì am Au diac ôq. Jò Au mangai tamoi ma pì ùh canao, èh pì pèh 'mang thê Au mùt. ³⁶ Jò Au rahòng cwàn, pì am ca Au eo cwàn. Jò Au ùh hrǒc, pì lam hmàih Au. Jò Au ǒi tù, pì lam trùh ti Au.'

³⁷ “Jò aih wì mangai ta-atoq bòch Haq: ‘Chuaq ôi, jò leq nhèn hnoq ìh pangot, ma am ca ìh pua caq, croh ranǒng, am ca ìh ôq diac? ³⁸ Jò leq nhèn loq ca ìh mangai tamoi ùh canao ma pèh 'mang ca ìh, loq thiùq ca eo cwàn ma am ca ìh caxùnh? ³⁹ Jò leq nhèn hnoq ìh ùh hrǒc, loq ǒi ta hnem tù ma lam hmàih ca ìh?’

⁴⁰ “Bùa jah doi ca wì: ‘Jòq 'nàng Au doi ca pì, jò pì broq am ca mòiq ngai ðiq ca jaq ùh nèn ǒi ta oh daq Au, aih pì khoi broq ca Au.’

⁴¹ “Khoi èh Haq doi ca wì ma ǒi pah 'ngeo haq: ‘Ôi mangai ma 'bìq waiq hanip, wia hangai ca Au beq, mùt ta nòi 'bau ùnh khoi padon ca can kiac Satan wa can kiac haq. ⁴² Ma jah 'màng aih, Au pangot, pì ùh am ca Au pua caq. Au croh ranǒng, pì ùh am ca Au diac ôq. ⁴³ Au mangai tamoi ùh canao, pì ùh pèh 'mang ca Au. Au thiùq ca eo cwàn, pì ùh am ca au. Au ùh hrǒc wa ǒi ta hnem tù, pì ùh lam hmàih ca Au.’

⁴⁴ “Khoi èh wì padreo hlài bàu doi: ‘Chuaq ôi, jò leq nhèn hnoq Chuaq pangot wa croh ranǒng, mangai tamoi ùh canao, thiùq ca eo cwàn, ùh hrǒc ǒi ta hnem tù, nhèn ùh jùp ðò ìh?’

⁴⁵ “Haq doi ca wì: ‘Jòq 'nàng Au doi ca pì, jò pì ùh broq bìac aih ca mòiq ngai ta 'bài mangai ðiq ca jaq ùh nèn cô, aih pì hadai ùh broq ca Au.’

⁴⁶ “'Màng aih, 'bài mangai cô mùt nòi chiuq baxa hloi hloi, mahaq wì mangai ta-atoq mùt nòi rih hloi hloi.”

26

*Bìac Pađim Jêh Cađac Chuaq Jêxu**(Môc 14:1-2; Luc 22:1-2; Jon 11:45-53)*

¹ Jò Chuaq Jêxu khoi gêh hnài wì ðìq ca bàu aih, Haq doi ðèh ca 'bài mangai hóc tiaq: ² “Pì loq, òi baiq hì hòm, trùh Hì Lè Lam Cwa, èh Con Mangai jah jao am ta tì wì ma tiang ðình Haq ta long pagat.”

³ Jò aih 'bài wì pajàu càn wa 'bài craq broq gàu phôq, wì tagop dabau ti xàn enh ngìa hnem pajàu ha 'nhèq Caiphe.

⁴ Wì pađim ca dabau chaq trong ðòiq jah rùp jêh ðac Chuaq Jêxu. ⁵ Wì haq doi: “Ùh khòh broq bìac aih trom hì lè, yùq wì jàn loq baxrông tajêh.”

*Chuaq Jêxu Chìuq Xùt Dàu ta 'Bê-tha-ni**(Môc 14:3-9; Jon 12:1-8)*

⁶ Jò Chuaq Jêxu òi plài 'Bê-tha-ni ta hnem Simôn, adroi nèh haq mangai bacùn. ⁷ I mòiq ngai gu cadrì wê cabi taboc broq xam ngóc, tah dàu xua thùm canaq 'bac lam trùh ti Haq, ùc ta gàu Haq jò Haq 'nang ha 'ngui acaq.

⁸ Mangai hóc tiaq hnoq 'màng aih, loh nòih, doi: “Gleq ma ùc 'ngwan ca dàu 'màng cô? ⁹ Dàu cô tech jah bàc 'bac ðòiq am ca mangai pa.”

¹⁰ Chuaq Jêxu loq bìac aih, hi doi ca wì: “Gleq pì ma jah broq xa ca haq? Haq khoi broq bìac lem am ca Au. ¹¹ Ma jah 'màng aih, pì i mangai pa òi ti pì hloi hloi, ✠ mahaq Au ùh i òi ti pì hloi hloi. ¹² Haq ùc dàu xua thùm òi ti chac Au, aih padon catùh Au. ¹³ Joq 'nàng Au doi ca pì: ðìq ca crông taneh, jang leq Bàu Lem cô jah anoi hlài, hadai jah anoi hlài bìac gu cadrì cô khoi broq ðòiq hmàng ca haq.”

*Mangai Blòq Chuaq**(Môc 14:10-11; Luc 22:3-6)*

✠ 26:11 26:11 RAH 15:11.

¹⁴ I mòi q ngai ta wì 12 ngai, mangai hóc tiaq, hiniq haq Juda Ich-ca-ri-ôt, trùh ta 'bài pajàu càn, ¹⁵ bòch wì: “Tàng au jao am ca pì Chuaq Jêxu, èh pì baha au toq leq?” Wì am ca haq 30 capiac 'bac. ¹⁶ Pàng jò aih, haq chaq jò ta'nàih òi q jao am Chuaq Jêxu.

¹⁷ Hì baxèm Lè 'Benh ùh Tah Blo, mangai hóc tiaq lam haten ca Chuaq Jêxu doi ca Haq: “Ìh enh waq nhèn padon ìh caq Lè Lam Cwa òi ta leq?”

¹⁸ Haq doi ca wì: “Pì mùt ta phòq, glàm mòi q ngai ta aih, doi ca haq: ‘Mangai Thài doi: Jò Au ten trùh, Au wa mangai hóc tiaq Au enh caq Lè Lam Cwa òi ta hnem ìh.’” ¹⁹ Mangai hóc tiaq broq tiaq bàu Chuaq Jêxu, padon dahwèq caq lè.

²⁰ Trùh jò xèq, Chuaq Jêxu 'nang ha'ngui acaq ti 12 ngai, mangai hóc tiaq. ²¹ Jò wì caq, Chuaq Jêxu doi: “Jòq 'nàng Au doi ca pì, i mòi q ngai òi ti pì jah blòq Au.”

²² 'Bài mangai hóc tiaq loh ca mango. Tang ngai bòch Haq: “Chuaq ôi, au ùh xài?”

²³ Haq doi: “Mangai leq chùq 'benh ta dòt adrình ca Au, aih mangai blòq Au. ²⁴ Con Mangai loh lam tiah ca bàu khi achìh ta Sech Hadròih, mahaq nan xa am ca mangai ma blòq Au! Tàng ùh xa-ông ca haq yi lem.”

²⁵ Juda, mangai blòq Chuaq, bòch: “Thài ôi, au ùh xài?” Chuaq doi ca haq: “Jòq 'nàng tiah ca bàu ìh ma khi doi.”

Lè Hiniang Hadròih

(Mốc 14:22-26; Luc 22:14-20; 1Cô 11:23-25)

²⁶ Jò 'nang caq, Chuaq Jêxu yóc 'benh manè apôi, èh goh am ca mangai hóc tiaq. Haq doi: “Yóc caq beq. Cô chac Au.”

²⁷ Haq yóc doi chrõng, manè apôi, èh am ca mangai hóc tiaq. Haq doi: “Dìq ca pì ôq beq. ²⁸ Cô mahem Au, mahem da bìac wêh jao ma neo, khi ùc 'noh òi q jah baxõng tòi q

ca bác ngai. ²⁹ Mahaq Au doi ca pì, pàng cô ta èh, Au ùh ôq diac pì nhỏ cô hòm, trùh hì Au jah ôq pì nhỏ ma neo pajùm ca pì òi ta Diac Baq Au.”

³⁰ Jò wì khoi calêu 'bõih Hadròih, Chuaq Jêxu wa mangai hõc tiaq Haq loh enh aih tõc ta wang Ôliu.

Chuaq Jêxu Doi Èh Pêtrô Hangah Haq

(Mõc 14:27-31; Luc 22:31-34; Jon 13:36-38)

³¹ Hi khoi, Chuaq Jêxu doi ca wì: “Mang cô pì catõih cro ta manoh taiq Au, tiaq bàu Sech Hadròih khoi achìh:

“‘Au jah jêh Mangai Ban Trìu,

èh trìu cadàu tac mac.’[☆]

³² Mahaq atìq ca Au rìh hlài, Au lam ta gùng Ga-li-lê adroi ca pì.”

³³ Pêtrô doi: “'Nhac ca òiq ca wì cađac ìh, au ùh jò leq cađac ìh.”

³⁴ Chuaq Jêxu doi ca haq: “Jòq 'nàng Au doi ca ìh, mang cô, ia 'nhòq rõng, ìh jah doi piq yàng, ìh ùh loq ca Au.”

³⁵ Pêtrô doi ca Haq: “'Nhac ca au cachit ti ìh, au xôq ùh hangah ìh.” Dìq ca mangai hõc tiaq hadai doi 'màng aih.

Bàu Chuaq Waiq Khàn ta Wùan

(Mõc 14:32-42; Luc 22:39-46)

³⁶ Khoi èh, Chuaq Jêxu wa mangai hõc tiaq lam trùh ta wùan Ghêt-sê-ma-nê. Haq doi: “Ha'ngui gòm Au jang cô. Au lam waiq khàn jang tau.” ³⁷ Haq 'ràng Pêtrô wa baiq ngai con Xê-bê-đê lam ti Haq. Haq loh ca mango châu òiq ca jaq. ³⁸ Haq doi: “Mahua Yiang Au loh ca mango trùh cachit. Pì phai òi rìu ti Au ta cô.”

³⁹ Hi khoi, Haq lam toq 'biaq hòm, cùp mat ta taneh. Haq waiq khàn, doi: “Baq ôi, tàng gleq jah, xìn dõih doi chrõng cô hangai ca Con, mahaq ùh tiaq manoh Con, tiaq manoh Baq.”

[☆] 26:31 26:31 Xach 13:7.

⁴⁰ Khoi ca aih, Haq lam trùh ti mangai hõc tiaq hnoq wì cùi. Haq doi ca Pêtrô: “Pì ùh jah rìu pajùm ca Au mòiq jò 'mòh? ⁴¹ Rìu beq, yòng waiq khàn, waq ca pì ùh mùt trong padô 'nùt. Manoh loq enh, mahaq chac xech ùh i cwiang 'blêq.”

⁴² Haq lam yàng baiq waiq khàn. Haq doi: “Baq ôi, tàng doi cô ùh jah hangai ca Con, tàng Con phai ôq, xìn broq gêh tiaq manoh ìh.”

⁴³ Mòiq yàng hòm Haq trùh ti wì, hnoq mangai hõc tiaq 'nang cùi, taiq mat wì pì jah blèch. ⁴⁴ Haq lam khoi ca wì, waiq khàn yàng piq, capoch bàu 'màng ca yàng adroi.

⁴⁵ Khoi èh, Haq lam trùh ti mangai hõc tiaq doi ca wì: “Jò cô pì xôq ôi cùi padài 'mòh? Khoi trùh jò Con Mangai 'bìq jao mùt ta tì wì mangai dù. ⁴⁶ Yòng beq, tau mangai blòq Au khoi trùh.”

⁴⁷ Jò Chuaq Jêxu 'nang doi, Juda, aih mòiq ngai ôi ta 12 ngai hõc tiaq trùh, 'nong wì bacc ngai wê chang wa long. Wì aih trùh enh pajàu càn wa 'bài craq broq gàu ma khoi thê wì lam. ⁴⁸ Mangai ma blòq Chuaq Jêxu khoi doi ca wì adroi: “Mangai leq au ma hìp Haq, aih raq Haq, rùp Haq beq.” ⁴⁹ Tajòi 'mòi Juda lam haten ca Chuaq Jêxu, haq doi: “Ôi Thài!” Khoi èh hìp Haq.

⁵⁰ Mahaq Chuaq Jêxu doi ca haq: “Ê bua, broq gêh bìac da ìh beq.”

Khoi èh wì rùp Chuaq Jêxu. ⁵¹ Ta'ngac jò aih, i mòiq ngai ôi ti Chuaq Jêxu yõc chang jêh hapõng pajàu ha'nhèq, põt catech ca don hapõng aih.

⁵² Chuaq Jêxu doi ca haq: “'Mùt hlài chang ìh ta hnup beq, ma jah 'màng aih, cabô ma wèq chang, mangai aih cachit ca chang. ⁵³ ìh ùh 'nì, Au jah xìn Baq Au, tajòi 'mòi Haq jah am ca Au yi hnao ca 70.000 'bình plình

'mòh? ⁵⁴ Mahaq tàng broq 'màng aih, èh jah tiaq bàu Sech Hadròih 'màng leq, bàu ma khoi doi adroi bìac cô?"

⁵⁵ Jò aih Chuaq Jêxu doi ca wì: "Pì wê chang wa long lam rùp Au cô tiàh ca mangai atùng 'mòh? Rìm hì Au ha'ngui hnài òi ti Hnem Cùh Waiq. Jò aih gleq pì ùh rùp Au? ⁵⁶ Mahaq òiq ca bìac cô, aih broq xit hlài wì pajàu Boc Plình khoi achìh adroi." Khoi èh òiq ca mangai hõc tiaq cađac Chuaq, cadàu mot.

Chuaq Jêxu Enh Ngìa Caiphe

(*Mõc 14:53-65; Luc 22:54-55,63-71; Jon 18:13-14,19-24*)

⁵⁷ 'Bàì mangai ma rùp Chuaq Jêxu 'ràng Haq trùh ta pajàu ha'nhèq Caiphe. Wì thài ranenh wa wì craq broq gàu phòq tagop ti aih. ⁵⁸ Pêtrô lam tiaq Haq òi hangai, mùt ta xàn pajàu ha'nhèq, ha'ngui ti wì mangai linh, waq ca jah ngan ro òiq ca bìac cô jah loh 'màng leq?

⁵⁹ Wì mangai pajàu càn, xam òiq ca craq hadrah enh 'nhèq chaq mangai òòiq capoch amòng kian Chuaq Jêxu, waq ca wì jah i trong jêh cađac Haq. ⁶⁰ I bacc ngai capoch amòng kian Haq, mahaq wì chaq xôq 'nhòq hnoq i bìac cleq ma đàng ca jêh Haq.

Khoi èh i baiq ngai lam trùh doi: ⁶¹ "Mangai cô doi: 'Au jah raliang đac Hnem Cùh Waiq Boc Plình, khoi èh Au broq hlài trom piq hì.'"

⁶² Pajàu ha'nhèq yòng doi ca Haq: "Wa cô kian ìh 'màng aih, ìh ùh tèò hlài 'mòh?" ⁶³ Mahaq Chuaq Jêxu ùh doi cleq.

Pajàu ha'nhèq doi hòm ca Haq: "Au thê ìh pachac enh ngìa ca Boc Plình ìh, doi ca nhèn loq, ìh joq Crich Con Boc Plình ùh?"

⁶⁴ Chuaq Jêxu tèò haq: "Jòq troi bàu ìh khoi doi, mahaq Au doi ca pì, hì atìq pì jah hnoq Con Mangai ha'ngui òi ti

pah 'ma Boc Plình. Haq i cwìang itai dìq đống, Haq lam trùh ti yùc plình.”[☆]

⁶⁵ Pajàu ha'nhèq hich dèh eo rai doi: “Haq khoi capoch bàu 'mèq ùng Boc Plình. Bèn ỏi nhet cleq ca chaq mangai kìa Haq hòim? Pì khoi tàng Haq capoch 'mèq ùng Boc Plình ùh? Pì hèm 'màng leq?”

⁶⁶ Dìq ca wì tèo: “Haq đàng ca cachìt.”

⁶⁷ Wì cachôh ta hadrò Haq, clàc Haq wa tep Haq. ⁶⁸ Wì doi: “Crich ôi, tàng ìh Mangai capoch thai Boc Plình, thê ìh doi ca nhèn loq cabô ma hwat ìh beq?”

Pêtrô Hangah Chuaq Jêxu

(Môc 14:66-72; Luc 22:56-62; Jon 18:15-18,25-27)

⁶⁹ Jò Pêtrô xôq ha'ngui enh gùng ỏi ta xàn hnem, i mòi q ngai hapõng cadrì trùh haten doi ca haq: “Ìh hadai ỏi ti Chuaq Jêxu Mangai Ga-li-lê.”

⁷⁰ Mahaq Pêtrô hangah enh ngìa dìq ca wì doi: “Au ùh 'nì tàng bàu aih.”

⁷¹ Jò haq loh ti 'mang ngo, i mòi q ngai hapõng gu cadrì 'noi q doi ca wì ỏi ti aih: “Mangai cô hadai ỏi ti Chuaq Jêxu Mangai Na-xa-ret.”

⁷² Mòi q yàng hòim Pêtrô hangah xam bàu pachac: “Au ùh loq ca Mangai aih.”

⁷³ Atiq ca aih 'bài mangai ma yòng kenh aih doi ca Pêtrô: “Jòq 'nàng ìh ỏi ti wì. ìh hadai capoch bàu Ga-li-lê.”

⁷⁴ Mahaq Pêtrô hanip wa pachac rai doi: “Au ùh 'nì ca Mangai aih.”

Tajòi 'mòi ia rống. ⁷⁵ Pêtrô hmàng hlài bàu Chuaq khoi doi ca haq: “Adroi ca ia rống, ìh doi piq yàng, ìh ùh loq ca Au.” Pêtrô loh enh gùng, hmoi ra-ua dìq jaq.

[☆] 26:64 26:64 BCP 110:1; Đan 7:13.

27

¹ Trùh xroìh xroq dìq ca pajàu càn wa 'bài craq broq gàu jàn tagop, capoch tùang ca dabau chaq trong jêh đac Chuaq Jêxu. ² Wì cật Haq, 'ràng Haq loh lam am ca tình trùang Philat.

Juđa Ich-ca-ri-ôt Cachit
(BYH 1:18-19)

³ Jò aih Juđa, haq ma khoi blòq Chuaq, hnoq wì padon jêh cachit Chuaq. Haq hèm ùh khwài, wìh hlài, wê 30 'bac, am hlài da wì pajàu càn wa 'bài craq broq gàu. ⁴ Haq doi: “Au khoi i tôiq, au khoi blòq Mangai ta-atoq.”

Wì tèo haq: “Bìac aih ùh xài bìac nhèn, aih hi mac ca da ìh,”

⁵ Juđa hwenh cađac 'bac aih ta Hnem Cùh Waiq. Haq loh lam hanöc dađeh.

⁶ Mahaq wì pajàu càn töch 'bac aih doi: “Ùh jah 'mùt 'bac cô ta kho Hnem Cùh Waiq, taiq 'bac cô khoi broq ta-ùc mahem.” ⁷ Hi khoi, wì pajàu càn tình ca dabau: “Yöch 'bac aih röt ðùng mangai thòq broq padrì ðòiq catùh hanang mangai ùh canao enh hangai.” ⁸ ðùng aih, trùh manàiq xôq wì creo ðùng Mahem. ⁹ Bìac cô tìah ca bàu Jê-rê-mi, aih mangai capoch thai Boc Plình, khoi doi adroi: “Wì yöch 30 'bac, 'bac ma khoi tech Haq, aih jaq con caiq Is-ra-ên khoi pachì ca Haq. ¹⁰ Wa am 'bac aih röt ðùng mangai ma broq padrì, tìah ca bàu Chuaq khoi doi adroi.”

Chuaq Jêxu Yòng Enh Ngìa Philat
(Möc 15:2-5; Luc 23:3-5; Jon 18:33-38)

¹¹ Chuaq Jêxu yòng enh ngìa ca tình trùang ma bòch Haq: “Ìh ajoq Bùa mangai Yothaiq ùh?”

Chuaq Jêxu tèo: “Jòq troi bàu ìh ma doi.”

¹² Jò wì pajàu càn wa 'bài craq broq gàu kian Haq, Haq ùh tèo hlài. ¹³ Philat doi ca Haq: “Wì i bəc bìac kian ìh. ìh

ùh tàng 'mòh?" ¹⁴ Chuaq Jêxu ùh tèò hlài haq mòiq nà leq, 'màng aih broq ca tình truang hamaih ta manoh diq jaq.

¹⁵ Trùh hì Lè Lam Cwa tiaq ranenh, tình truang jah ca'naih mòiq ngai tù, mahaq tiaq manoh enh jàn. ¹⁶ Jò aih i mòiq ngai mangai tù, bàc mangai canao loq haq, hiniq haq 'Ba-ra-ba. ¹⁷ Jò wì tagop hi bàc, Philat bòch wì: "Pì enh au ca'naih mangai leq, 'Ba-ra-ba loq Chuaq Jêxu ma wì creó Crich?" ¹⁸ Ma jah 'màng aih Philat loq, ùh xài Chuaq Jêxu broq dù, mahaq taiq wì i manoh tarènh ca Haq ma wì rùp jao am Haq.

¹⁹ Jò Philat ha'ngui òi ta gèq hadrah, mai haq thê wì lam doi ca Haq: "Apaq broq cleq ca Mangai ta-atoq 'mat, ma jah 'màng aih xèq nèh au khoi apô hnoq, au chiúq xalep diq jaq taiq bìac Haq."

²⁰ Mahaq wì pajàu càn wa wì craq broq gàu, thê wì mangai pajùm ca'naih 'Ba-ra-ba, jêh cađac Chuaq Jêxu.

²¹ Tình truang bòch wì: "Wa baiq ngai cô pì enh au ca'naih ma leq?"

Wì tèò: "'Ba-ra-ba."

²² Philat bòch: "Chuaq Jêxu cô ma wì creó Crich, èh au broq 'màng leq ca Haq?"

Diq ca wì tèò haq: "Tiang đình Haq ta long pagat!"

²³ Tình truang bòch: "Mahaq Mangai cô khoi broq dù bìac leq?"

Wì cachech yi dèh hòm: "Tiang đình Haq ta long pagat beq!"

²⁴ Philat hnoq dađeh pi 'blêq ca bàu wì. Wì ta-ùang yi hnao hòm. Haq yỏc diac 'nheo tì enh ngĩa ca wì, rai doi: "Au ùh pòq tôiq ca mahem Mangai cô, bìac 'mat lènh ca da pì."

²⁵ Diq đống ca wì padreo hlài bàu doi: "Xìn mahem Haq ta-ùc ca nhèn wa con caiq nhèn."

²⁶ Philat ca'naih ca wì 'Ba-ra-ba, am wì blai Chuaq Jêxu, hi khoi jao ca wì ðòiq wì tiang ðình Haq ta long pagat.

²⁷ Khoi èh wì mangai linh da tình truàng 'ràng Chuaq Jêxu mùt ta hnem da mangai linh, hi tagop ðiq ca linh òi dudan ca Haq. ²⁸ Wì lêh eo Haq, caxùnh òn ca Haq eo yôh gòh. ²⁹ Wì ðenh cadoh xam hila, pacôi ta gàu Haq, wa ðòiq cadia ta tì pah 'ma Haq. Hi khoi, hacùn cràng enh ngìa ca Haq, halê Haq doi: “Waiq Bùa jàn Yothaiq!” ³⁰ Wì cachôh ca Haq, yôc cadia blai gàu Haq. ³¹ Jò wì khoi hêq ca halê Haq, wì lêh eo gòh Haq ma 'nang caxùnh, caxùnh hlài da Haq eo. Khoi èh, 'nong Haq lam ðòiq tiang ðình Haq ta long pagat.

Chuaq Jêxu ta Long Pagat

(Môc 15:21-32; Luc 23:26-43; Jon 19:17-27)

³² Jò wì loh lam, wì hnoq mòiq ngai enh gùng Siren, hiniq haq Simôn. Wì thê haq xùì long pagat Chuaq Jêxu. ³³ Trùh nòi wì creò Gô-gô-tha, aih i hiniq Go Cadôh. ³⁴ Wì alôn alac wa clong mat xang am ca Haq ôq, mahaq jò Haq liah ngan, Haq ùh waq ôq. ³⁵ Jò wì khoi tiang ðình Haq ta long pagat, wì pàih panàih troq ca ma leq jah eo cwàn Haq. ³⁶ Hi khoi, wì ha'ngui ti aih gòm wèq Haq. ³⁷ Wì achìh chù ta long ban ðòiq enh 'nhèq ca gàu Haq ma i bàu kian Haq, doi: Cô Chuaq Jêxu Bùa Mangai Yothaiq.

³⁸ Hadai jò aih, wì tiang ðình baiq ngai, mangai atùng, mòiq pah 'ma, mòiq pah 'ngeo ca Haq. ³⁹ 'Bàì wì ma lam cwa trong aih, do halê Haq, rai ngu ngiù gàu, doi: ⁴⁰ “Ìh ma raliang ðac Hnem Cùh Waiq, èh broq hlài trom piq hì, dèch ðađeh beq! Tàng ìh Con Calô Boc Plình, loh enh long pagat beq!”

⁴¹ 'Bàì pajàu càn, 'bàì thài ranenh, wa 'bàì craq broq gàu, wì halê ðac Haq doi: ⁴² “Haq khoi dèch wì ma 'noiç, mahaq Haq ùh jah dèch ðađeh. Tàng joq Haq broq Bùa Is-ra-ên,

Haq phai loh khoi enh long pagat, èh nhèn ma lùì Haq.
⁴³ Haq khoi canòm ca Boc Plình, òiòi Boc Plình òiòi dèch
 Haq tàng Boc Plình bùì manoh ca Haq, ma jah 'màng aih
 Haq khoi òi: 'Au cô Con Calô Boc Plình.'"⁴⁴ Wa baiq ngai
 atùng ma 'bìq tiang òiòi ti Haq hanoh hanip Haq, lech ca
 Haq 'màng aih.

⁴⁵ Enh 'ne hì trùh piq jò chùu, òiòi ca gùng loh ca clam
 clòiòi òiòi òiòi. ⁴⁶ Trùh piq jò, Chuaq Jêxu creò bàu òiòi:
 "Êli, Êli, La-ma-sa-bach-tha-ni," aih: "Boc Plình Au òi, Boc
 Plình Au òi, gleq òi ma cadac Au?"[☆]

⁴⁷ I toq biaq ngai yòng kenh aih, tàng bàu cô, wì haq òi:
 "Haq creò ca Êli."

⁴⁸ I mòiq ngai ta 'bài wì cadàu lam yóc mòiq cato capaih,
 chùq ta òiòi jòq, xrep ta long cadia am ca Haq òq. ⁴⁹ Mahaq
 mangai 'noiòi òi: "Òiòi 'màng 'mat raq, ngan thù Êli loh
 dèch Haq òh?"

⁵⁰ Chuaq Jêxu creò bàu òiòi mòiq yàng hòh, hi khoi Haq
 thê òiòi mahua yiang Haq loh, hi pat hihèm.

⁵¹ 'Màng cô, bai prình ta Hnem Cùh Waiq, dahich enh
 'nhèq trùh ta ha'neq, broq baiq phàn. Taneh òiòi, hmu
 càn padah. ⁵² Ralùng hanang tapèh, wa bàc hanang òiòi
 mangai hadròih khoi cachit jah rìh òiòi, ⁵³ loh enh ralùng
 atiq ca Chuaq Jêxu rìh òiòi, èh mùt ta phòq hadròih,
 mahno loh ca bàc ngai hnoq.

⁵⁴ Jò aih wì mangai òiòi truang òiòi wa wì ma òiòi gòm
 wèq Chuaq Jêxu, hnoq taneh òiòi wa bàc bìac ma 'noiòi
 hòh. Wì yùq creò òiòi ca jaq, òiòi: "Mangai cô joq 'nàng Con
 Calô Boc Plình."

⁵⁵ Hadai i bàc gu cadrì yòng ngan Haq enh hangai, aih
 mangai khoi tiaq Chuaq Jêxu enh Ga-li-lê òiòi patih bìac
 Haq. ⁵⁶ Òiòi ta wì aih i Mari Ma-òò-len, Mari miq Jacò wa
 Jòsep, wa miq baiq toq con Xê-bê-òè.

[☆] 27:46 27:46 BCP 22:1.

Bìac Catùh Chuaq Jêxu

(Môc 15:42-47; Luc 23:50-56; Jon 19:38-42)

⁵⁷ Trùh xèq, i mòiq ngai padrông can ôi phôq A-ri-ma-thê, hiniq haq Jôsep, mangai ma hadai tiaq Chuaq Jêxu. ⁵⁸ Haq lam trùh nòi Philat, xìn hanang Chuaq Jêxu. Philat thê wì mangai linh am ca haq. ⁵⁹ Jôsep yôc hanang hi xom xam bai habùac lem hreo, ⁶⁰ 'ràng òòiq ta ralùng neo ma cla haq khoi pùng ta còp hmu am ca dađeh. Haq cadre mòiq toq hmu cần broq calàp gúp ralùng aih, hi khoi haq lam. ⁶¹ I Mari Ma-đò-len wa Mari 'noiç òi ta aih ha'ngui ta jang enh ngia ca ralùng.

⁶² Trùh hi da èh, aih atiq ca Hì Padon Caq Lè, wì pajàu cần wa mangai Pha-ri-si lam trùh ti Philat doi: ⁶³ “Tinh Truàng ôi, nhèn hmàng hlài bàu Mangai loq amòng cô, jò Haq òi rìh, i doi: ‘Atiq ca piq hì, Au jah rìh hlài.’ ⁶⁴ Xìn ìh thê wì wèq ralùng òiq jaq hagao haghình trùh hì piq, yùq mangai hóc tiaq Haq lam trùh yôc atùng hanang Haq, hi khoi wì doi ca mangai 'noiç: Haq khoi rìh hlài. 'Màng cô bìac aih padò 'nùt wì yi hnao ca adroi hòm.”

⁶⁵ Philat doi ca wì: “Pì i linh wèq, lam wèq ma cajap beq tiaq manoh pì.” ⁶⁶ 'Màng aih wì lam broq teo hadro jang 'mang ralùng, èh thê mangai linh wèq cajap òiq jaq.

28

Bìac Chuaq Jêxu Rìh Hlài

(Môc 16:1-10; Luc 24:1-12; Jon 20:1-10)

¹ Atiq ca hì Sabat, hì gàu tùang lè, xròih xroq bu 'ngah, i Mari Ma-đò-len wa Mari ma 'noiç lam hmàih ca ralùng.

² Ta'ngàc jang cô i taneh dalàc dèh òiq jaq, taiq i mòiq 'bình plình Chuaq loh enh plình lam ca cadre hmu, hi khoi ha'ngui enh 'nhèq ca hmu aih. ³ Hadrò haq 'ngah tìah ca camlet, eo taboc tìah ca capaih. ⁴ Hnoq 'màng aih, 'bài

mangai linh ma wèq ralùng yùq crè loh ca tarit, bu dàng mangai cachit.

⁵ Mahaq 'bình plình aih doi ca wa gu cadrì aih: “Chôp apaq yùq. Au loq chôp chaq Chuaq Jêxu, Mangai khoi chiùq tiang đình ta long pagat. ⁶ Haq ùh i òi ta cô. Haq khoi rih hlài tiah ca bàu Haq khoi doi ca pì. Lam ngan nòi wì ma òi q hanang Haq beq, ⁷ èh lam ma renh doi ca mangai hóc tiaq Haq loq, Haq khoi rih hlài enh can cachit. Haq lam adroi ca wì cwa gùng Ga-li-lê. Wì jah hnoq Haq ta aih. Cô bàu au khoi doi am ca chôp loq.”

⁸ Wa baiq ngai gu cadrì aih cadàu loh khoi enh nòi ralùng, rai manè, rai yùq crè, cadàu lam doi ca 'bài mangai hóc tiaq loq. ⁹ Chuaq Jêxu glàm wa gu cadrì aih, Haq doi: “Bùi ta manoh beq!” Wa trùh ti Haq, oc jènh Haq rai cùh waiq Haq. ¹⁰ Khoi èh, Chuaq Jêxu doi ca wa: “Apaq yùq, lam doi ca 'bài oh daq: Au lam gùng Ga-li-lê, jah hnoq Au ta aih.”

¹¹ Jò wa 'nang lam ti trong, i toq 'biaq ngai linh ma wèq ralùng, mùt ta phòq doi ca wì pajàu càn loq òi q ca biac aih. ¹² Jò wì craq broq gàu tình biac aih gêh, wì am ca linh aih 'bac khoi èh doi ca wì: ¹³ “'Ne mang jò nhèn cùi, mangai hóc tiaq Haq lam trùh yóc atùng hanang Haq. ¹⁴ Tàng tình truang tàng biac cô, èh bèn chaq trong anoi hlài ca haq, waq ca pì ùh hìaq troq cleq.” ¹⁵ 'Bài linh aih yóc 'bac wa broq tiaq bàu tanap aih. Bàu aih jah ràu yôt òi ta jàn Yoithaiq enh jò aih trùh manàiq.

Chuaq Mahno Loh ta Gùng Ga-li-lê

(Môc 16:14-18; Luc 24:36-49; Jon 20:19-23; BYH 1:6-8)

¹⁶ 12 ngai hóc tiaq lam gùng Ga-li-lê, tồc ta wang ma Chuaq khoi doi ca wì. ¹⁷ Jò hnoq Haq, wì cùh waiq Haq, mahaq i toq 'biaq ngai òi ra'ngòt ta manoh. ¹⁸ Chuaq Jêxu trùh haten doi ca 'bài mangai hóc tiaq bàu cô: “Òi q ca

cwìang itai òi ta plính wa ta crǒng taneh khoi am ca Au.
¹⁹ 'Màng aih, pì phai lam anoi hnài rìm jàn broq wì haq
wìa mangai hǒc tiaq Au, canòm ca hiniq Baq, hiniq Con,
hiniq Yiang Hadròih, broq 'baptem ca wì, ²⁰ wa anoi hnài
wì wèq dìq rìm biac Au khoi hnài pì. Au òi hloi ti pì enh
cô trùh hì atìq lùch.”

Sech Hadròih
Sech Hadròih

Copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo
All rights reserved.

2020-11-17

PDF generated using Haiola and XeLaTeX on 11 Feb 2021 from source files dated 10 Feb 2021

e5023a07-9831-5256-a315-1cae0f33043d